



आर्हत मतप्रभाकरस्य
पञ्चमो मयूखः

सू य ग डं

(सत्रकृताङ्गम्)



वैद्यवंशोद्भवेन परशुरामशर्मणा
निर्युक्ति-पाठान्तर-टिप्पण्यादिभिः परिष्कृतम्



तस्यायं

मूलं भद्रबाहुविरचिता निर्युक्तिश्चेत्येतावाद्

प्रथमः खण्डः



62809

पुण्यपत्तनस्थश्रेष्ठिमोतीलालेन प्रकाशितः

SŪYAGADAM

The Second Book of the Sacred Canon of the Jains
For the first time Critically edited

WITH

The Text of Nirvyukti, Various Readings
Notes and Appendices

By

DR. P. L. VAIDYA, M. A.; D. Litt. (Paris)
Professor of Sanskrit and Ardhamagadhi
Willingdon College, Sangli
Springer Research Scholar, Bombay University

PART I

(Text and Nirvyukti)

1928

PREFACE



The Sacred Books of the Śvetāmbara Jains were published in two or three editions in Calcutta, Bombay and Hyderabad, but they soon became very rare. Since the introduction of Ardhmāgadhī in the Bombay University many of these books are being appointed as texts for several examinations and students always experienced great difficulty in procuring them. The published editions, moreover, could hardly claim to be critical in any sense of the term and as such were unfit to be used by a critical University Student. I therefore undertook, at the suggestion and support of Shet Motilal Ladhaji of Poona, the task of preparing the first critical edition of the Sūtrakṛtāṅga, the Second Book of the Jain Canon, of which I am just publishing the first part. The second part, which it is hoped will be published without much delay, will contain an introduction, critical apparatus, word-index, notes and several appendices. I very much regret that for some reasons I am not able to bring out the complete edition in one volume and am thus compelled to crave the indulgence of the reader for its being issued in parts.

Willingdon College, }
1st August 1928.

P. L. V.

सूयगडं

पठमे सुयकखन्धे

समयज्ज्ञयणे पढमे

1. 1. 1.

बुज्जिञ्ज त्ति तिउट्टिञ्जा बन्धणं परिजाणिया ।
किमाह बन्धणं वीरो किं वा जाणं तिउट्टइ ॥ १ ॥
चित्तमन्तमचित्तं वा परिगिज्ज किसामवि ।
अन्नं वा अणुजाणाइ एवं दुक्खा न मुच्चई ॥ २ ॥
सयं तिवायए पाणे अदुवन्नेहि घायए ।
हणन्तं वाणुजाणाइ वेरं वट्टेइ अप्पणो ॥ ३ ॥
जस्सि कुले समुप्पन्ने जेहिं वा संवसे नरे ।
ममाइ लुपई बाले अन्ने अन्नेहि मुच्छिए ॥ ४ ॥
वित्तं सोयरिया चेव सव्वमेयं न ताणइ ।
संखाए जीवियं चेनं कम्मुणा उ तिउट्टइ ॥ ५ ॥
एए गन्थे विउक्कम्म एगे समणमाहणा ।
अयाणन्ता विउस्सित्ता सत्ता कामेहि माणवा ॥ ६ ॥
सन्ति पञ्च महब्भूया इहमेगेसिमाहिया ।
पुढवी आउ तेऊ वा वाउ आगासपञ्चमा ॥ ७ ॥
एए पञ्च महब्भूया तेब्भो एगो त्ति आहिया ।
अह तेसिं विणासेणं विणासो होइ देहिणो ॥ ८ ॥
जहा य पुढवीश्रूभे एगे नाणाहि दीसइ ।
एवं भो कसिणे लोए विन्नु नाणाहि दीसइ ॥ ९ ॥

एवमेगे त्ति जम्पन्ति मन्दा आरम्भनिस्सिया ।
 एगे किच्चा सयं पावं तिच्चं दुक्खं नियच्छइ ॥ १० ॥
 पत्तेयं कसिणे आया जे बाला जे य पण्डिया ।
 सन्ति पिच्चा न ते सन्ति नत्थि सत्तोववाइया ॥ ११ ॥
 नत्थि पुण्णे व पावे वा नत्थि लोए इओवरे ।
 सरीरस्स विणासेणं विणासो होइ देहिणो ॥ १२ ॥
 कुच्चं च कारयं चेव मच्चं कुच्चं न विज्जई ।
 एवं अकारओ अप्पा एवं ते उ पगम्भिया ॥ १३ ॥
 जे ते उ वाइणो एवं लोए तेसिं कओ सिया ।
 तमाओ ते तमं जन्ति मन्दा आरम्भनिस्सिया ॥ १४ ॥
 सन्ति पञ्च महच्चूया इहमेगेसिमाहिया ।
 आयच्छटा पुणो आहु आया लोगे य सासए ॥ १५ ॥
 दुहओ न विणस्सन्ति नो य उप्पज्जए असं ।
 सच्चे वि सच्चहा भावा नियत्तीभावमागया ॥ १६ ॥
 पञ्च खन्धे वयन्तेगे बाला उ खणजोइणो ।
 अन्नो अणन्नो नेवाहु हेउयं च अहेउयं ॥ १७ ॥
 पुढवी आउ तेऊ य तहा वाऊ य एगओ ।
 चत्तारि धाउणो रूवं एवमाहंसु आवरे ॥ १८ ॥
 अगारमावसन्ता वि अरण्या वा वि पच्चया ।
 इमं दरिसणमावन्ना सच्चदुक्खा विमुच्चई ॥ १९ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते ओहंतराहिया ॥ २० ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते संसारपारगा ॥ २१ ॥

ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते गब्भस्स पारगा ॥ २२ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते जम्मस्स पारगा ॥ २३ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते दुक्खस्स पारगा ॥ २४ ॥
 ते नावि संधिं नच्चा णं न ते धम्मविऊ जणा ।
 जे ते उ वाइणो एवं न ते मारस्स पारगा ॥ २५ ॥
 नाणाविहाइ दुक्खाइं अणुहोन्ति पुणो पुणो ।
 संसारचक्रवालमि मच्चुवाहिजराकुले ॥ २६ ॥
 उच्चावयाणि गच्छन्ता गब्भमेस्सन्ति णन्तसो ।
 नायपुत्ते महावीरे एवमाह जिणुत्तमे ॥ २७ ॥

त्ति बेमि ॥

समयज्ज्ञयणे पढमुद्देसो

1. 1. 2.

आघायं पुण एगोसिं उववन्ना पुढो जिया ।
 वेदयन्ति सुहं दुक्खं अदु वा लुप्पन्ति ठाणओ ॥ १ ॥
 न तं सयंकडं दुक्खं कओ अन्नकडं च णं ।
 सुहं वा जइ वा दुक्खं सेहियं वा असेहियं ॥ २ ॥
 सयंकडं न अन्नेहिं वेदयन्ति पुढो जिया ।
 संगइयं तं तहा तेसिं इहमेगेसिमाहियं ॥ ३ ॥
 एवमेयाणि जम्पन्ता वाला पण्डियमाणिणो ।
 निययानिययं सन्तं अयाणन्ता अबुद्धिया ॥ ४ ॥

एवमेगे उ पासत्था ते भुज्जो विप्पगब्भिया ।
 एवं उवट्ठिया सन्ता न ते दुक्खविमोक्खगा ॥ ५ ॥
 जविणो मिगा जहा सन्ता परियाणेण वज्जिया ।
 असङ्कियाइं सङ्कन्ति सङ्कियाइं असङ्किणो ॥ ६ ॥
 परियाणियाणि सङ्कन्ता पासियाणि असङ्किणो ।
 अन्नागभयसंविग्गा संपलिनन्ति तहिं तहिं ॥ ७ ॥
 अह तं पवेज्ज बज्जं अहे बज्जस्स वा वए ।
 मुच्चेज्ज पयपासाओ तं तु मन्दे न देहई ॥ ८ ॥
 अहियप्पाहियपन्नाणे विसमन्तेणुवागए ।
 स बद्धे पयपासेणं तत्थ घायं नियच्छइ ॥ ९ ॥
 एवं तु समणा एगे मिच्छदिट्ठी अणारिया ।
 असङ्कियाइं सङ्कन्ति सङ्कियाइं असङ्किणो ॥ १० ॥
 धम्मपन्नवणा जा सा तं तु सङ्कन्ति मूढगा ।
 आरम्भाइं न सङ्कन्ति अवियत्ता अकोविया ॥ ११ ॥
 सव्वप्पगं विउक्कस्सं सव्वं नूसं विहूणिया ।
 अप्पत्तियं अकम्मंसे एयमट्ठं मिगे चुए ॥ १२ ॥
 जे एयं नाभिजाणन्ति मिच्छदिट्ठी अणारिया ।
 मिंगा वा पासवद्धा ते घायमेस्सन्ति णन्तसो ॥ १३ ॥
 माहणा समणा एगे सव्वे नाणं सयं वए ।
 सव्वलोगे वि जे पाणा न ते जाणन्ति किंचण ॥ १४ ॥
 मिलक्खू अमिलक्खुस्स जहा वुत्ताणुभासए ।
 न हेउं से वियाणाइ भासियं तणुभासए ॥ १५ ॥
 एवमन्नाणिया नाणं वयन्ता वि सयं सयं ।
 निच्छयत्थं न जाणन्ति मिलक्खु व्व अबोहिया ॥ १६ ॥

अन्नाणियाणं वीमंसा अन्नाणे न नियच्छइ ।
 अप्पणो य परं नालं कुतो अन्नाणुसासिउं ॥ १७ ॥
 वणे मूढे जहा जन्तू मूढे नेयाणुगामिए ।
 दो वि एए अकोविया तिव्वं सोयं नियच्छई ॥ १८ ॥
 अन्धो अन्धं पंहं नेन्तो दूरमद्वाण गच्छइ ।
 आवज्जे उप्पहं जन्तू अदु वा पन्थाणुगामिए ॥ १९ ॥
 एवमेगे नियागट्ठी धम्ममाराहगा वयं ।
 अदु वा अहम्ममावज्जे न ते सव्वज्जयं वए ॥ २० ॥
 एवमेगे वियक्काहिं नो अन्नं पज्जुवासिया ।
 अप्पणो य वियक्काहिं अयमञ्जू हि दुम्मई ॥ २१ ॥
 एवं तक्काइ साहेन्ता धम्माधम्मे अकोविया ।
 दुक्खं ते नाइत्तुट्ठेन्ति सउणी पञ्जरं जहा ॥ २२ ॥
 सयं सयं पसंसन्ता गरहन्ता परं वयं ।
 जे उ तत्थ विउस्सन्ति संसारं ते विउस्सिया ॥ २३ ॥
 अहावरं पुरक्खायं किरियावाइदरिसणं ।
 कम्मचिन्तापणट्ठाणं संमारस्स पवड्डणं ॥ २४ ॥
 जाणं काएणगाउट्ठी अबुहो जं च हिंसइ ।
 पुट्ठो संवेयइ परं अवियत्तं खु सावज्जं ॥ २५ ॥
 सन्तिमे तउ आयाणा जेहिं कीरइ पावगं ।
 अभिकम्मा य पेसा य मणसा अणुजाणिया ॥ २६ ॥
 एए उ तउ आयाणा जेहिं कीरइ पावगं ।
 एवं भावपिसोहीए निव्वाणमभिगच्छई ॥ २७ ॥
 पुत्तं पिया समारब्भ आहारेज्ज असंजए ।
 भुञ्जमाणो य मेहावी कम्मणा नोवल्लिप्पई ॥ २८ ॥

मणसा जे पदुम्सन्ति चित्तं तेसिं न विज्जइ । -
 अणवज्जमतहं तेसिं न ते संवुडचारिणो ॥ २९ ॥
 इच्चेयाहि य दिट्ठीहिं सायागारवनिस्सिया ।
 सरणं ति मन्नमाणा सेवन्ती पावगं जणा ॥ ३० ॥
 जहा अस्साविणिं नावं जाइअन्धो दुरूहिया ।
 इच्छई पारमागन्तुं अन्तरा य विमीयई ॥ ३१ ॥
 एवं तु समणा एगे मिच्छदिट्ठी अणारिया ।
 संसारपारकंखी ते संसारं अणुपरियट्ठन्ति ॥ ३२ ॥
 त्ति बेमि ॥

समयज्जयणे विइयुद्देशो

1 1. 3.

जं किंचि उ पूइकडं सट्ठीमागन्तुमीहियं ।
 सहस्सन्तरियं भुञ्जे दुपक्खं चेव सेवई ॥ १ ॥
 तमेव अवियाणन्ता विसमंसि अकोविया ।
 मच्छा वेसालिया चेव उदगस्सभियागमे ॥ २ ॥
 उदगस्स पहावेणं सुकं सिग्घं तमेन्ति उ ।
 ढङ्गेहि य कङ्गेहि य आमिसत्थेहि ते दुही ॥ ३ ॥
 एवं तु समणा एगे वट्ठमाणसुहोसिणो ।
 मच्छा वेसालिया चेव धायमेस्सन्ति णन्तसो ॥ ४ ॥
 इणमन्नं तु अन्नाणं इहमेगेसिमाहियं ।
 देवउत्ते अयं लोए बम्भउत्ते इ आवरे ॥ ५ ॥
 ईसरेण कडे लोए पहाणाइ तहावरे ।
 जीवाजीवसमाउत्ते सुहदुक्खसमन्निए ॥ ६ ॥

सयंभुणा कडे लोए इइ वुत्तं महेसिणा ।
 मारेण संथुया माया तेण लोए अत्तासए ॥ ७ ॥
 माहणा समणा एगे आह अण्डकडे जए ।
 असो तत्तमकासी य अयाणन्ता मुसं वए ॥ ८ ॥
 सएहिं परियाएहिं लोगं वूया कडे त्ति य ।
 तत्तं ते न वियाणन्ति न विणासी कयाइ वि ॥ ९ ॥
 अमणुन्नसमुपायं दुक्खमेव वियाणिया ।
 समुप्पायमयाणन्ता कइं नायन्ति संवरं ॥ १० ॥
 सुद्धे अपावए आया इहमेगेसिमाहियं ।
 पुणो किङ्कापदोसेणं सो तत्थ अवरज्झई ॥ ११ ॥
 इह संवुडे मुणी जाए पच्छा होइ अपावए ।
 वियडम्बु जहा भुज्जो नीरयं सरयं तथा ॥ १२ ॥
 एयाणुवीइ भेहावी बम्मचेरेण ते वसे ।
 पुटो पावाउया सव्वे अक्खायारो सयं सयं ॥ १३ ॥
 सए सए उवट्टाणे सिद्धिमेव न अन्नहा ।
 अहे इहेव वसवत्ती सव्वकामसमपिए ॥ १४ ॥
 सिद्धा य ते अरोगा य इहमेगेसिमाहियं ।
 सिद्धिमेव पुरो काउं सासए गट्टिया नरा ॥ १५ ॥
 असंवुडा अणाईयं भमिहिन्ति पुणो पुणो ।
 कप्पकालमुवज्जन्ति ठाणा आमुरकिब्बिसिय ॥ १६ ॥

त्ति वेमि ॥

समयज्ज्ञयणे तइयुद्देशो

1. 1. 4.

एए जिया भो न मरणं वाला पण्डियमाणिणो ।
 हिच्चा णं पुव्वसंजोयं सिया किच्चोवएमगा ॥ १ ॥
 तं च भिक्खू परिन्नाय वियं तेसु न मुच्छए ।
 अणुक्खस्से अप्पलीणे मज्जेण मुणि जावए ॥ २ ॥
 सपरिग्गहा य सारम्भा इहमेगेसिमाहियं ।
 अपरिग्गहा अणारम्भा भिक्खू ताणं परिव्वए ॥ ३ ॥
 कडेसु धाममेसेज्जा विऊ दत्तेसणं चरे ।
 अगिद्धो विप्पमुक्को य ओमाणं परिवज्जए ॥ ४ ॥
 लोगवायं निसामेज्जा इहमेगेसिमाहियं ।
 विवरीयपन्नसंभूयं अन्नउत्तं तयाणुयं ॥ ५ ॥
 अणन्ते निइए लोए सासए न विणत्सई ।
 अन्तवं निइए लोए इइ धीरो तिपासई ॥ ६ ॥
 अपरिमाणं वियाणाइ इहमेगेसिमाहियं ।
 सव्वत्थ सपरिमाणं इइ धीरो तिपासई ॥ ७ ॥
 जे केइ तसा पाणा चिट्ठन्ति अदु थावरा ।
 परियाए अत्थि से अञ्जू जेण ते तसथावरा ॥ ८ ॥
 उरालं जगओ जोगं विवज्जासं पलेन्ति य ।
 सव्वे अकन्तदुक्खा य अओ मव्वे अहिंसिया ॥ ९ ॥
 एयं खु नाणिणो सारं जं न हिंसइ किंचण ।
 अहिंसासमयं चेव एयावन्तं वियाणिया ॥ १० ॥
 वुसिए य विगयगेही आयाणं सम्भ रक्खए ।
 चरियासणसेज्जासु भत्तपाणे य अन्तसो ॥ ११ ॥

एएहिं तिहि ठाणेहिं संजए सययं मृणी ।

उकसं जलणं नूमं मज्झत्थं च विगिञ्चए ॥ १२ ॥

समिए उ सया साहू पञ्चसंवरसंबुडे ।

सिएहि असिए भिम्बू आमोक्खाए परिव्वएजासि ॥ १३ ॥

त्ति वेमि ॥

समयज्झयणं पढमं

वेयालियज्झयणे विइए

1. 2. 1.

संबुज्झह किं न बुज्झह संबोही खलु पेच्च दुल्लहा ।

नो हूवणमन्ति राइयो नो सुलभं पुणरावि जीवियं ॥ १ ॥

डहरा बुद्धा य पासह गब्भत्था वि चयन्ति माणवा ।

सेणे जह वट्टयं हरे एवं आउखयम्मि तुइई ॥ २ ॥

मायाहि पियाहि लुप्पई नो सुलहा सुगई य पेच्चओ ।

एयाइ भयाइ पेहिया आरम्भा विरमेज्ज सुव्वए ॥ ३ ॥

जमिणं जगई पुढो जगा कम्मेहिं लुप्पन्ति पाणिणो ।

सयमेव कडेहि गाहई नो तस्स मुच्चेज्जपुट्टयं ॥ ४ ॥

देवा गन्धव्वरक्खसा असुरा भूमिचरा सरीसिवा ।

राया नरसेट्ठिमाहणा ठागा ते वि चयन्ति दुम्बिखया ॥ ५ ॥

कामेहि य संथवेहि गिध्दा कम्मसहा कालेण जन्तवो ।

ताले जह बन्धणच्चुए एवं आयुखयम्मि तुइई ॥ ६ ॥

जे यावि बहुस्सुए सिया धम्मिय माहण भिक्खुए सिया ।

अभिनुमकडेहि मुच्छिए तिव्वं ते कम्मेहि किच्चई ॥ ७ ॥

अह पास विवेगमुद्धिण्ण अवितीण्णे इह भासई धुवं ।
 नाहिसि आरं कओ परं वेहासे कम्मोहि किच्चई ॥ ८ ॥
 जइ वि य नगिणे किसे चरे जइ वि य भुञ्जिय मासमन्तसो ।
 जे इह मायाहि भिञ्जई आगन्ता गब्भाय गन्तसो ॥ ९ ॥
 पुरिसोरम पावकम्मुणा पालियन्तं मणुयाग जीवियं ।
 सन्ना इह कासमुच्छिया मोहं जन्ति नरा असंबुडा ॥ १० ॥
 जययं विहराहि जोगवं अणुपागा पन्था दुरुत्तरा ।
 अणुसासणमेव पक्कमे वीरोहिं सम्मं पवेइयं ॥ ११ ॥
 विरया वीरा समुद्धिया कोहकायरियाइपीसणा ।
 पाणे न हणन्ति सब्वसो पावाओ विरयाभिनिव्वुडा ॥ १२ ॥
 न वि ता अहमेव लुप्पए लुप्पन्ती लोगंसि पाणिणो ।
 एवं सहिएहि पासए अनिहे से पुट्टे हियासए ॥ १३ ॥
 धुणिया कुलियं व लेववं किसए देहमणासणा इह ।
 अविहिंसामेव पव्वए अणुधम्मो मुणिणा पवेइयो ॥ १४ ॥
 सउणो जह पंसुगुडिया विहुणिय धंसयई मियं रयं ।
 एवं दविओवहागवं कम्मं खवइ तवस्सि माहणे ॥ १५ ॥
 उट्टियमणगारमेसणं समणं ठाणाउियं तवस्सिणं ।
 डहरा बुद्धा य पत्थए अवि सुस्सो न य तं लभेज्ज नो ॥ १६ ॥
 जइ काळुगियाणि कासिया जइ रोयन्ति य पुत्तकारणा ।
 दवियं भिक्खू समुद्धियं नो लब्भन्ति न संठवित्तवे ॥ १७ ॥
 जइ वि य कामेहि लाविया जइ नेज्जाहि ण बन्धिउं घरं ।
 जइ जीविय नावकह्वए नो लब्भन्ति न संठवित्तए ॥ १८ ॥
 सेहन्ति य णं ममाइणो माय पिया य सुया य भारिया ।
 पोसाहि ण पासओ तुमं लोग परं पि जहासि पोसणो ॥ १९ ॥

अन्ने अन्नेहि मुच्छिया मोहं जन्ति नरा असंबुडा ।
 विसमं विसमेहि गाहिया ते पावेहि पुणो पगम्भिया ॥ २० ॥
 तम्हा दवि इक्ख पण्डिए पावाओ विरए भिनिव्वुडे ।
 पणए वीरं महाविहिं सिद्धिपहं नेयाउयं धुवं ॥ २१ ॥
 वेयालियमग्गमागओ मणवयसा काएण निव्वुडो ।
 चिच्चा वित्तं च नायओ आरम्भं च सुसंबुडं चरे ॥ २२ ॥
 त्ति वेमि ॥

वेयालियज्झयणे पढमुद्देसो

1. 2. 2

तय सं व जहाइ से रयं इइ संखाय मुणी न मज्जई ।
 गोयन्नतरेण माहणे अहसेयकरी अन्नेसि इंखिणी ॥ १ ॥
 जो परिभवई परं जणं संसारे परिवत्तई महं ।
 अदु इंखिणिया उ पाविया इइ संखाय मुणी न मज्जई ॥ २ ॥
 जे यावि अणायगे सिया जे वि य पेसगपेसगे सिया ।
 जे मोणपयं उवाट्टिए नो लज्जे समय सया चरे ॥ ३ ॥
 सम अन्नयरम्मि संजमे संसुद्धे समणे परिव्विए ।
 जे आवक्कहा समाहिए दविए कालमकासि पण्डिए ॥ ४ ॥
 दूरं अणुपास्सिया मुणी तीयं धम्ममणागयं तथा ।
 पुट्टे फरुसेहि माहणे अवि हण्णू समयम्मि रीयइ ॥ ५ ॥
 पन्नसमत्ते सया जए समताधम्ममुदाहरे मुणी ।
 सुहुमे उ सया अलूसए नो कुज्जे नो माणि माहणे ॥ ६ ॥
 बहुजणनमणाम्मि संबुडो सव्वट्टेहि नरे अणिस्सिए ।
 हरए व सया अणाविले धम्मं पादुरकासि कासवं ॥ ७ ॥

बहवे पाणा पुढो सिया पत्तेयं समयं समीहिया ।
 जे मोगपयं उवट्टिए विरइं तत्थ अकासि पण्डिए ॥ ८ ॥
 धम्मस्स य पारगे मुणी आरम्भस्स य अन्तए ठिए ।
 सोयन्ति य णं ममाइणो नो लब्भन्ति नियं परिग्गहं ॥ ९ ॥
 इहलोगदुहावहं विऊ परलोगे य दुहं दुहावहं ।
 विद्धंसणधम्ममेव तं इइ विज्जं को गारमावसे ॥ १० ॥
 महयं पलिगोव जाणिया जा वि य चंदणपूयणा इहं ।
 सुहुमे सल्ले दुरुद्धरे विउमंता पयहिज्ज संथवं ॥ ११ ॥
 एग चर ठाणमासणे सयणे एग समाहिए सिया ।
 भिक्खू उवहाणवीरिए वइगुत्ते अज्झत्तसंबुडो ॥ १२ ॥
 नो पीहे न यावपंगुणे दारं सुन्नघरस्स संजए ।
 पुढे न उदाहरे वयं न ससुच्छे नो संथरे तणं ॥ १३ ॥
 जत्थत्थमिए अणाउले सभविसमाइ मुणी हियासए ।
 चरगा अदु वा वि भेरवा अदु वा तत्थ सरीसिवा सिया ॥ १४ ॥
 तिरिया मणुया य दिव्वगा उवसग्गा तिविहा हियासिया ।
 लोमादीयं न हारिसे सुन्नागारगओ महामुणी ॥ १५ ॥
 नो अभिकंखेज्ज जीवियं नो वि य पूयणपत्थणे सिया ।
 अब्भत्थमुवेन्ति भेरवा सुन्नागारगयस्स भिक्खुणो ॥ १६ ॥
 उवणीयतरस्स ताइणो भयमाणस्स विविकमासणं ।
 सामाइयमाहु तस्स जं जो अप्पाण भए न दंसए ॥ १७ ॥
 उसिणोदगतत्तभोइणो धम्मठियस्स मुणिस्स हीमतो ।
 संसग्गो असाहु राइहिं असमाही उ तहागयस्स वि ॥ १८ ॥
 अहिगरणकडस्स भिक्खुणो वयमाणस्स पसज्ज दारुणं ।
 अट्टे परिहायई बहू अहिगरणं न करेज्ज पण्डिए ॥ १९ ॥

सीओदग पडि दुमुंछिणो अपडिन्नस्स लवावसप्पिणो ।
 सामाइयमाहु तस्स जं जो गिहिमत्तेऽसणं न भुञ्जई ॥ २० ॥
 न य संखयमाहु जीवियं तह वि य बालजणो पगम्भई ।
 बाले पावेहि भिञ्जई इइ संखाय सुणी न मज्जई ॥ २१ ॥
 छंदेण पले इमा पया बहुमाया मोहेण पावुडा ।
 वियडेण पलेन्ति माहणे सीउण्हं वयसा हियासए ॥ २२ ॥
 कुजए अपराजिए जहा अक्खेहिं कुसलेहि दीवयं ।
 कडमेव गहाय नो कलिं नो तीयं नो चेव दावरं ॥ २३ ॥
 एवं लोगम्मि ताइणा बुइए जे धम्मे अणुत्तरे ।
 तं गिण्ह हियं ति उत्तमं कडमिव सेस वहाय पण्डिए ॥ २४ ॥
 उत्तर मणुयाण अहिया गामधम्म इइ भे अणुस्सुयं ।
 जसी विरया समुट्टिया कासवस्स अणुधम्मचारिणो ॥ २५ ॥
 जे एय चरन्ति आहियं नाएणं महया महेसिणा ।
 ते उट्टिय ते समुट्टिया अन्नोन्नं सारेन्ति धम्मओ ॥ २६ ॥
 मा पेह पुरा पणामए अभिकंखे उवहिं धुणित्तए ।
 ज दूमण तेहि नो नया ते जाणन्ति समाहिमाहियं ॥ २७ ॥
 नो काहिँ होज्ज संजए पासणिए न य संपसारए ।
 नच्चा धम्मं अणुत्तरं कयकिरिए न यावि मामए ॥ २८ ॥
 छन्नं च पसंस नो करे न य उक्कोस पगास माहणे ।
 तेसिं सुविवेगमाहिए पणया जेहि सुजोसियं धुवं ॥ २९ ॥
 अनिहे सहिए सुसंबुडे धम्मट्ठी उवहाणवीरिए ।
 विहरेज्ज समाहिंदिए अत्ताहियं खु दुहेण लब्भइ ॥ ३० ॥
 न हि नूण पुरा अणुस्सुयं अदु वा तं तह नो समुट्टियं ।
 सुणिणा सामाइ आहियं नाएणं जगसव्वदंसिणा ॥ ३१ ॥

एवं मत्ता महन्तरं धम्मभिणं सहिया बहू जणा ।
 गुरुणो छंदाणुवत्तगा विरया तिण्ण महोधमाहियं ॥ ३२ ॥
 ति बेमि ॥

वेयालियज्झयणम्मि विइयुदेसो

1. 2. 3.

संबुडकम्मस्स भिक्खुणो जं दुप्पखं पुट्टं अत्रोहिए ।
 तं संजमओज्जवच्चिज्जई मरणं हेच्च वयन्ति पण्डिया ॥ १ ॥
 जे विन्नवणाहिजोसिया संतिण्णेहि समं वियाहिया ।
 तम्हा उट्ठं ति पासहा अदक्खु कामाई रोगवं ॥ २ ॥
 अग्गं वणिएहि आहियं धारेन्ती राइणिया इहं ।
 एवं परमा महव्वया अक्खाया उ सराइभोयणा ॥ ३ ॥
 जे इह सायाणुगा नरा अज्झोववन्ना कामेहि मुच्छिया ।
 किवणेण समं पगाब्भिया न वि जाणन्ति समाहिमाहियं ॥ ४ ॥
 वाहेण जहा वं विच्छए अबले होइ गवं पचोइए ।
 से अन्तसो अप्पथामए नाइवहे अबले विसीर्यइ ॥ ५ ॥
 एवं कामेसण विऊ अज्ज सुए पयहेज्ज संथवं ।
 कामी कामे न कामए लद्धे वा वि अलद्ध कण्हुई ॥ ६ ॥
 मा पच्छ असाधुता भवे अब्बेही अणुसास अप्पगं ।
 अहियं च असाहु सोयई से थणई परिदेवई बहू ॥ ७ ॥
 इह जीवियमेव पासहा तरुणे वा ससयस्स तुट्ठई ।
 इत्तरवासे य बुज्झह गिद्ध नरा कामेसु मुच्छिया ॥ ८ ॥
 जे इह आरम्भनिस्सिग्गा आयदण्ड एगान्तलूसगा ।
 गन्ता ते पावलोगयं चिररायं आसुरियं दिसं ॥ ९ ॥

न य संखयमाहु जीवियं तह वि य बालजणो पगब्भई ॥
 पञ्चुप्पन्नेण कारियं को दट्ठं परलोगमागए ॥ १० ॥
 अदक्खुव दक्खुवाहियं तं सहहसु अदक्खुदंसणा ।
 हंदि हु सुनिरुद्धदंसणे मोहणिण्ण कडेण कम्मणा ॥ ११ ॥
 दुक्खी मोहे पुणो पुणो निव्विन्देज्ज सिलोगपूयणं ।
 एवं सहिए हिपासए आयतुलं पाणेहि संजए ॥ १२ ॥
 गारं पि य आवसे नरे अणुपुच्चं पाणेहि संजए ।
 समता सव्वत्थ सुव्वए देवाणं गच्छे सलोगयं ॥ १३ ॥
 सोच्चा भगवाणुसासणं सच्चे तत्थ करेज्जुवकमं ।
 सव्वत्थ विणीयमच्छरे उच्चं भिक्खु विसुद्धमाहरे ॥ १४ ॥
 एवं नच्चा अहिट्टए धम्मट्ठी उवहाणवीरिए ।
 गुत्ते जुत्ते सया जए आयपरे परमायतट्टिए ॥ १५ ॥
 वित्तं पसवो य नाइओ तं बाले सरणं ति मन्नई ।
 एए मम तेसु वी अहं नो ताणं सरणं न विज्जई ॥ १६ ॥
 अब्भागामियम्मि वा दुहे अहवा उक्कमिए भवन्तिए ।
 एगस्स गई य आगई विदुमन्ता सरणं न मन्नई ॥ १७ ॥
 सव्वे सयकम्मकप्पिया अवियत्तेण दुहेण पाणिणो ।
 हिण्डन्ति भयाउला सढा जाइजरासरणेहि भिहुया ॥ १८ ॥
 इणमेव खणं वियाणिया नो सुलभं बोहिं च आहियं ।
 एवं सहिए हिपासए आह जिणे इणमेव सेसगा ॥ १९ ॥
 अमर्विसु पुरा वि भिक्खुवो आएसा वि भवन्ति सुव्वय्या ।
 एयाइं गुणाइं आहु ते कासवस्स अणुधम्मचारिणो ॥ २० ॥
 तिविहेण वि पाण मा हणे आयहिए अणियाण संबुडे ।
 एवं सिद्धा अणन्तसो संपइ जे य अणागयावरे ॥ २१ ॥

एवं से उद्गह् अणुत्तरनाणी अणुत्तरदंसी अणुत्तरनाणदंसणधरे ।
अरहा नायपुत्ते भगवं वेसालिए वियहिए ॥ २२ ॥

त्ति वेभि ॥

वेयालिज्झयणं विइयं

उवसग्गज्झयणे तइए

1. 3 1.

सूरं मन्नइ अप्पाणं जाव जेयं न पस्सई ।
जुज्झन्तं दढधम्माणं सिसुपालो व महारहं ॥ १ ॥
पयाया सूरु राणसीसे संगामम्भि उवट्टिए ।
माया पुत्तं न जाणाइ जेएण परिविच्छए ॥ २ ॥
एवं सेहे वि अप्पुट्टे भिक्खवारियाअकोविए ।
सूरं मन्नइ अप्पाणं जाव ल्हं न सेवए ॥ ३ ॥
जया हेमन्तमासम्भि सीयं फुसइ सव्वगं ।
तत्थ मन्दा विसीयन्ति रज्जहीणा व खत्तिया ॥ ४ ॥
फुट्टे गिम्हाहितावेणं विमणे सुपिवासिए ।
तत्थ मन्दा विसीयन्ति मच्छा अप्पोदए जहा ॥ ५ ॥
सया दत्तेसणा दुक्खा जायणा दुप्पणोल्लिया ।
कम्मत्ता दुब्भगा चेव इच्चाहंसु पुटोजणा ॥ ६ ॥
एए सदे अचायन्ता गामेसु नगरेसु वा ।
तत्थ मन्दा विसीयन्ति संगामम्भि व भीरुया ॥ ७ ॥
अप्पेगे खुधियं भिक्खुं सुणी उंसइ लूसए ।
तत्थ मन्दा विसीयन्ति तेउपुट्टा व पाणिणो ॥ ८ ॥

अप्पेगे पडिभासन्ति पडिपन्थियमागया ।
 पडियारगया एए जे एए एवजीविणो ॥ ९ ॥
 अप्पेगे वइ जुञ्जन्ति नगिणा पिण्डोलगाहमा ।
 मुण्डा कण्डूविणट्टङ्गा उज्जला असमाहिया ॥ १० ॥
 एवं विप्पडिवन्नेगे अप्पणा उ अजाणया ।
 तमाओ ते तमं जन्ति मन्दा मोहेण पावुडा ॥ ११ ॥
 पुट्टो य दंसमसगेहिं तणफासमचाइया ।
 न मे दिट्ठे परे लोए जइ परं मरणं सिया ॥ १२ ॥
 संतत्ता केसलोएणं बम्भचेरफराइया ।
 तत्थ मन्दा विसीयन्ति मच्छा विट्ठा व केयणे ॥ १३ ॥
 आयदण्डसमायारे मिच्छासंठियभावणा ।
 हरिसप्पओसमावन्ना केई लूसन्तिनारिया ॥ १४ ॥
 अप्पेगे पलियन्तेसिं चारो चोरो ति सुव्वयं ।
 बन्धन्ति भिक्खुयं बाला कसायवयणेहि य ॥ १५ ॥
 तत्थ दण्डेण संवीते मुट्ठिणा अदु फलेण वा ।
 नाईणं सरई बाले इत्थी वा कुद्धगामिणी ॥ १६ ॥
 एए भो कसिणा फासा फरुसा दुरहियासया ।
 हत्थी वा सरसंविता कीवावस गया गिहं ॥ १७ ॥
 ति वेमि ॥

उवसग्गज्झयणे पढमुहेसे

1. 3. 2.

अहिमे सुहुमा संग्गा भिक्खूणं जे दुरुत्तरा ।
 जत्थ एगे विसीयन्ति न चयन्ति जवित्तए ॥ १ ॥
 अप्पेगे नायगा दिस्स रोयन्ति परिवारिया ।
 पोस णे ताय पुट्टो सि कस्स ताय जहासि णे ॥ २ ॥

पिया ते थेरओ ताय सप्पा ते खुड्डिया इमा ।
 भायरो ते सग्गा ताय सोयरा किं जहासि णे ॥ ३ ॥
 मायरं पियरं पोस एवं लोगो भविस्सइ ।
 एवं खु लोइयं ताय जे पालेन्ति य मायरं ॥ ४ ॥
 उत्तरा महुरुल्लावा पुत्ता ते ताय खुड्डया ।
 भारिया ते नवा ताय मा सा अन्नं जणं गमे ॥ ५ ॥
 एहि ताय घरं जामो मा य कम्मे सहा वयं ।
 विइयं पि ताय पासामो जाप्पु ताव सयं गिहं ॥ ६ ॥
 गन्तुं ताय पुणो गच्छे न तेणासमणो सिया ।
 अक्कामगं परिकम्मं को ते वारिउमरिहइ ॥ ७ ॥
 जं किंचि अणगं ताय तं पि सच्चं समीकर्यं ।
 हिरण्णं ववहाराइ तं पि दाहासु ते वयं ॥ ८ ॥
 इच्चेव णं सुसेहन्ति कालुणीयसमुट्टिया ।
 विवद्धो नाइसंगेहिं तओ गारं पहावइ ॥ ९ ॥
 जहा रुक्खं वणे जायं मालुया पडिबन्धइ ।
 एवं णं पडिबन्धन्ति नाइओ असमाहिणा ॥ १० ॥
 विवद्धो नाइसंगेहिं हत्थी वा वि नवगगहे ।
 पिट्ठओ परिसप्पन्ति सुय गो व्व अदूरए ॥ ११ ॥
 एए संग्गा मणूस्राणं पायाला व अत्तारिमा ।
 कीवा जत्थ य किस्सन्ति नाइसंगेहिं मुच्छिया ॥ १२ ॥
 तं च भिम्भू परिन्नाय सच्चे संग्गा महासवा ।
 जीवियं नायकंखिज्जा सोच्चा धम्ममणुत्तरं ॥ १३ ॥
 अहिमे सन्ति आवट्ठा कासवेणं पवेइया ।
 बुद्धा जत्थावसप्पन्ति सीयन्ति अबुहा जहिं ॥ १४ ॥

रायाणो रायमच्चा य माहणा अदु व खत्तिया ।
 निमन्तयन्ति भोगेहिं भिक्खुयं साहुजीविणं ॥ १५ ॥
 हत्थस्सरहजाणेहिं विहारगमणेहि य ।
 भुञ्ज भोगे इमे सभ्वे महरिसी पूजयामु तं ॥ १६ ॥
 वत्थगन्धमलंकारं इत्थीओ सयणाणि य ।
 भुञ्जाहिमाइं भोगाइं आउसो पूजयामु तं ॥ १७ ॥
 जो तुमे नियमो चिण्णो भिक्खुभावम्मि सुव्वया ।
 अगारमावसन्तस्स सव्वो संविज्जए तहा ॥ १८ ॥
 चिरं दूइज्जमाणस्स दोसो दाणिं कुओ तव ।
 इच्चेव णं निमन्तेन्ति नीवारण व सूररं ॥ १९ ॥
 चोइया भिक्खचरियाए अचयन्ता जवित्तए ।
 तत्थ मन्दा विसीयन्ति उज्जाणंसि व दुव्वला ॥ २० ॥
 अचयन्ता व ल्ह्हेणं उवहाणेण तज्जिया ।
 तत्थ मन्दा विसीयन्ति उज्जाणंसि जरग्गवा ॥ २१ ॥
 एवं निमन्तणं लद्धं मुच्छिया गिद्ध इत्थिसु ।
 अज्झोववन्ना कामेहिं नोइज्जन्ता गया गिहं ॥ २२ ॥
 ति बेमि ॥

उवसग्गज्झयणे विइयुद्देसे

1. 3. 3.

जहा संगामकालम्मि पिट्ठओ भीरु वेहइ ।
 वलयं गहणं नूमं को जाणइ पराजयं ॥ १ ॥
 मुहुत्ताणं मुहुत्तस्स मुहुत्तो होइ तारिसो ।
 पराजिया वसप्पामो इइ भीरु उवेहई ॥ २ ॥

एवं उ समणा एगे अवलं नच्चाण अप्पगं ।
 अणागयं भयं दिस्स अवकप्पन्तिमं सुयं ॥ ३ ॥
 को जाणइ विऊवायं इत्थीओ उदगाउ वा ।
 चोइज्जन्ता पवक्खामो न नो अत्थि पकप्पियं ॥ ४ ॥
 इच्चेव पडिलेहन्ति वलया पडिलेहिणो ।
 वितिगिच्छसमावन्ना पन्थाणं च अकोविया ॥ ५ ॥
 जे उ संगामकालम्भि नाया सूरपुरंगमा ।
 नो ते पिट्टमुवेहन्ति किं परं मरणं सिया ॥ ६ ॥
 एवं समुट्ठिए भिक्खू वोसिज्जा गारवन्धणं ।
 आरम्भं तिरियं कट्ठु अत्तत्ताए परिव्वए ॥ ७ ॥
 तमेगे परिभासन्ति भिक्खुयं साहुजीविणं ।
 जे एवं परिभासन्ति अन्तए ते समाहिए ॥ ८ ॥
 संवद्धसमकप्पा उ अन्नमन्नेसु मुच्छिया ।
 पिण्डवायं गिलाणस्स जं सारेह दलाह य ॥ ९ ॥
 एवं तुब्भे सरागन्था अन्नमन्नमणुव्वसा ।
 नट्टसप्पहसब्भावा संसारस्स अपारगा ॥ १० ॥
 अह ते परिभासेज्जा भिक्खु मोक्खविसारए ।
 एवं तुब्भे पभासन्ता दुपक्खं चेव सेवह ॥ ११ ॥
 तुब्भे भुज्जह पाएसु गिलाणो अभिहडम्भि य ।
 तं च वीओदगं भोच्चा तमुद्दिस्सादि जं कडं ॥ १२ ॥
 लिता तिव्वाभितावेणं उज्झिया असमाहिया ।
 नाइकण्डूइयं सेयं अरुयस्सावरज्जई ॥ १३ ॥
 तत्तेण अणुसिट्ठा ते अपडिन्नेण जाणया ।
 न एस नियए मग्गे असमिक्खा वई किई ॥ १४ ॥

एरिसा जा वई एसा अग्गवेणु व्व करिसिया ।
 गिहिणो अभिहडं सेयं भुञ्जितं न उ भिक्खुणं ॥ १५ ॥
 धम्मपन्नवणा जा सा सारम्भा न विसोहिया ।
 न उ एयाहि दिट्ठीहिं पुव्वमासिं पगप्पियं ॥ १६ ॥
 सव्वार्हिं अणुजुत्तीहिं अचयन्ता जवित्तए ।
 तओ वायं निराक्किच्चा ते भुज्जो वि पगाब्भिया ॥ १७ ॥
 रागदोसामिभूयप्पा मिच्छत्तेण अभिहुया ।
 आउस्से सरणं जन्ति टंकणा इव पव्वयं ॥ १८ ॥
 बहुगुणापगप्पाइं कुज्जा अत्तसमाहिए ।
 जेणन्ने न विरुज्जेज्जा तेण तं तं समायरे ॥ १९ ॥
 इमं च धम्ममायाय कासवेण पवेइयं ।
 कुज्जा भिक्खू गिलाणस्स अगिलाए समाहिए ॥ २० ॥
 संखाय पेसलं धम्मं दिट्ठिमं परिनिव्वुडे ।
 उवसग्गे नियामित्ता आ मोक्खाए परिव्वएज्जासि ॥ २१ ॥
 त्ति वेमि ॥

उवसग्गज्झयणे तइयुद्देसे

1 3. 4.

आहंसु महापुरिसा पुव्विं तत्ततवोधणा ।
 उदएण सिद्धिमावन्ना तत्थ मन्दो विसीयइ ॥ १ ॥
 अभुञ्जिया नमी विदेही रामगुत्ते य भुञ्जिया ।
 वाहुए उदगं भोच्चा तथा नारायणे रिसी ॥ २ ॥
 आसिले देविले चेव दीवायण महारिसी ।
 पारासरे दगं भोच्चा वीयाणि हरियाणि य ॥ ३ ॥

एए पुच्वं महापुरिसा आहिया इह संमया ।
 भोच्चा वीयोदगं सिद्धा इइ मेयमणुस्सुयं ॥ ४ ॥
 तत्थ मन्दा विसीयन्ति वाहच्छिन्ना व गद्भा ।
 पिट्ठओ परिसप्पन्ति पिट्ठसप्पी य संभमे ॥ ५ ॥
 इहमेगे उ भासन्ति सायं साएण विज्जई ।
 जे तत्थ आरियं मग्गं परमं च समाहियं ॥ ६ ॥
 मा एयं अवमन्नन्ता अप्पेणं लुम्पहा वहुं ।
 एयस्स उ अमोक्खाए अयोहारि व्व जूरह ॥ ७ ॥
 पाणाइवाए वट्टन्ता मुसावाए असंजया ।
 अदिन्नादाणे वट्टन्ता मेहुणे य परिग्गहे ॥ ८ ॥
 एवमेगे उ पासत्था पन्नवन्ति अणारिया ।
 इत्थीवसं गया बाला जिणसासणपरंमुहा ॥ ९ ॥
 जहा गण्डं पिलागं वा परिपीलेज्ज मुहुत्तगं ।
 एवं विन्नवणित्थीसु दोसो तत्थ कओ सिया ॥ १० ॥
 जहा मन्धादणे नाम थिमियं भुज्जई दगं ।
 एवं विन्नवणित्थीसु दोसो तत्थ कओ सिया ॥ ११ ॥
 जहा विहंगमा पिङ्गा थिमियं भुज्जई दगं ।
 एवं विन्नवणित्थीसु दोसो तत्थ कओ सिया ॥ १२ ॥
 एवमेगे उ पासत्था मिच्छदिट्ठी अणारिया ।
 अज्झोववन्ना कामेहिं पूयणा इव तरुणए ॥ १३ ॥
 अणागयमपस्सन्ता पञ्चुप्पन्नगवेसगा ।
 ते पच्छा परितप्पन्ति खीणे आउम्मि जोव्वणे ॥ १४ ॥
 जेहिं काले परिकन्तं न पच्छा परितप्पए ।
 ते धीरा बन्धणुम्मुक्का नावकंखन्ति जीवियं ॥ १५ ॥

जहा नई वेयरणी दुत्तरा इह संमया ।
 एवं लोगंसि नारीओ दुत्तरा अमईमया ॥ १६ ॥
 जेहिं नारीण संजोगा पूयणा पिट्ठओ कया ।
 सव्वमेयं निराकिच्चा ते ठिया सुसमाहिण ॥ १७ ॥
 एण ओघं तरिस्सन्ति समुदं ववहारिणो ।
 जत्थ पाणा विसन्नासि किच्चन्ती सयकम्मुणा ॥ १८ ॥
 तं च भिक्खू परिन्नाय सुव्वए समिण चरे ।
 मुसावायं च वज्जिजा अदिन्नादाणं च वोसिरे ॥ १९ ॥
 उड्डमहे तिरियं वा जे केई तसथावरा ।
 सव्वत्थ विरइं कुज्जा सन्ति निव्वाणमाहियं ॥ २० ॥
 इमं च धम्ममायाय कासवेण पवेइयं ।
 कुज्जा भिक्खू गिलाणस्स अगिलाए समाहिण ॥ २१ ॥
 संखाय पेसलं धम्मं दिट्ठिमं परिनिव्वुडे ।
 उवसग्गे नियामित्ता आ मोक्खाए परिव्वएज्जासि ॥ २२ ॥
 त्ति वेमि ॥

उवसग्गज्जयणं तइयं

इत्थिपरिन्नज्जयणे चउत्थे

1. 4. 1.

जे मायरं च पियरं च विप्पजहाय पुव्वसंजोगं ।
 एगे सहिए चरिस्सामि आरयमेहुणो विवित्तेसु ॥ १ ॥
 सुहुमेणं तं परिकम्म छन्नपएण इत्थिओ मन्दा ।
 उव्वायं पि ताउ जाणंसु जहा लिस्सन्ति भिक्खुणो एगे ॥ २ ॥

पासे भिसं निस्तीयन्ति अभिक्खणं पोसवन्थं परिहिनति ।
 कायं अहे वि दंसन्ति वाह उद्धु कक्खमणुव्वए ॥ ३ ॥
 सयणासणेहि जोगेहिं इन्थियो एगया निमन्तेन्ति ।
 एयाणि चेव से जाणे पासाणि विरूवरूवाणि ॥ ४ ॥
 नो तासु चक्खु संधेज्जा नो वि य साहसं समभिजाणे ।
 नो सहियं पि विहरेज्जा एवमप्पा सुरक्खिओ होइ ॥ ५ ॥
 आमन्तिय उस्सविया भिक्खुं आयसा निमन्तेन्ति ।
 एयाणि चेव से जाणे सदाणि विरूवरूवाणि ॥ ६ ॥
 मणवन्धणेहि णेगेहिं कलुणविणीयमुवगासित्ताणं ।
 अदु मञ्जुलाइं भासन्ति आणवयन्ति भिन्नकहाहिं ॥ ७ ॥
 सीहिं जहा व कुणिमेणं निब्भयमेगचरं ति पासेणं ।
 एवित्थियाउ वन्धन्ति संबुडं एगइयमणगारं ॥ ८ ॥
 अह तत्थ पुणो नमयन्ती रहकारो व नेमि आणुपुव्वीए ।
 वद्धो भिए व पासेणं फन्दन्ते वि न मुच्चए ताहे ॥ ९ ॥
 अह सेऽणुतप्पई पच्छा भोच्चा पायसं व विसमिस्सं ।
 एवं विव्वेगमायाय संवासो न वि कप्पए दविए ॥ १० ॥
 तम्हा उ वज्जए इत्थी विसलित्तं व कण्टगं नच्चा ।
 ओए कुलाणि वसवत्ती आघाए न से वि निग्गन्थे ॥ ११ ॥
 जे एयं उच्चं अणुगिद्धा अन्नयरा होन्ति कुसीलाणं ।
 सुतवास्सिए वि से भिक्खू नो विहरे सह णमित्थीसु ॥ १२ ॥
 अवि धूयराहि सुण्हाहिं धाईहिं अदुव दासीहिं ।
 महईहि वा कुमारीहिं संथवं से न कुज्जा अणगारे ॥ १३ ॥
 अदु नाइणं च सुहीणं वा अप्पियं ददु एगया होइ ।
 गिद्धा सत्ता कामेहिं रक्खणपोसणे मणुस्सोऽसि ॥ १४ ॥

समणं पि दद्दुदासीणं तत्थ वि ताव एगे कुप्पन्ति ।
अदु वा भोयणेहि नत्थेहिं इत्थीदोसं संक्किणो होन्ति ॥ १५ ॥
कुव्वन्ति संथवं ताहिं पब्भट्ठा समाहिजोगेहिं ।
तम्हा समणा न समेन्ति आयाहियाए संनिसेज्जाओ ॥ १६ ॥
वहवे गिहाइ अवहट्ठु मिस्सीभावं पत्थुया य एगे ।
धुवमग्गमेव पवयन्ति वायावीरियं कुसीलाणं ॥ १७ ॥
सुद्धं रवइ परिसाए अह रहस्सम्मि दुक्कडं करेन्ति ।
जाणन्ति य णं तहाविऊ माइल्ले महासठेऽयं ति ॥ १८ ॥
सयं दुक्कडं च न वयइ आइट्ठो वि पक्कत्थइ बाले ।
वेयाणुवीइ मा कासी चोइज्जन्तो गिलाइ से भुज्जो ॥ १९ ॥
ओसिया वि इत्थिपोसेसु पुरिसा इत्थिवेयखेयन्ना ।
पन्नासमन्निया वेगे नारीणं वसं उवकसन्ति ॥ २० ॥
अवि हत्थपायछेयाए अदु वा वद्धमंसउकन्ते ।
अवि तेयसाभितावणाणि तच्छिय खारसिंचणाइ य ॥ २१ ॥
अदु कण्णनासछेयं कण्ठच्छेयणं तिइक्खन्ती ।
इइ एत्थ पावसंतत्ता न वेन्ति पुणो न काहिनति ॥ २२ ॥
सुयमेयमेवमेगेसिं इत्थीवेयं ति हु सुयक्खायं ।
एयं पि ता वइत्ताणं अदु वा कम्मणा अवकरोन्ति ॥ २३ ॥
अन्नं मणेण चिन्तेन्ति वाया अन्नं च कम्मणा अन्नं ।
तम्हा न सदहे भिक्खू बहुमायाओ इत्थिओ नच्चा ॥ २४ ॥
जुवई समणं बूया विचित्तलंकारवत्थगाणि परिहिता ।
विरया चरिस्सहं रुक्खं धम्ममाइक्खणे भयन्तारो ॥ २५ ॥
अदु सावियापवाएणं अहमंसि साहम्मिगी य समणाणं ।
जउक्कुम्भे जहा उवज्जोई संवासे विऊ विसीएज्जा ॥ २६ ॥

जउकुम्भे जोइउवगूढे आसुमितते नासमुवयाइ ।
 एविन्थियाहि अणगारा संवासेण नासमुवयन्ति ॥ २७ ॥
 कुव्वन्ति पावगं कम्मं पुट्ठा वेगेवमाहिंसु ।
 नो हं करेमि पावं ति अंकेसाइणी ममेस त्ति ॥ २८ ॥
 वालस्स मन्दयं वीयं जं च कडं अवजाणइ भुज्जो ।
 दुगुणं करेइ से पावं पूयणकामो विसन्नेसी ॥ २९ ॥
 संलो ऋणिज्जमणगारं आयगयं निमन्तणेणाहंसु ।
 वत्थं च ताइ पायं वा अन्नं पाणगं पडिग्गाहे ॥ ३० ॥
 नीवारमेवं बुज्जेज्जा नो इच्छे अगारमागन्तुं ।
 वद्वे विसयपासेहिं मोहमावज्जइ पुणो मन्दे ॥ ३१ ॥
 त्ति वेमि ॥

इत्थिपरिन्नज्जयणे पढमुद्देसे

1. 4. 2.

ओए सया न रज्जेज्जा भोगकामी पुणो विरज्जेज्जा ।
 भोगे समणाण सुणेह जह भुज्जन्ति भिक्खुणो एगे ॥ १ ॥
 अह तं तु भेयमावन्नं मुच्छियं भिक्खुं काममइवट्ठं ।
 पलिभिन्दिया णं तो पच्छ पाटुद्धट्ठु मुद्धि पहणन्ति ॥ २ ॥
 जइ केसिया णं मए भिक्खु नो विहरे सह णमित्थीए ।
 केसाणावि हं लुञ्चिस्सं नन्नत्थ मए चरेज्जासि ॥ ३ ॥
 अह णं से होइ उवलद्धो तो पेसन्ति तहाभूएहिं ।
 अलाउच्छेयं पेहेहि वग्गुफलाइं आहराहि त्ति ॥ ४ ॥
 दारूणि सागपागाए पज्जोओ वा भविस्सई राओ ।
 प्रायाणि य मे रयावेहि एहि ता मे पिट्ठओमहे ॥ ५ ॥

वत्थाणि य मे पाडिलेहेहि अन्नं पाणं च आहराहि त्ति ।
 गन्थं च रओहरणं च कासवग च मे समणुजाणाहि ॥ ६ ॥
 अदु अञ्जणिं अलंकारं कुकययं मे पयच्छाहि ।
 लोद्धं च लोद्धकुसुमं च वेणुपलासियं च गुलियं च ॥ ७ ॥
 कुट्टं तगरं च अगरं संपिट्टं सम्मं उसिरेणं ।
 तेह्लं मुहमिञ्जाए वेणुफलाइं संनिहाणाए ॥ ८ ॥
 नन्दीचुण्णगाइं पाहराहि छत्तोवाणहं च जाणाहि ।
 सत्थं च सूवच्छेञ्जाए आणीलं च वत्थयं रयावेहि ॥ ९ ॥
 सुफणिं च सागपागाए आमलगाइं दगाहरणं च ।
 तिलगकरणिमञ्जणसलागं धिसु मे विहूणयं विजाणेहि ॥ १० ॥
 संडासगं च फणिहं च सीहलिपासगं च आणाहि ।
 आदंसगं च पयच्छाहि दन्तपक्खालणं पवेसाहि ॥ ११ ॥
 पूगफलं तंबोह्लयं सूइ सुत्तगं च जाणाहि ।
 कोसं च मोयमेहाए सुप्पुक्खलगं च खारगालणं च ॥ १२ ॥
 चन्दालगं च करगं च वच्चघरं च आउसो खणाहि ।
 सरपाययं च जायाए गोरहगं च सामणेराए ॥ १३ ॥
 घाडिगं च साडिण्डिमयं च चेलगोलं कुमारभूयाए ।
 वासं सममिआवण्णं आवसहं च जाण भत्तं च ॥ १४ ॥
 आसन्दियं च नवसुत्तं पाउह्लाइं संकमट्टाए ।
 अदु पुत्तदोहेलट्टाए आणप्पा हवन्ति दासा वा ॥ १५ ॥
 जाए फले समुप्पन्ने गेण्हसु वा णं अहवा जहाहि ।
 अह पुत्तपोसिणो एगे भारवहा हवन्ति उट्टा वा ॥ १६ ॥
 राओ वि उट्टिया सन्ता दारगं च संठवन्ति धाई वा ।
 मुहिरामणा वि ते सन्ता वत्थधोवा हवन्ति हंसा वा ॥ १७ ॥

एवं बहुहिं कयपुव्वं भोगत्थाए जेऽभियावन्ना ।
 दासे मिए व पेसे वा पसुभूए व से न वा केई ॥ १८ ॥
 एवं खु तासु विन्नप्यं संथवं संवासं च वज्जेज्जा ।
 तज्जातिया इमे कामा वज्जकरा य एवमक्खाए ॥ १९ ॥
 एयं भयं न सेयाए इइ से अप्पगं निरुम्भित्ता ।
 नो इत्थिं नो पसुं भिक्खु नो सयं पाणिणा निलिज्जेज्जा ॥२०॥
 सुविसुद्धलेसे मेहावी पराकिरियं च वज्जए नाणी ।
 मणसा वयसा काएणं सव्वफाससहे अणगारे ॥ २१ ॥
 इच्चवमाहु से वीरे धुयए धुयमोहे से भिक्खु ।
 तम्हा अज्झत्तविसुद्धे सुविसुक्के आ मोक्खाए परिव्वएज्जासि ॥२२॥
 त्ति वेमि ॥

इत्थिपरिन्नज्झयणं चउत्थं

निरयविभत्तियज्झयणे पञ्चमे

1. 5. 1.

पुच्छिस्सहं केवलियं महेसिं कहं भितावा नरगा पुरत्था ।
 अजाणओ मे मुणि बूहि जाणं कहिं नु बाला नरगं उवेन्ति ॥१॥
 एवं मए पुट्ट महाणुभावे इणमोऽव्ववी कासवे आसुपन्ने ।
 पवेयइस्सं दुहमदुग्गं आईणियं दुक्कडिणं पुरत्था ॥ २ ॥
 जे केइ बाला इह जीवियडी पावाइँ कम्माइँ करेन्ति रुदा ।
 ते घोररूवे तमिसन्धयारे तिव्वाभितावे नरगे पडन्ति ॥ ३ ॥
 तिव्वं तसे पाणिणोँ थावरे य जे हिंसई आयसुहं पडुच्चा ।
 जे लूसए होइ अदत्तहारी न सिक्खई सेयवियस्स किंचि ॥ ४ ॥

पागन्भि पाणे बहुणं तिवार्इ अनिव्वुए घायमुवेइ बाले ।
 निहो निसं गच्छइ अन्तकाले अहोसिरं कट्टु उवेइ दुग्गं ॥ ५ ॥
 हण छिन्दह भिन्दह णं दहेति सदे सुणेन्ता परधम्मियाणं ।
 ते नारगाओ भयभिन्नसन्ना कंखन्ति कं नाम दिसं वयामो ॥६॥
 इज्जालरासिं जलियं सजोइं तत्तोवमं भूमिमणुकमन्ता ।
 ते डज्झमाणा कलुणं थणन्ति अरहस्सरा तत्थ चिरड्डिइया ॥७॥
 जइ ते सुया वेयरणी भिदुग्गा निसिओ जहा खुर इव तिव्वसोया ।
 तरन्ति ते वेयरणिं भिदुग्गं उसुचोइया सत्तिसु हम्ममाणा ॥ ८ ॥
 कीलेहि विज्झन्ति असाहुकम्मा नावं उवेन्ते सइविप्पहूणा ।
 अन्ने उ सल्लाहि तिसल्लियाहिं दीहाहि विदूण अहे करेन्ति ॥९॥
 केसिं च बन्धित्तु गले सिलाओ उदगंसि बोलेन्ति महालयंसि ।
 कलंबुयावालुयमुम्पुरे य लोलन्ति पच्चन्ति य तत्थ अन्ने ॥ १० ॥
 आसुरियं नाम महाभितावं अन्धंतमं दुप्पतरं महन्तं ।
 उट्ठं अहे थं तिरियं दिसासु समाहिओ जत्थगणी झियाइ ॥११॥
 जंसी गुहाए जलणेऽत्तिउट्टे अविजाणओ डज्झइ लुत्तपन्नो ।
 सया य कलुणं पुण घम्मठाणं गाढोवणीयं अइदुक्खधम्मं ॥१२॥
 चत्तारि अगणीओ समारभेत्ता जहिं कूरकम्मा भितवेन्ति बालं ।
 ते तत्थ चिट्ठन्तभितप्पमाणा मच्छा व जीवन्तो व जोइपत्ता ॥१३॥
 संतच्छणं नाम महाभितावं ते नारगा जत्थ असाहुकम्मा ।
 हत्थेहि पाएहि य बन्धिरुणं फलगं व तच्छन्ति कुहाडहत्था १४
 रुहिरे पुणो वच्चसमुस्सियंगे भिन्नत्तमंगे परिवत्तयन्ता ।
 पयन्ति णं नेरइए फुरन्ते सजीवमच्छे व अयोक्वच्छे ॥ १५ ॥
 नो चेव ते तत्थ मसीभवन्ति न मज्जई तिव्वभिवेयणाए ।
 तमाणुभागं अणुवेययन्ता दुक्खन्ति दुक्खी इह दुक्कडेणं ॥१६॥

तर्हि च ते लोलणसंपगाढे गाढं सुतत्तं अगाणिं वयन्ति ।
 न तत्थ सायं लहई भिदुग्गे अरहियाभितावा तह वी तवेन्ति ॥१७॥
 से सुच्चई नगरवहे व्य सदे दुहोवणीयाणि पयाणि तत्थ ।
 उदिण्णकम्माण उदिण्णकम्मा पुणो पुणो ते सरहं दुहेन्ति ॥१८॥
 पाणेहि णं पाव वियोजयन्ति तं भे पवक्खामि जहातहेणं ।
 दण्डेहि तत्था सरयान्ति बाला सव्वेहि दण्डेहि पुराकएहिं ॥१९॥
 ते हम्ममाणा नरगे पडन्ति पुण्णे दुरूवस्स महाभितावे ।
 ते तत्थ चिट्ठन्ति दुरूवभक्खी तुट्ठन्ति कम्मोवगया किमीहिं ॥२०॥
 सया कसिणं पुण धम्मठाणं गाढोवणीयं अइदुक्खधम्मं ।
 अन्दूसु पक्खिप्य विहत्तु देहं वेहेण सीसं सेऽभितावयन्ति ॥२१॥
 छिन्दन्ति बालस्स खुरेण नक्कं ओट्टे वि छिन्दन्ति दुवे वि कण्णे ।
 जिब्भं विणिक्कस्स विहत्थिमेत्तं तिक्खाहि सल्लाहि भितावयन्ति ॥२२॥
 ते तिप्पमाणा तलसंपुडं व राइंदियं तत्थ थणन्ति बाला ।
 गलान्ति ते सोणियपूयमंसं पज्जेइया खारपइद्धियंगा ॥ २३ ॥
 जइ ते सुया लोहियपूयपाई बालागणी तेअगुणा परेणं ।
 कुम्भी महन्ताहियपोरुसीया समूसिया लोहियपूयपुण्णा ॥२४॥
 पक्खिप्य तासुं पययान्ति बाले अट्टस्सरे ते कलुणं रसन्ते ।
 तण्हाइया ते तउतम्बतत्तं पज्जिज्जमाणट्टयरं रसान्ति ॥ २५ ॥
 अप्पेण अप्पं इह वञ्चइत्ता भवाहमे पुव्वसए सहस्से ।
 चिट्ठन्ति तत्था बहुकूरकम्मा जहा कडं कम्म तहासि भारे ॥२६॥
 समज्जिणित्ता कलुसं अणज्जा इट्ठेहि कन्तेहि य विप्पहूणा ।
 ते दुब्भिगन्धे कसिणे य फासे कम्मोवगया कुणिमे आवसान्ति
 ॥ २७ ॥ त्ति वेमि ॥

निरयविभत्तियज्झयणे पट्टमुद्दसे

1 5. 2.

अहावरं सासयदुक्खधम्मं तं भे पवक्खामि जहातहेणं ।
 बाला जहा दुक्कडकम्मकारी वेयन्ति कम्माई पुरेकडाइं ॥ १ ॥
 हत्थेहि पाएहि य बन्धिऊणं उयरं विकत्तन्ति खुरासिएहिं ।
 गिण्हित्तु बालस्स विहतु देहं वद्धं थिरं पिट्टउ उद्वरन्ति ॥ २ ॥
 बाहू पकत्तन्ति य मूलओ से थूलं वियासं मुहे आडहन्ति ।
 रहंसि जुत्तं सरयन्ति बालं आरुस्स विज्जन्ति तुदेण पिट्टे ॥ ३ ॥
 अयं व तत्तं जलियं सजोइ तउवमं भूमिमणुकमन्ता ।
 ते डज्जमाणा कलुणं थणन्ति उसुचोइया तत्तजुगोसु जुत्ता ॥४॥
 बाला बला भूमिमणुकमन्ता पविज्जलं लोहपहं च तत्तं ।
 जंसी भिदुग्गंसि पवज्जमाणा पेसे व दण्डेहि पुरा करेन्ति ॥ ५ ॥
 ते संपगाढंसि पवज्जमाणा सिलाहि हम्मन्ति निपातिणीहिं ।
 संतावणी नाम चिरट्ठिइया संतप्पई जत्थ असाहुकम्मा ॥ ६ ॥
 कन्दूसु पक्खिप्प पयन्ति बालं तओ वि द्ढा पुण उप्पयन्ति ।
 ते उट्टकाएहि पक्खज्जमाणा अवरेहि खज्जन्ति सणप्फएहिं ॥ ७ ॥
 समूसियं नाम विधूमठाणं जं सोयतत्ता कलुणं थणन्ति ।
 अहोसिरं कट्टु विगत्तिऊणं अयं व सत्थेहि समोसवेन्ति ॥ ८ ॥
 समूसिया तत्थ विस्रणियंग्गा पक्खीहि खज्जन्ति अयोमुहेहिं ।
 संजीवणी नाम चिरट्ठिइया जंसी पया हम्मइ पावचेया ॥ ९ ॥
 तिक्खाहि सलाहि निवाययन्ति वसोगयं सावययं व लद्धं ।
 ते सलविद्धा कलुणं थणन्ति एगन्तदुक्खं दुहओ गिलाणा ॥१०॥
 सया जलं नाम निहं महन्तं जंसी जलन्तो अगणी अकट्टो ।
 चिट्ठन्ति वद्धा बहुकूरकम्मा अरहस्सरा केइ चिरट्ठिइया ॥ ११ ॥

चिया महन्तीउ समारभित्ता ह्युव्वन्ति ते त कलुणं रसन्तं ।
 आवड्ढई तत्थ असाहुकम्मा सप्पी जहा पडियं जोडमज्जे ॥१२॥
 सया कसिणं पुण चम्मठाणं गाढोवणीयं अइदुक्खधम्मं ।
 हत्थेहि पाएहि य वन्धिऊणं सत्तु व्व दण्डेहि समारभन्ति ॥१३॥
 भञ्जन्ति बालस्स वहेण पुट्टी सीसं पि भिन्दन्ति अयोधणेहिं ।
 ते भिन्नदेहा फलणं व तच्छ तत्ताहि आराहि नियोजयन्ति ॥१४॥
 अभिजुंजिया रुद् असाहुकम्मा उसुचोइया हत्थिवहं वहन्ति ।
 एगं दुरूहित्तु दुवे तओ वा आरुस्स विज्झन्ति ककाणओ से ॥१५॥
 बाला बला भूमिमणुकमन्ता पविज्जलं कण्टइलं महन्तं ।
 विवद्धतप्येहि विवण्णाचित्ते समीरिया कोड्डवालं करेन्ति ॥१६॥
 वेयालिणं नाम महाभित्तवे एगायए पव्वयसन्तलिक्खे ।
 हम्मन्ति तत्था बहुकूरकम्मा परं सहस्साण मुहुत्तगाणं ॥१७॥
 संवाहिया दुक्कडिणो थणन्ति अहो य राओ परितप्पमाणा ।
 एगन्तकूडे नरगे महन्ते कूडेण तत्था विसमे हया उ ॥ १८ ॥
 भञ्जन्ति णं पुच्चमरी सरोसं समुग्गरे ते मुसले गहेउं ।
 ते भिन्नदेहा रुहिरं वमन्ता ओमुद्दगा धरणितले पडन्ति ॥१९॥
 अणासिया नाम महासियाला पागम्भिणो तत्थ सयावकोवा ।
 खञ्जन्ति तत्था बहुकूरकम्मा अदूरगा संखलियाहि बद्धा ॥२०॥
 सयाजला नाम नई भिदुग्गा पविज्जलं लोहविलीणतत्ता ।
 जंसी भिदुग्गंसि पवज्जमाणा एगायताणुकमणं करेन्ति ॥ २१ ॥
 एयाइ फासाइ फुसन्ति बालं निरन्तरं तत्थ चिराडिईयं ।
 न हम्ममाणस्स उ होइ ताणं एगो सयं पच्चणुहोइ दुक्खं ॥२२॥
 जं जारिसं पुच्चनकासि कम्मं तमेव आगच्छइ संपराए ।
 एगन्तदुक्खं भवमज्जणित्ता वेयन्ति दुक्खी तमणन्तदुक्खं ॥२३॥

एयाणि सोच्चा नरगाणि धीरे न हिंसए किंचण सच्चलोए ।
 एगन्तदिट्ठी अपरिग्गहे उ बुज्झिज्ज लोगस्स वसं न गच्छे ॥२४॥
 एवं तिरिक्खे मणुयामरेसुं चउरन्तणन्तं तयणुव्विवागं ।
 स सच्चमेयं इइ वेयइत्ता कंखेज्ज कालं धुयमायरेज्ज ॥ २५॥
 त्ति वेमि ॥

निरयविभत्तियज्झयणं पञ्चमं

सिरिवीरत्थुइयज्झयणे छट्ठे

1 6

पुच्छिस्सु णं समणा माहणा य अगारिणो या परतित्थिया य ।
 से केइ नेगन्ताहियं धम्ममाहु अणेलिसं साहुसमिक्खयाए ॥ १ ॥
 कहं च नाणं कह दंसणं से सीलं कहं नायसुयस्स आसि ।
 जाणासि णं भिक्खु जहातहेणं अहासुयं बूहि जहा निसन्तं ॥२॥
 खेयन्नए से कुसलासुपन्ने अणन्तनाणी य अणन्तदंसी ।
 जसंसिणो चक्खुपहे ठियस्स जाणाहि धम्मं च धिइं च पेहि ॥३॥
 उहुं अहे यं तिरियं दिसासु तसा य जे थावर जे य पाणा ।
 मे निच्चनिच्चेहि समिक्ख पन्ने दीवे व धम्मं समियं उदाहु ॥४॥
 से सच्चदंसी अभिभूयनाणी निरामगन्धे धिइमं ठियप्पा ।
 अणुत्तरे सच्चजगांसि विज्जं गन्था अईए अभए अणाऊ ॥५॥
 से भूइपन्ने अणिएअचारी ओहंतरे धीरे अणन्तचक्खु ।
 अणुत्तरं तप्पइ सूरिए वा वइरोयणिन्दे व तमं पगासे ॥ ६ ॥
 अणुत्तरं धम्ममिणं जिणाणं नेया मुणी कासव आसुपन्ने ।
 इन्दे व देवाण महाणुभावे सहस्सणेया दिवि णं विसिट्ठे ॥ ७ ॥

से पन्नया अक्खयसागरे वा मदोदही वा वि अणन्तपारे ।
 अणाविले वा अकसाइ मुक्के सक्के व देवाहिवई जुईमं ॥ ८ ॥
 से वीरिएणं पडिपुण्णवीरिए सुदंसणे वा नगसच्चसेट्टे ।
 सुरालए वा सि मुदागरे से विरायए नेगगुणोववेए ॥ ९ ॥
 सयं सहस्साण उ जोयणाणं तिकण्डगे पण्डगवेजयन्ते ।
 से जोयणे नवनवते सहस्से उट्टुस्सियो हेट्टु सहस्समेगं ॥ १० ॥
 पुट्टे नभे चिट्ठइ भूमिवट्टिए जं सूरिया अणुपरिवट्टयन्ति ।
 से हेमवण्णे बहुनन्दणे य जंसी रइं वेययई महिन्दा ॥ ११ ॥
 से पव्वए सदमहप्पगासे विरायई कञ्चणमट्टवण्णे ।
 अणुत्तरे गिरिसु य पव्वदुग्गे गिरीवरे से जलिए व भोमे ॥ १२ ॥
 महीइ मज्झाम्भि ठिए नगिन्दे पन्नायए सूरियसुद्धलेसे ।
 एवं सिरीए उ स भूरिवण्णे मणोरमे जोयइ अच्चिमाली ॥ १३ ॥
 सुदंसणस्सेव जसो गिरिस्स पवुच्चई महओ पव्वयस्स ।
 एओवमे समणे नायपुत्ते जाईजसोदंसणनाणसीले ॥ १४ ॥
 गिरीवरे वा निसहाययाणं रुयए व सेट्टे वलयाययाणं ।
 तओवमे से जगभूइपन्ने मुणीण मज्झे तमुदाहु पन्ने ॥ १५ ॥
 अणुत्तरं धम्ममुदीरइत्ता अणुत्तरं ज्ञाणवरं झियाइ ।
 सुसुकसुकं अपगण्डसुकं संखिन्दुएगन्तवदायसुकं ॥ १६ ॥
 अणुत्तरग्गं परमं महेसी असेसकम्मं स विसोहइत्ता ।
 सिद्धिं गए साइमणन्तपत्ते नाणेण सीलेण य दंसणेण ॥ १७ ॥
 रुक्खेसु नाए जह सामली वा जस्सि रइं वेययई सुवण्णा ।
 वणेसु वा नन्दणमाहु सेट्टं नाणेण सीलेण य भूइपन्ने ॥ १८ ॥
 थणियं व सदाण अणुत्तरे उ चन्दो व ताराण महाणुभावे ।
 गन्धेसु वा चन्दणमाहु सेट्टं एवं मुणीणं अपाडिन्नमाहु ॥ १९ ॥

जहा सयंभू उदहीण सेट्टे नागेसु वा धरणिन्दमाहु सेट्टं ।
 खोओदए वा रस वेजयन्ते तवोवहाणे मुणि वेजयन्ते ॥ २० ॥
 हत्थीसु एरावणमाहु नाए सीहो मिगाणं सलिलाण गङ्गा ।
 पक्खीसु वा गरुळे वेणुदेवो निव्वाणवादीणिह नायपुत्ते ॥ २१ ॥
 जोहेसु नाए जह वीससेणे पुप्फेसु वा जह अरविन्दमाहु ।
 खत्तीण सेट्टे जह दन्तवके इसीण सेट्टे तह वद्धमाणे ॥ २२ ॥
 दाणाण सेट्टं अभयप्पयाणं सच्चेसु वा अणवज्जं वयन्ति ।
 तवैसु वा उत्तमं वम्भचेरं लोगुत्तमे समणे नायपुत्ते ॥ २३ ॥
 ठिईण सेट्टा लवसत्तमा वा सभा सुहम्मा व सभाण सेट्टा ।
 निव्वाणसेट्टा जह सव्वधम्मा न नायपुत्ता परमत्थि नाणी ॥ २४ ॥
 पुढोवमे धुणइ विगयगेही न संनिहिं कुव्वइ आसुपन्ने ।
 तरिउं समुदं व महाभवोघं अभयंकरे वीर अणन्तचक्खू ॥ २५ ॥
 कोहं च माणं च तहेव मायं लोभं चउत्थं अज्जत्तदोसा ।
 एयाणि वन्ता अरहा महेसी न कुव्वई पाव न कारवेइ ॥ २६ ॥
 किरियाकिरियं वेणइयाणुवायं अन्नाणियाणं पडियच्च ठाणं ।
 से सव्ववायं इइ वेयइत्ता उवट्टिए संजमदीहरायं ॥ २७ ॥
 से वारिया इत्थि सराइभत्तं उवहाणवं दुक्खखयइयाए ।
 लोगं विदित्ता आरं परं च सव्वं पभू वारिय सव्ववारं ॥ २८ ॥
 सोच्चा य धम्मं अरहन्तभासियं समाहियं अट्टपदोवसुद्धं ।
 तं सदहाणा य जणा अणाऊ इन्दा व देवाहिव आगामिस्सन्ति
 ॥ २९ ॥ त्ति वेमि ॥

कुसीलपरिभासियज्जयणे सत्तमे

1 7.

पुढवी य आऊ अगणी य वाऊ तण रुक्ख वीया य तसा य पाणा ।
 जे अण्डया जे य जराउ पाणा संसेयया जे रसयाभिहाणा ॥ १॥
 एयाँ कायाँ पवेइयाँ एएसु जाणे पडिलेह सायं ।
 एएण काएण य आयदण्डे एएसु या विप्परियासुवेन्ति ॥ २ ॥
 जाइपहं अणुपरिवट्टमाणे तसथावरेहिं विणिघायमेइ ।
 से जाइ जाइ बहुकूरकम्मे जं कुव्वई भिज्जइ तेण बाले ॥ ३ ॥
 अस्सि च लोए अट्टु वा परत्था सयग्गसो वा तह अन्नहा वा ।
 संसारमावन्न परं परं ते बन्धन्ति वेयन्ति य दुब्भियाणि ॥ ४ ॥
 जे मायरं वा पियरं च हिच्चा समणव्वए अगणिं समारभिज्जा ।
 अहाहु से लोए कुसीलधम्मे भूयाँ जे हिंसइ आयसाए ॥ ५ ॥
 उज्जालओ पाण निवायएज्जा निव्वावओ अगणिं निवायवेज्जा ।
 तम्हा उ मेहावि समिक्ख धम्मं न पण्डिए अगणिं समारभिज्जा ॥ ६ ॥
 पुढवी वि जीवा आऊ वि जीवा पाणा य संपाइम संपयन्ति ।
 संसेयया कइसमास्सिया य एए दहे अगणिं समारभन्ते ॥ ७ ॥
 हरियाणि भूयाणि विलम्बगाणि आहार देहा य पुढो सियाइ ।
 जे छिन्दई आयसुहं पडुच्च पागब्भि पाणे बहुणं तिवाई ॥ ८ ॥
 जाइं च बुद्धिं च विणासयन्ते वीयाइ अस्संजय आयदण्डे ।
 अहाहु से लोए अणज्जधम्मे वीयाइ से हिंसइ आयसाए ॥ ९ ॥
 गम्भाइ भिज्जन्ति बुयावुयाणा नरा परे पञ्चसिहा कुमारा ।
 जुवाणगा मज्झिम थेरगा य चयन्ति ते आउखए पलीणा ॥ १० ॥

संवुज्झहा जन्तवो माणुसत्तं दट्ठं भयं बालिसेणं अलम्भो ।
 एगन्तदुक्खे जरिणं व लोए सकम्मुणा विप्परियासुवेइ ॥ ११ ॥
 इहेगे भूढा पवयन्ति मोक्खं आहारसंपज्जणवज्जणेणं ।
 एगे य सीओदगसेवणेणं हुएण एगे पवयन्ति मोक्खं ॥ १२ ॥
 पाओसिणाणाइसु नत्थि मोक्खो खारस्स लोणस्स अणासणेणं ।
 ते मज्जमंसं लसुणं च भोच्चा अन्नत्थ वासं परिकप्पयन्ति ॥ १३ ॥
 उदगेण जे सिद्धिसुदाहरन्ति सायं च पायं उदगं फुसन्ता ।
 उदगस्स फासेण सिया य सिद्धी सिज्झिसु पागा बहवे दगंसि ॥ १४ ॥
 मच्छा य कुम्मा य सिरीसिवा य मग्गू य उद्धा दगरक्खसा य ।
 अट्टाणमेयं कुसला वयन्ति उदगेण जे सिद्धिसुदाहरन्ति ॥ १५ ॥
 उदगं जई कम्ममलं हरेज्जा एवं सुहं इच्छामित्तमेव ।
 अन्धं व नेयारमणुस्सरित्ता पाणाणि चवं विणिहन्ति मन्दा ॥ १६ ॥
 पावाइँ कम्माइँ पक्कुव्वओ हि सिओदगं ऊ जइ तं हरेज्जा ।
 सिज्झिसु एगे दगसत्तवाइँ सुसं वयन्ते जलसिद्धिमाहु ॥ १७ ॥
 हुएण जे सिद्धिसुदाहरन्ति सायं च पायं अगणिं फुसन्ता ।
 एवं सिया सिद्धि हवेज्ज तम्हा अगणिं फुसन्ताण कुकम्मिणं पि ॥ १८ ॥
 अपारिक्ख दिट्ठं न हु एव सिद्धी एहन्ति ते वायमवुज्झमाणा ।
 भूएहि जाणं पडिलेह सायं विज्जं गहायं तसथावरोहिं ॥ १९ ॥
 थणन्ति लुप्पन्ति तसन्ति कम्मी पुढो जगा परिसंखाय भिक्खू ।
 तम्हा विऊ विरओ आयगुत्ते दट्ठं तसे या पडिसंहरेज्जा ॥ २० ॥
 जे धम्मलद्धं विणिहाय भुज्जे वियडेण साहट्ठु य जे सिणाइँ ।
 जे घोवईँ लूसयईँ व वत्थं अहाहु ते नागणियस्स दूरे ॥ २१ ॥
 कम्मं परिन्नाय दगंसि धीरे वियडेण जीवेज्ज य आदिमोक्खं ।
 से वीयकन्दाइँ अभुज्जमाणे विरए सिणाणाइसु इत्थियासु ॥ २२ ॥

जे मायरं च पियरं च हिच्चा गारं तहा पुत्तपसुं धणं च ।
 कुलाई जे धावइ साउगाई अहाहु से सामणियस्स दूरे ॥ २३ ॥
 कुलाई जे धावइ साउगाई आघाइ धम्मं उयराणुगिद्वे ।
 अहाहु से आयरियाण सयंसे जे लावएजा असणस्स हेऊ ॥ २४ ॥
 निक्खम्म दीणे परभोयणाम्मि मुहमङ्गलीए उयराणुगिद्वे ।
 नीवारगिद्वे व महावराहे अदूरए एहिइ घायमेव ॥ २५ ॥
 अन्नस्स पाणस्सिहलोइयस्स अणुप्पियं भासइ सेवमाणे ।
 पासत्थयं चेव कुमीलयं च निस्सारए होइ जहा पुलाए ॥ २६ ॥
 अन्नायपिण्डेण हियासएजा नो पूयणं तवसा आवहेजा ।
 सदेहि रूवेहि असज्जमाणं सव्वेहि कामेहि विणीय गेहिं ॥ २७ ॥
 सव्वाइ संग्गाइ अइच्च धीरे सव्वाइ दुक्खाइ तितिक्खमाणे ।
 अखिले अगिद्वे अणिएयचारी अभयंकरे भिक्खु अणाविलप्पा ॥ २८ ॥
 भारस्स जाआ मुणि भुञ्जएजा कंखेज पावस्स विवेग भिक्खू ।
 दुक्खेण पुढे धुयमाइएजा संगामसीसे व परं दमेजा ॥ २९ ॥
 अवि हम्ममाणे फलगावतटी समागमं कंखइ अन्तगस्स ।
 निधूय कम्मं न पवञ्चुवेइ अक्खक्खए वा सगडं ति वेमि ॥ ३० ॥

कुसीलपरिभासियज्जयणं सत्तमं ।

वीरियज्जयणे अट्टमे

1. 8.

दुहा वेयं सुयक्खायं वीरियं ति पवुच्चई ।
 किं नु वीरस्स वीरत्तं कहं चेयं पवुच्चई ॥ १ ॥
 कम्ममेगे पवेदेन्ति अकम्मं वा वि सुच्चया ।
 एएहिं दोहि ठाणेहिं जेहिं दीसन्ति मच्चिया ॥ २ ॥
 पमायं कम्ममाहंसु अप्पमायं तहावरं ।
 तब्भावादेसओ वा वि बालं पण्डियमेव वा ॥ ३ ॥
 सत्थमेगे तु सिक्खन्ता अइवायाय पाणिणं ।
 एगे मन्ते अहिज्जन्ति पाणभूयविहेडिणो ॥ ४ ॥
 मायिणो कट्टु माया य कामभोगे समारभे ।
 हन्ता छेत्ता पगाब्भित्ता आयसायाणुगामिणो ॥ ५ ॥
 मणसा वयसा चेव कायसा चेव अन्तसो ।
 आरओ परओ वा वि दुहा वि य असंजया ॥ ६ ॥
 वेराइं कुव्वई वेरी तओ वेरेहि रज्जई ।
 पावोवगा य आरम्मा दुक्खफासा य अन्तसो ॥ ७ ॥
 संपरायं नियच्छन्ति अत्तदुक्कडकारिणो ।
 रागदोसस्सिया बाला पावं कुव्वन्ति ते बहुं ॥ ८ ॥
 एवं सकम्मविरियं बालाणं तु पवेइय ।
 इत्तो अकम्मविरियं पण्डियाणं सुणेह मे ॥ ९ ॥
 दविए बन्धणुम्मुक्के सव्वओ छिन्नबन्धणे ।
 पणोल्ल पावगं कम्मं सल्लं कन्तइ अन्तसो ॥ १० ॥
 नेयाउयं सुयक्खायं उवायाय समीहए ।
 भुज्जो भुज्जो दुहावासं असुहत्तं तहा तहा ॥ ११ ॥

ठाणी विविहठाणाणि चइस्सन्ति न संसओ ।
 अणियए अयं वासे नायएहि सुहीहि य ॥ १२ ॥
 एवमायाय मेहावी अप्पणो गिद्धिमुद्धरे ।
 आरियं उवसंपजे सव्वधम्ममकोवियं ॥ १३ ॥
 सहसंमइए नच्चा धम्मसारं सुणेत्तु वा ।
 समुवट्टिए उ अणगारे पच्चक्खायपावए ॥ १४ ॥
 जं किंचुवक्कमं जाणे आउक्खेमस्स अप्पणो ।
 तस्सेव अन्तरा खिप्पं सिक्खं सिक्खेज्ज पण्डिए ॥ १५ ॥
 जहा कुम्मे सअङ्गाई सए देहे समाहरे ।
 एवं पावाई मेहावी अज्झप्पेण समाहरे ॥ १६ ॥
 साहरे हत्थपाए य मणं पञ्चिन्दियाणि य ।
 पावगं च परीणामं भासादोसं च तारिसं ॥ १७ ॥
 अणु माणं च मायं च तं परिन्नाय पण्डिए ।
 सायागारवणिहुए उवसन्ते निहे चरे ॥ १८ ॥
 पाणे य नाइवाएज्जा अदिन्नं पि य नायए ।
 साइयं न मुसं वूया एस धम्मे वुसीमओ ॥ १९ ॥
 अइक्कम्मन्ति वायाए मणसा वि न पत्थए ।
 सव्वओ संवुडे दन्ते आयाणं मुसमाहरे ॥ २० ॥
 कडं च कज्जमाणं च आगमिस्सं च पावगं ।
 सव्वं तं नाणुजाणन्ति आयगुत्ता जिइन्दिया ॥ २१ ॥
 जे यावुद्धा महाभागा वीरा असमत्तदंसिणो ।
 असुद्धं तेसिं परकन्तं सफलं होइ सव्वसो ॥ २२ ॥
 जे य बुद्धा महाभागा वीरा सम्मत्तदंसिणो ।
 सुद्धं तेसिं परकन्तं अफलं होइ सव्वसो ॥ २३ ॥

तेसिं पि न तवो सुद्धो निक्खन्ता जे महाकुला ।
 जं नेवन्ने वियाणन्ति न सिलोगं पवेज्जए ॥ २४ ॥
 अप्पापिण्डासि पाणासि अप्पं भासेज्ज सुव्वए ।
 खन्ते भिनिव्वुडे दन्ते वीयगिद्धी सया जए ॥ २५ ॥
 ज्ञाणजोगं समाहट्ठु कायं विउक्षेज्ज सव्वसो ।
 तितिकखं परमं नच्चा आमोक्खाए परिव्वएज्जासि ॥ २६ ॥
 त्ति वेमि ॥

वीरियज्झयणं अट्ठमं

धम्मज्झयणे नवमे

1. 9

कयरे धम्म अक्खाए माहणेण मईमया ।
 अञ्जु धम्मं जहातच्चं जिणाणं तं सुणेह मे ॥ १ ॥
 माहणा खत्तिया वेस्सा चण्डाला अदु बोक्सा ।
 एसिया वेसिया सुद्धा जे य आरम्भनिस्सिया ॥ २ ॥
 परिग्गहनिविट्ठाणं पावं तेसिं पवट्ठई ।
 आरम्भसंभिया कामा न ते दुक्खविमोयगा ॥ ३ ॥
 आघायकिच्चमाहेउं नाइओ विसएसिणो ।
 अन्ने हरन्ति तं वित्तं कम्मी कम्मेहि किच्चई ॥ ४ ॥
 माया पिया ण्हुसा भाया भज्जा पुत्ता य ओरसा ।
 नालं ते तव ताणाय लुप्पन्तस्स सकम्मुणा ॥ ५ ॥
 एयमट्ठं सपेहाए परमट्ठाणुगामियं ।
 निम्ममो निरहंकारो चरे भिक्खू जिणाहियं ॥ ६ ॥

चिच्चा वित्तं च पुत्ते य नाइओ य परिग्गहं ।
 चिच्चा णं अन्तगं सोयं निरवेक्खो परिच्चए ॥ ७ ॥
 पुढवी अगणी वाऊ तणरुक्ख सवीयगा ।
 अण्डया पोयजराऊ रससंसेयउब्भिया ॥ ८ ॥
 एएहिं छहिं काएहिं तं विज्जं परिजाणिया ।
 मणसा कायव्केणं नारम्भी न परिग्गही ॥ ९ ॥
 मुसावायं वहिद्धं च उग्गहं च अजाइया ।
 सत्थादाणाइ लोगंसि तं विज्जं परिजाणिया ॥ १० ॥
 पलिउच्चणं च भयणं च थण्डिल्लुस्सयणाणि य ।
 धूणादाणाइ लोगंसि तं विज्जं परिजाणिया ॥ ११ ॥
 धोयणं रयणं चैव वत्थीकम्मं विरेयणं ।
 वमणञ्जणपलीमंथं तं विज्जं परिजाणिया ॥ १२ ॥
 गन्धमल्लसिणाणं च दन्तपक्खालणं तहा ।
 परिग्गहित्थिकम्मं च तं विज्जं परिजाणिया ॥ १३ ॥
 उद्देसियं कीयगडं पामिच्चं चैव आहडं ।
 पूयं अणेसणिज्जं च तं विज्जं परिजाणिया ॥ १४ ॥
 आसूणिमक्खिरागं च गिद्धुववायकम्मगं ।
 उच्छोलणं च कक्कं च तं विज्जं परिजाणिया ॥ १५ ॥
 संपसारी कयकिरिए पसिणाययणाणि य ।
 सागारियं च पिण्डं च तं विज्जं परिजाणिया ॥ १६ ॥
 अट्ठावयं न सिक्खिज्जा वेहाइयं च नो वए ।
 हत्थकम्मं विवायं च तं विज्जं परिजाणिया ॥ १७ ॥
 पाणहाओ य छत्तं च नालीयं वालवीयणं ।
 परकिरियं अन्नमन्नं च तं विज्जं परिजाणिया ॥ १८ ॥

उच्चारं पासवणं हरिणसु न करे मुणी ।
 वियडेण वा वि साहट्टु नावमजे कयाइ वि ॥ १९ ॥
 परमत्ते अन्नपाणं न भुञ्जेज्ज कयाइ वि ।
 परवत्थं अचेलो वि तं विज्जं परिजाणिया ॥ २० ॥
 आसन्दी पलियङ्के य निसिज्जं च गिहन्तरे ।
 संपुच्छणं सरणं वा तं विज्जं परिजाणिया ॥ २१ ॥
 जसं कित्ति सिलोगं च जा य वन्दणपूयणा ।
 सव्वलोयंसि जे कामा तं विज्जं परिजाणिया ॥ २२ ॥
 जेणेहं निव्वहे भिक्खू अन्नपाणं तहाविहं ।
 अणुप्पयाणमन्नेसिं तं विज्जं परिजाणिया ॥ २३ ॥
 एवं उदाहु निग्गन्थे महावीरे महामुणी ।
 अणन्तनाणदंसी से धम्मं देसितवं सुयं ॥ २४ ॥
 भासमाणो न भासेज्जा नेव वम्हेज्ज मम्मयं ।
 माइट्ठाणं विवजेज्जा अणुचिन्तिय वियागरे ॥ २५ ॥
 तत्थिभा तइया भासा जं वइत्ताणुतप्पई ।
 जं छन्नं तं न वत्तव्वं एसा आणा नियण्ठिया ॥ २६ ॥
 होलावायं सहीवायं गोयावायं च नो वए ।
 तुमं तुमं ति अमणुन्नं सव्वसो तं न वत्तए ॥ २७ ॥
 अकुसीले सया भिक्खू नेव संसग्गियं भए ।
 सुहरूवा तत्थुवस्सग्गा पडिबुज्जेज्ज ते विऊ ॥ २८ ॥
 नन्नत्थ अन्तराएणं परगेहे न निसीयए ।
 गामकुमारियं किड्डं नाइवेलं हसे मुणी ॥ २९ ॥
 अणुस्सुओ उरालेसु जयमाणो परिव्वए ।
 चरियाए अप्पमत्तो पुट्ठो तत्थ हियासए ॥ ३० ॥

हम्ममाणो न कुप्पेज्ज बुच्चमाणो न संजले ।
 सुमणे अहियासेज्जा न य कोलाहलं करे ॥ ३१ ॥
 लद्धे कामे न पत्थेज्जा विवेगे एवमाहिए ।
 आयरियाइं सिक्खेज्जा बुद्धाणं अन्तिए सया ॥ ३२ ॥
 सुस्ससमाणो उवासेज्जा सुप्पन्नं सुतवस्सियं ।
 वीरा जे अत्तपन्नेसी धिइमन्ता जिइन्दिया ॥ ३३ ॥
 गिहे दीवमपासन्ता पुरिसादाणिया नरा ।
 ते वीरा बन्धणुम्मुक्का नावकंखन्ति जीवियं ॥ ३४ ॥
 अगिद्धे सद्दफासेसु आरम्भेसु अनिस्सिए ।
 सच्चं तं समयातीयं जमेयं लवियं बहु ॥ ३५ ॥
 अइमाणं च मायं च तं परिन्नाय पण्डिए ।
 गारवाणि य सच्चाणि निच्चाणं संधए सुणि ॥ ३६ ॥
 त्ति वेमि ॥

धम्मज्झयणं नवमं ॥

समाहियज्झयणे दसमे

1. 10

आघं मईमं अणुवीइ धम्मं अञ्चू समाहि तमिमं सुणेह ।
 अपडिन्न भिक्खू उ समाहिपत्ते अणियाण भूएसु परिव्वएज्जा ॥ १ ॥
 उहुं अहे यं तिरियं दिसासु तसा य जे थावर जे य पाणा ।
 हत्थेहि पाएहि य संजमित्ता अदिन्नमन्नेसु य नो गहेज्जा ॥ २ ॥
 सुयक्खायधम्मे वित्तिगिच्छतिण्णे लाटे चरे आयतुले पयासु ।
 आयं न कुज्जा इह जीवियट्ठी चयं न कुज्जा सुतवस्सि भिक्खू ॥ ३ ॥

सव्विन्दियाभिनिव्वुडे पयासु चरे मुणी सव्वउ विप्पसुक्के ।
 पामाहि पाणे य पुढो वि सत्ते दुक्खेन अट्टे पारितप्पमाणे ॥ ४ ॥
 एण्णु वाले य पक्खुवमाणे आवड्डई कम्मसु पावएसु ।
 अइवायओ कीरइ पावकम्मं निउज्जमाणे उ करेइ कम्मं ॥ ५ ॥
 आदीणवित्ती व करेइ पावं मन्ता उ एगन्तसमाहिमाहु ।
 बुद्धे समाहीय एण विवेगे पाणाइवाया विरेण ठियप्पा ॥ ६ ॥
 सव्वं जगं तू समयणुपेही पियमप्पियं कस्स वि नो करेज्जा ।
 उट्टाय दीणो य पुणो विसण्णो संपूयणं चेव सिलोयकामी ॥ ७ ॥
 आहाकडं चेव निकाममीणे नियामचारी न विसण्णमेसी ।
 इत्थीसु सत्ते य पुढो य वाले परिग्गहं चेव पक्खुवमाणे ॥ ८ ॥
 वेराणुगिद्धे निचयं करेइ इओ चुए से इहमइदुग्गं ।
 तम्हा उ मेहावि सम्भिक्ष धम्मं चरे मुणी सव्वउ विप्पसुक्के ॥ ९ ॥
 आयं न कुज्जा इह जीवियट्ठी असज्जमाणो य परिव्वएज्जा ।
 निसम्ममासी य विणीय गिद्धिं हिंसन्नियं वा न क्हं करेज्जा ॥ १० ॥
 आहाकडं वा न निकामएज्जा निकामयन्ते य न संथवेज्जा ।
 धुणे उरालं अणुवेहमाणे चिच्चा न सोयं अणवेक्खमाणो ॥ ११ ॥
 एगत्तमेयं अभिपत्थएज्जा एवं पमोक्खो न मुसं ति पासं ।
 एस प्पमोक्खो अमुसे वरे वि अकोहणे सच्चरणे तवस्सी ॥ १२ ॥
 इत्थीसु या आरय मेहुणाओ परिग्गहं चेव अक्खुवमाणे ।
 उच्चावएसुं विसएसु ताई निस्संसयं भिक्खु समाहिपत्ते ॥ १३ ॥
 अरइं रइं च अभिभूय भिक्खू तणाइफासं तह सीयफासं ।
 उण्हं च दंसं चहियासएज्जा सुब्धिं व दुब्धिं व तित्तिम्भएज्जा ॥ १४ ॥
 गुत्तो वईए य समाहिपत्तो लेसं समाहड्डु परिव्वएज्जा ।
 गिहं न छाए न वि छायेज्जा संभिस्सभावं पयहे पयासु ॥ १५ ॥

जे केइ लोगम्मि उ अकिरियाआया अन्नेण पुढा धुयमादिसन्ति ।
 आरम्मसत्ता गढिया य लोए धम्मं न जागन्ति विमोक्खहेउं ॥ १६ ॥
 पुढो य छन्दा इह माणवा उ किरियाकिरीयं च पुढो य वायं ।
 जायस्स बालस्स पकुव्व देहं पवड्ढई वेरमसंजयस्स ॥ १७ ॥
 आउक्खयं चेव अबुज्जमाणे ममाइ से साहसकारि मन्दे ।
 अहो य राओ परितप्पमाणे अट्टेसु मूढे अजराभरे व्व ॥ १८ ॥
 जहाहि वित्तं पसवो य सव्वं जे बन्धवा जे य पिया य मित्ता ।
 लालप्पई से वि य एइ मोहं अन्ने जणा तंस्सि हरन्ति वित्तं ॥ १९ ॥
 सीहं जहा खुड्ढमिगा चरन्ता दूरे चरन्ति परिसंक्रमाणा ।
 एवं तु मेहावि समिक्ख धम्मं दूरेण पावं परिवज्जएज्जा ॥ २० ॥
 संवुज्जमाणे उ नरे मईमं पात्राउ अप्पाण निवट्टएज्जा ।
 हिंसप्पसुयाइँ दुहाइँ मत्ता वेरानुवन्धीणि महब्भयाणि ॥ २१ ॥
 मुसं न वूया मुणि अत्तगामी निव्वाणमेयं कसिणं समाहिं ।
 सयं न कुज्जा न य कारवेज्जा करन्तमन्नं पि य नाणुजाणे ॥ २२ ॥
 सुद्धे सिया जाएँ न दूसएज्जा अमुच्छिण न य अज्जोववन्ने ।
 धिइमं विमुक्के न य पूयणट्ठी न सिलोयगामी य परिव्वएज्जा ॥ २३ ॥
 निक्खम्म गेहाउ निरावकंखी कायं विउस्सेज्ज नियणाळिन्ने ।
 नो जीवियं नो मरणाभिकंखी चरेज्ज भिक्खू वलया विमुक्के ॥ २४ ॥
 ति वेमि ॥

समाहियज्जयणं दसमं

मग्गज्झयणे एयारहमे

1. 11.

कयरे मग्ग अक्खाए माहणेणं मईमया ।
 जं मग्गं उज्जु पावित्ता ओहं तरइ दुत्तरं ॥ १ ॥
 जं मग्गं गुत्तरं सुद्धं सव्वदुक्खविमोक्खणं ।
 जाणासि णं जहा भिक्खू तं णो बूहि महासुणी ॥ २ ॥
 जइ णो केइ पुच्छिज्जा देवा अदुव माणुसा ।
 तेसिं तु कयरं मग्गं आइक्खेज्ज कहाहि णो ॥ ३ ॥
 जइ वो केइ पुच्छिज्जा देवा अदुव माणुसा ।
 तेसिमं पडिसाहेज्जा मग्गसारं सुणेह मे ॥ ४ ॥
 अणुपुव्वेण महाघोरं कासवेण पवेइयं ।
 जमायाय इओ पुव्वं समुद्धं ववहारिणो ॥ ५ ॥
 अतरिंसु तरन्तेगे तरिस्सन्ति अणागया ।
 तं सोच्चा पडिवक्खाभि जन्तवो तं सुणेह मे ॥ ६ ॥
 पुढवीजीवा पुढो सत्ता आउजीवा तहागणी ।
 वाउजीवा पुढो सत्ता तणरुक्खा सवीयगा ॥ ७ ॥
 अहावरा तसा पाणा एवं छकाय आहिया ।
 एयावए जीवकाए नावरे कोइ विज्जई ॥ ८ ॥
 सव्वाहिं अणुजुत्तीहिं मइमं पडिलेहिया ।
 सव्वे अकन्तदुक्खा य अओ सव्वे न हिंसया ॥ ९ ॥
 एयं खु नाणिणो सारं जं न हिंसइ कंचण ।
 अहिंसा समयं चैव एयावन्तं वियाणिया ॥ १० ॥

उहुं अहे य तिरियं जे केइ तसथावरा ।
 सव्वत्थ विरइं विज्जा सन्ति निव्वाणमाहियं ॥ ११ ॥
 पभू दोसे निराकिच्चा न विरुज्जेज्ज केण वि ।
 मणसा वयसा चेव कायसा चेव अन्तसो ॥ १२ ॥
 संवुडे से महापक्के धीरे दत्तेसणं चरे ।
 एसणासभिए निच्चं वज्जयन्ते अणेसणं ॥ १३ ॥
 भूयाइं च समारम्भ तसुदिस्सा य जं कडं ।
 तारिसं तु न गिण्हेज्जा अन्नपाणं सुसंजए ॥ १४ ॥
 पूईकम्मं न सेवेज्जा एस धम्मं वुसीमओ ।
 जं किंचि अभिकंखेज्जा सव्वसो तं न कप्पए ॥ १५ ॥
 हणन्तं नाणुजाणेज्जा आयगुत्ते जिइन्दिए ।
 ठाणाइं सन्ति सट्ठीणं गामेसु नगरेसु वा ॥ १६ ॥
 तथा गिरं समारब्भ अत्थि पुण्णं ति नो वए ।
 अहवा नत्थि पुण्णं ति एवमेयं महब्भयं ॥ १७ ॥
 दाणइया य जे पाणा हम्मन्ति तसथावरा ।
 तेसिं सारक्खणद्दाए तम्हा अत्थि त्ति नो वए ॥ १८ ॥
 जेसिं तं उवकप्पन्ति अन्नपाणं तथाविहं ।
 तेसिं लाभन्तरायं ति तम्हा नत्थि त्ति नो वए ॥ १९ ॥
 जे य दाणं पसंसन्ति वहमिच्छन्ति पाणिणं ।
 जे य णं पडिसेहन्ति वित्तिच्छेयं करन्ति ते ॥ २० ॥
 दुहुओ वि ते न भासन्ति अत्थि वा नत्थि वा पुणो ।
 आयं रयस्स हेच्चा णं निव्वाणं पाउणन्ति ते ॥ २१ ॥
 निव्वाणं परमं बुद्धा नक्खत्ताण व चन्दिमा ।
 तम्हा सया जए दन्ते निव्वाणं संधए मुणी ॥ २२ ॥

बुज्झमाणण पाणाणं किच्चन्ताण सकम्मुणा ।
 आघाइ साहु तं दीवं पइट्टेसा पबुच्चई ॥ २३ ॥
 आयगुत्ते सया दन्ते छिन्नसोए अणासवे ।
 जे धम्मं सुद्धमक्खाइ पडिपुण्णमणेत्तिसं ॥ २४ ॥
 तमेव अवियाणन्ता अबुद्धा बुद्धमाणिणो ।
 बुद्धा सो त्ति य मन्नन्ता अन्त एए समाहिए ॥ २५ ॥
 ते य वीयोदगं चव तमुद्दिस्सा य जं कडं ।
 भोच्चा ज्ञाणं झियायन्ति अखेयन्नासमाहिया ॥ २६ ॥
 जहा ढंका य कंका य कुलला मग्गुका सिही ।
 मच्छेसणं झियायन्ति ज्ञाणं ते कलुसाधमं ॥ २७ ॥
 एवं तु समणा एगे मिच्छदिट्ठी अणारिया ।
 विसएसणं झियायन्ति कंका वा कलुसाहमा ॥ २८ ॥
 सुद्धं मग्गं विराहित्ता इहमेगे उ दुम्मई ।
 उम्मग्गगया दुक्खं घायभेसन्ति तं तथा ॥ २९ ॥
 जहा आसाविणिं नावं जाइअन्धो दुरूहिया ।
 इच्छई पारमागन्तुं अन्तरा य विसीयइ ॥ ३० ॥
 एवं तु समणा एगे मिच्छदिट्ठी अणारिया ।
 सोयं कसिणमावन्ना आगन्तारो महब्भयं ॥ ३१ ॥
 इमं च धम्ममायाय कासवेण पवेइयं ।
 तरे सोयं महाघोरं अत्तत्ताए परिव्वए ॥ ३२ ॥
 विरए गामधम्मोहिं जे केइ जगई जगा ।
 तेसिं अवुत्तमायाए थामं कुव्वं परिव्वए ॥ ३३ ॥
 अइमाणं च मायं च तं परिन्नाय पण्डिए ।
 सव्वमेयं निराकिच्चा निव्वाणं संधए सुणी ॥ ३४ ॥

संधए साहुधम्मं च पावधम्मं निराकरे ।
 उवहाणवीरिए भिक्खु कोहं माणं न पत्थए ॥ ३५ ॥
 जे य बुद्धा अतिकन्ता जे य बुद्धा अगागया ।
 सन्ति तेसिं पइट्ठाणं भूयाणं जगई जहा ॥ ३६ ॥
 अह णं वयमावन्नं फासा उच्चावया फुसे ।
 न तेसु विणिहण्णेज्जा वाएण व महागिरी ॥ ३७ ॥
 संवुडे से महापन्ने धीरे दत्तेसणं चरे ।
 निव्वुडे कालमाकंखी एवं केवलिणो मयं ॥ ३८ ॥
 ति वेमि ॥

सग्गज्झयणं एयारहमं ॥

समोसरणज्झयणे वारहमे

1 12

चत्तारि समोसरणाणिमाणि पावादुया जाई पुढो वयन्ति ।
 किरियं अकिरियं विणयं ति तइयं अन्नाणमाहंसु चउत्थमेव ॥ १ ॥
 अन्नाणिया ता कुसला वि सन्ता असंथुया नो वितिगिच्छतिण्णा ।
 अकोविया आहु अकोवियेहिं अणाणुवीइत्तु मुसं वयन्ति ॥ २ ॥
 सच्चं असच्चं इति चिन्तयन्ता असाहु साहु त्ति उदाहरन्ता ।
 जेमे जणा वेणइया अणेगे पुट्टा वि भावं विणइंसु नाम ॥ ३ ॥
 अणोवसंखा इइ ते उदाहु अट्टे स ओभासइ अम्ह एवं ।
 लवावसंकी य अणागएहिं नो किरियमाहंसु अकिरियवाई ॥ ४ ॥
 संमिस्सभावं च गिरा गहीए से मुम्मई होइ अणाणुवाई ।
 इमं दुपक्खं इममेगपक्खं आहंसु छलाययणं च कम्मं ॥ ५ ॥

ते एवमक्खन्ति अवुज्झमाणा विरूवरूवाणि अकिरियवाइ ।
 जे मायइत्ता वहवे मणूया भवन्ति संसारमणोवदग्गं ॥ ६ ॥
 नाइच्चो उदेइ न अत्थमेइ न चन्दिमा वट्टइ हायई वा ।
 सलिला न सन्दन्ति न वन्ति वाया वञ्जो नियओ कसिणे हु लोए ॥७॥
 जहा हि अन्ये सह जोइणा वि रूवाइ नो पस्सइ हीणनेत्ते ।
 सन्तं पि ते एवमकिरियवाइ किरियं न पस्सन्ति निरुद्रपन्ना ॥ ८ ॥
 संवच्छरं सुविणं लक्खणं च निमित्तदेहं च उप्पाइयं च ।
 अट्टङ्गमेयं वहवे अहिता लोगांसि जाणन्ति अणागयाइं ॥ ९ ॥
 केइं निमित्ता तहिया भवन्ति केसिंचि तं विप्पडियइ नाणं ।
 ते विज्जभावं अणहिज्जमाणा आहंसु विज्जापरिमोक्खमेव ॥ १० ॥
 ते एवमक्खन्ति समिच्च लोगं तहा तहा समणा माहणा य ।
 सयंकडं नन्नकडं च दुप्पखं आहंसु विज्जाचरणं पप्पोक्खं ॥ ११ ॥
 ते चक्खु लोगांसिह नायगा उ मग्गाणुसासन्ति हियं पयाणं ।
 तहा तहा ससयजाहु लोए जंसी पया माणव संपगाढा ॥ १२ ॥
 जे रक्खसा वा जमलोइया वा जे वा सुरा गंधवा य काया ।
 आगासगामी य पुढोसिया जे पुणो पुणो विप्परियासुवेन्ति ॥ १३ ॥
 जमाहु ओहं सलिलं अपारगं जाणाहि णं भवगहणं दुमोक्खं ।
 जंसी विसण्णा विसयङ्गणाहिं दुहओ वि लोयं अणुसंचरन्ति ॥ १४ ॥
 न कम्मुणा कम्म खवेन्ति वाला अकम्मुणा कम्म खवेन्ति धीरा ।
 मेहाविणो लोभभयावड्या संतोसिणो नो पक्करेन्ति पावं ॥ १५ ॥
 ते तीयउप्पन्नमणागयाइं लोगस्स जाणन्ति तहागयाइं ।
 नेयारो अन्नेसि अणन्ननेया बुद्धा हु ते अन्तकडा भवन्ति ॥ १६ ॥
 ते नेव कुव्वन्ति न कारवेन्ति भूयाहिसंकाइ दुगुञ्छमाणा ।
 सया जया विप्पणमन्ति धीरा विन्नात्ति धीरा य हवन्ति एगे ॥ १७ ॥

डहरे य पाणे बुद्धे य पाणे ते अत्तओ पासइ सन्वलोए ।
 उव्वेहई लोगमिणं महन्तं बुद्धेपसत्तेसु परिव्वएज्जा ॥ १८ ॥
 जे आयओ परओ वा वि नच्चा अलनप्यणो होन्ति अलं परेसिं ।
 तं जोइभूयं च सयावसेज्जा जे पाउकुज्जा अणुवीइ धम्मं ॥ १९ ॥
 अत्ताण जो जाणइ जो य लोगं गइं च जो जाणइ नागइं च ।
 जो सासयं जाण असासयं च जाइं च मरगं च जणोववायं ॥ २० ॥
 अहो वि सत्ताण विउट्ठणं च जो आसवं जाणइ संवरं च ।
 दुक्खं च जो जाणइ निजरं च सो भासिउमरिहइ किरियवायं ॥ २१ ॥
 सदेसु रूवेसु असज्जमागे गन्धेसु रसेसु अटुस्समाणे ।
 नो जीवियं नो मरणाहिक्खी आयाणगुत्ते वलया विमुक्के ॥ २२ ॥
 त्ति वेमि ॥

सभोसरणज्जयणं चारहमं

आहत्तहीयज्जयणे तेरहमे

1 13

आहत्तहीयं तु पवेयइस्सं नाणप्यकारं पुरिसस्स जायं ।
 सओ य धम्मं असओ असीलं सन्ति असन्ति करिस्सामि पाउं ॥ १ ॥
 अहो य राओ य समुट्ठिएहिं तहागएहिं पडिलब्भ धम्मं ।
 समाहिमावायमजोसयन्ता सत्यारमेव फरुसं वयन्ति ॥ २ ॥
 विसोहियं ते अणुकाहयन्ते जे आयभावेण वियागरेज्जा ।
 अट्ठाणिए होइ बहूगुणाण जे नाणसंकाइ मुसं वएज्जा ॥ ३ ॥
 जे यावि पुट्ठा पलिउञ्चयन्ति आयाणमट्ठं खलु वञ्चइत्ता ।
 असाहुणो ते इह साहुमाणी मायणिण एस्सन्ति अणन्तघायं ॥ ४ ॥

जे कांहेणे होइ जयइभासी विओसियं जे उ उदीरणजा ।
 अन्ये व से दण्डपहं गहाय अत्रिओसिए धासइ पावकम्मी ॥ ५ ॥
 जे विग्गहीण अन्नायभासी न से समे होइ अज्ञञ्जपत्ते ।
 ओवायकारी य हिरीमणे य एगन्तदिही य अमाइरूवे ॥ ६ ॥
 से पेसले सुहुये पुरिसजाए जच्चकिए चेव सुउज्जुयरे ।
 वहुं पि अयुसासिए जे तहच्चा समे हु से होइ अज्ञञ्जपत्ते ॥ ७ ॥
 जे यावि अप्यं वसुभं ति मत्ता संखाय वायं अपरिक्ख कुजा ।
 तवेण वाहं सहिउ ति मत्ता अयं जणं पस्सइ विम्बभूयं ॥ ८ ॥
 एगन्तकूडेण उ से पलेइ न विज्जई रोगपयंसि गोत्ते ।
 जे माणणट्टेण विउक्खेजा वसुभन्नरेण अबुज्जमाणे ॥ ९ ॥
 जे माहणे स्वत्तियजायए वा तहुग्गपुत्ते तह लेच्छई वा ।
 जे पच्चईए परइत्तभेई गोत्ते न जे थब्भइ माणवद्धे ॥ १० ॥
 न तस्स जाई व कुलं व ताणं नन्नत्थ विजाचरणं सुचिष्णं ।
 निक्खम्म से सेवइ गारिक्खं न से पारए होइ विमोयणाए ॥ ११ ॥
 निक्किंचणे भिक्खु सुलहज्जीवी जे गारयं होइ सिलोगकामी ।
 आजीवमेयं तु अबुज्जमाणो पुणो पुणो विप्परियासुवेत्ति ॥ १२ ॥
 जे भासवं भिक्खु सुसाहुवाई पडिहाणवं होइ विसारए य ।
 आगाढपन्ने सुविभावियप्पा अन्नं जणं पन्नया परिहवेजा ॥ १३ ॥
 एवं न से होइ समाहिपत्ते जे पन्नवं भिक्खु विउक्खेजा ।
 अहवा वि जे लाहमयावलित्ते अन्नं जणं खिसइ बालपन्ने ॥ १४ ॥
 पन्नामयं चेव तवोमयं च निन्नामए गोयमयं च भिक्खू ।
 आजीवगं चेव चउत्थमाहु से पण्डिए उत्तमपोग्गले से ॥ १५ ॥
 मयाई एयाई विगिञ्च धीरा न ताणि सेवान्ति सुधीरधम्मा ।
 ते स्व्वगोत्तावगया महेसी उच्चं अगोत्तं च गतिं वयन्ति ॥ १६ ॥

भिक्खू सुयच्चे तह दिट्ठधम्मं गामं च नगरं च अणुप्पविस्सा ।
 से एसणं जाणमणेसणं च अन्नस्स पाणस्स अणाणुगिद्धे ॥ १७ ॥
 अरइं रइं च अभिभूय भिक्खू बहूजणे वा तह एगचारी ।
 एगन्तमोणेण वियागरेज्जा एगस्स जन्तो गइरागई य ॥ १८ ॥
 सयं समेच्चा अदुवा वि सोच्चा भासेज्ज धम्मं हिययं पयाणं ।
 जे गरहिया सणियाणप्पओगा न ताणि सेवन्ति मुधीरधम्मा ॥ १९ ॥
 केसिंचि तक्काइ अबुज्ज भावं खुदं पि गच्छेज्ज असद्धाणे ।
 आउस्स कालाइयारं वघाए लद्धाणुभाणे य परेसु अट्टे ॥ २० ॥
 कम्मं च छन्दं च विगिञ्च धीरे विणइज्ज ऊ लव्वउ आयभावं ।
 रूवेहि लुप्पन्ति भयावहेहिं विज्जं गहाया तसथावरोहिं ॥ २१ ॥
 न पूयणं चेव सिलोयकामी पियमप्पियं कस्सइ नो करेज्जा ।
 सव्वे अणट्टे परिवज्जयन्ते अणाउले या अकसाइ भिक्खू ॥ २२ ॥
 आहत्तहीयं समुपेहमाणे सव्वेहि पाणेहि निहाय दण्डं ।
 नो जीविथं नो मरणाहिकंसी परिव्वएज्जा वलया विमुक्के ॥ २३ ॥
 त्ति वेमि ॥

आहत्तहीयज्जयणं तेरहमं

गन्थज्जयणे चोइहमे

1. 14.

गन्थं विहाय इह सिक्खमाणो उट्ठाय सुवम्भचेरं वसेज्जा ।
 ओवायकारी विणयं सुसिक्खे जे छेय से विप्पमायं न कुज्जा ॥ १ ॥
 जहा दियापोयमपत्तजायं सावासगा पविउं मन्नमाणं ।
 तमचाइयं तरुणमपत्तजायं ढंकाइ अव्वत्तगमं हरेज्जा ॥ २ ॥

एवं तु सेहं पि अपुट्टधम्मं निस्सारियं वुसिमं मन्नमाणा ।
 दियस्स छायं व अपत्तजायं हरिसु णं पावधम्मा अणेगे ॥ ३ ॥
 ओस्साणभिच्छे मणुए समाहिं अणोसिए णन्तकरिं ति नच्चा ।
 ओभासमाणे दवियस्स वित्तं न निकसे वहिया आसुपन्नो ॥ ४ ॥
 जे ठाणओ य सयणासणे य परकमे यावि सुसाहुजुत्ते ।
 समिईसु गुत्तीसु य आयपन्ने वियागरिं ते य पुटो वएज्जा ॥ ५ ॥
 सदाणि सोच्चा अदु भेरवाणि अणासवे तेसु परिव्वएज्जा ।
 निदं च भिक्खू न पमाय कुज्जा कहंकहं वा वितिगिच्छतिण्णे ॥ ६ ॥
 उहरेण वुट्टेणशुसासिए उ राइणिण्णावि समव्वएणं ।
 सम्मं तयं थिरओ नाभिगच्छे निज्जन्तए वावि अपारए से ॥ ७ ॥
 विउट्टिएणं सनयाणुसिडे उहरेण वुट्टेण उ चोइए य ।
 अञ्चुट्टियाए घडदासिए वा अगारिणं वा समयाणुसिडे ॥ ८ ॥
 न तेसु कुज्जे न य पव्वहेज्जा न यावि किंची फरुसं वएज्जा ।
 तहा करिस्सं ति पडिस्सुणेज्जा सेयं खु मेयं न पगाय कुज्जा ॥ ९ ॥
 वणांसि मूढस्स जहा अमूढा मग्गाणुसासन्ति हियं पयाणं ।
 तेणेव सज्जं इणभेव सेयं जं मे वुहा समणुसासयन्ति ॥ १० ॥
 अह तेण मूढेण अमूढगस्स कायव्व पूया सविसेसज्जुत्ता ।
 एओवमं तत्थ उदाहु वीरे अणुगम्म अत्थं उवणेइ सम्मं ॥ ११ ॥
 नेया जहा अन्धकारंसि राओ मग्गं न जाणाइ अपस्समाणे ।
 से सूरियस्स अब्भुग्गमेणं मग्गं वियाणाइ पगासियंसि ॥ १२ ॥
 एवं तु सेहे वि अपुट्टधम्मे धम्मं न जाणाइ अवुज्जमाणे ।
 से कोविए जिणवयणेण पच्छा सूरुदेए पासइ चक्खुणेव ॥ १३ ॥
 उट्टं अहे यं तिरियं दिसासु तस्सा य जे थावर जे य पाणा ।
 सया जए तेसु परिव्वएज्जा मणप्पओसं अविकम्पमाणे ॥ १४ ॥

कालेण पुच्छे समियं पयासु आइक्खमाणो दवियस्स वित्तं ।
 तं सोयकारी य पुटो पवेसे संखा इमं केवलियं समाहिं ॥ १५ ॥
 अस्सिं सुठिच्चा तिदिहेण तायी एएसु या सन्ति निरोहमाहु ।
 ते एवमक्खन्ति तिलोगदंसी न भुज्जमेयन्ति पमायसंगं ॥ १६ ॥
 निवग्गं से भिक्खु समीहियइं पडिभागवं होइ विसारए य ।
 आयाणअग्गी वोदागमेणं उवेच्च सुद्रेण उवेइ भोक्खं ॥ १७ ॥
 मंखाइ धम्मं च वियागरन्ति बुद्धा हु ते अन्तकरा भवन्ति ।
 ते पारगा दोण्ह वि भोयणाए संसोधिंयं पण्हमुदाहरन्ति ॥ १८ ॥
 नो छायए नो वि य ल्हसएज्जा क्षाणं न सेवेज्ज पगासणं च ।
 न यावि पन्ने परिहास कुज्जा न यासियावाय वियागरेज्जा ॥ १९ ॥
 भूयाभिसंकाइ दुग्गुच्छाणो न निव्वहे मन्तपएण गोयं ।
 न किंचिभिच्छे भग्गुए पयासुं असाहुधम्माणि न संवएज्जा ॥ २० ॥
 हासं पि नो संधइ पावधम्भे ओए तईयं फरुसं वियाणे ।
 नो तुच्छए नो य विकंथइज्जा अगाइले या अकसाइ भिक्खू ॥ २१ ॥
 संकेज्ज यासंक्रियभाव भिक्खू विमज्जवायं च वियागरेज्जा ।
 भात्तादुयं धम्मसण्णुट्टियहिं वियागरेज्जा सपयासुपन्ने ॥ २२ ॥
 अणुगच्छाणो वित्तं विजाणे तहा तहा साहु अककसेणं ।
 न कत्थई भास विहिंसइज्जा निरुद्धं वा वि न दीहइज्जा ॥ २३ ॥
 समालवेज्जा पडिपुण्णभासी निमाभिया समियाअट्टदंसी ।
 आणाइ सुद्धं वयणं भिउज्जे अभिसंधए पावविवेग भिक्खू ॥ २४ ॥
 अहावुइयाइं सुसिक्खएज्जा जइज्जया नाइवेले वएज्जा ।
 से दिट्ठिं दिट्ठि न ल्हसएज्जा से जाणइ भासिउं तं समाहिं ॥ २५ ॥
 अल्हसए नो पच्छन्नभासी नो सुत्तमत्थं च करेज्ज ताई ।
 सत्थारभत्ती अणुवीइ वायं सुयं च सम्मं पडिवाययन्ति ॥ २६ ॥

से सुद्धसुत्ते उवहाणवं च धम्मं च जे विन्दइ तत्थ तत्थ ।
 आएज्जवके कुसले वियत्ते स अरिहइ भासिउं तं समाहिं ॥ २७ ॥
 ति वेमि ॥

गन्थज्झयणं चोदहमं

आयाणियज्झयणे पणरहमे

1 15.

जसईअं पडुप्पन्नं आगमिस्सं च नायओ ।
 सव्वं मन्नइ तं ताई दंसणावरणन्तए ॥ १ ॥
 अन्तए वितिगिच्छाए से जाणइ अणेलिसं ।
 अणेलिसस्स अक्खाया न से होइ तहिं तहिं ॥ २ ॥
 तहिं तहिं सुयक्खायं से य सच्चे सुआहिए ।
 सया सच्चेण संपन्ने भेत्तिं भूएहि कप्पए ॥ ३ ॥
 भूएहि न विरुज्जेजा एस धम्मे वुसीमओ ।
 वुसिमं जगं परिन्नाय अस्सिं जीवियभावणा ॥ ४ ॥
 भावणाजोगसुद्धप्पा जले नावा व आहिया ।
 नावा व तीरसंपन्ना सव्वदुक्खा तिउट्टइ ॥ ६ ॥
 तिउट्टई उ मेहावी जाणं लोगंसि पावगं ।
 तुट्टन्ति पावकम्माणि नवं कम्ममकुव्वओ ॥ ६ ॥
 अकुव्वओ नवं नत्थि कम्मं नाम विजाणइ ।
 विन्नाय से महावीरे जेण जाई न मिज्जई ॥ ७ ॥
 न मिज्जई महावीरे जस्स नत्थि पुरेकडं ।
 वाउ व्व जालमच्चेइ पिया लोगंसि इत्थियो ॥ ८ ॥

इत्थियो जे न सेवन्ति आइमोम्खा हु ते जणा ।
 ते जणा बन्धगुम्मुक्का नावकंखन्ति जीवियं ॥ ९ ॥
 जीवियं पिट्ठओ किच्चा अन्तं पावन्ति कम्मणं ।
 कम्मणा संसुहीभूया जे मग्गमणुसासई ॥ १० ॥
 अणुसासणं पुट्ठो पाणी वसुमं पूयणासु ते ।
 अणासए जए दन्ते दढे आरयमेहुणे ॥ ११ ॥
 नीवारो व न लीएज्जा छिन्नसोए अणाविले ।
 अणाइले सया दन्ते संधिं पत्ते अणेलिसं ॥ १२ ॥
 अणेलिसस्स खेयन्ने न विरुज्जेज्ज केणइ ।
 मग्गसा वयसा चैव कायसा चैव चक्खुमं ॥ १३ ॥
 से हु चक्खू मणुस्साणं जे कंखाए य अन्तए ।
 अन्तेण खुरो वहई चकं अन्तेण लोइई ॥ १४ ॥
 अन्ताणि धीरा सेवन्ति तेण अन्तकरा इह ।
 इह माणुस्सए ठाणे धम्ममाराहिउ नरा ॥ १५ ॥
 निद्धियत्ता व देवा वा उत्तरीए इयं सुयं ।
 सुयं च मेयमेगोसिं अमणुस्सेसु नो तथा ॥ १६ ॥
 अन्तं करन्ति दुक्खाणं इहमेगोसिमाहियं ।
 आघायं पुण एगोसिं दुल्लभेयं समुस्सए ॥ १७ ॥
 इओ विद्धंसमाणस्स पुणो संवोहि दुल्लहा ।
 दुल्लहाओ तहच्चाओ जे धम्मट्ठ वियागरे ॥ १८ ॥
 जे धम्मं सुद्धमक्खन्ति पट्ठिपुण्णमणेलिसं ।
 अणेलिसस्स जं ठाणं तस्स जम्मकहा कओ ॥ १९ ॥
 कओ कयाइ मेहावी उप्पज्जन्ति तहागया ।
 तहागया अप्पडिन्ना चक्खू लोगस्सणुत्तरा ॥ २० ॥

अणुत्तरे य ठाणे से कासवेण पवेइए ।
 जं किच्चा निव्वुडा एगे निट्ठं पावन्ति पण्डिया ॥ २१ ॥
 पण्डिए वीरियं लद्धं निग्वायाय पवत्तगं ।
 धुणे पुव्वकडं कम्मं नवं वा वि न कुव्वई ॥ २२ ॥
 न कुव्वई महावीरे अणुपुव्वकडं रयं ।
 रयसा संमुहीभूया कम्मं हेच्चाण जं मयं ॥ २३ ॥
 जं मयं सव्वसाहूणं तं मयं सल्लगत्तणं ।
 साहइत्ताण तं तिण्णा देवा वा अभविंसु ते ॥ २४ ॥
 अभविंसु पुरा धीरा आगमिस्सा वि सुव्वया ।
 दुन्निवोहस्स मग्गस्स अन्तं पाउकरा तिण्णे ॥ २५ ॥
 त्ति वेमि ॥

आयाणियज्झयणं पण्णरहमं

गाहज्झयणे सोळसमे

I 16

अहाह भगवं—एवं से दन्ते दविए वोसट्टकाए त्ति वच्चे माहणे
 त्ति वा १ समणे त्ति वा २ भिक्खु त्ति वा ३ निग्गन्थे त्ति वा ४ ।
 पडिआह—भन्ते क्हं नु दन्ते दविए वोसट्टकाए त्ति वच्चे माहणे त्ति वा
 समणे त्ति वा भिक्खु त्ति वा निग्गन्थे त्ति वा । तं नो बूहि महासुणी ॥
 इति विरए सव्वपावकम्मैहिं पिज्जदोसकलहं अब्भक्खाणं पेसुन्नं
 परपरिवायं अरइरइं मायाभोसं मिच्छादंसणसल्लविरए समिए साहिए
 सया जए नो कुज्जे नो माणी माहणे त्ति वच्चे ॥ १ ॥

एत्थ वि समणे अनिस्सिए अणियाणे आयाणं च अइवायं च
 मुसावायं च बहिद्धं च कोहं च माणं च मायं च लोहं च पिज्जं च

दोसं च इच्चेव जओ जओ आयाणं अप्पणो पद्दोसहेऊ तओ तओ
आयाणाओ पुव्वं पडिविए पाणाइवाया सिआ दन्ते दविए वोसट्टकाए
समणे त्ति वच्चे ॥ २ ॥

एत्थ वि भिक्खू अणुन्नए विणीए नामए दन्ते दविए वोसट्टकाए
संविधुणीय विरूवरूवे परीसहोवसग्गे अज्झप्पजोगसुद्धादाणे उवट्टिए
ठिअप्पा संखाए परदत्तभोई भिक्खु त्ति वच्चे ॥ ३ ॥

एत्थ वि निग्गन्थे एगे एगविऊ बुद्धे संछिन्नसोए सुसंजए सुस-
मिए सुसामाइए आयवायपत्ते विऊ दुहओ वि सोयपालिछिन्ने धम्मट्ठी
धम्मविऊ नियागपडिवन्ने सामियं चरे दन्ते दविए वोसट्टकाए निग्गन्थे
त्ति वच्चे ॥ ४ ॥ से एवमेव जाणह जमहं भयन्तारो ॥ त्ति बेमि ॥

गाहज्झयणं सोळसमं

पढमे सुयक्खन्धे समत्ते ॥

सूयगडं

विद्ये सुयवखन्ये

पोण्डरियज्ज्ञयणे पढमे

2. 1.

सुयं मे आउसं तेणं भगवया एवमक्खायं । इह खलु पोण्डरीए नामज्ज्ञयणे तरस णं अयमद्वे पन्नत्ते । से जहानामए पुक्खरिणी सिया बहुउदगा बहुसेया बहुपुक्खला लद्धटा पुण्डरिकिणी पासादिया दरिसणिया अभिरूवा पडिरूवा । तीसे णं पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया, अणुपुव्वुट्टिया ऊसिया रुइला वण्णमन्ता गन्धमन्ता रसमन्ता फासमन्ता पासादिया दरिसणिया अभिरूवा पडिरूवा । तीसे णं पुक्खरिणीए बहुमज्झदेसभाए एगे महं पउमवरपोण्डरीए बुइए, अणुपुव्वुट्टिए ऊसिए रुइले वण्णमन्ते गन्धमन्ते रसमन्ते फासमन्ते पासादीए जाव पडिरूवे । सव्वावन्ति च णं तीसे पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया अणुपुव्वुट्टिया ऊसिया रुइला जाव पडिरूवा । सव्वावन्ति च णं तीसे णं पुक्खरिणीए बहुमज्झदेसभाए एगे महं पउमवरपोण्डरीए बुइए अणुपुव्वुट्टिए जाव पडिरूवे ॥ १ ॥

अह पुरिसे पुरिन्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्टियं ऊसियं जाव पडिरूवं । तए णं से पुरिसे एवं वयासी-अहमंसि पुरिसे खेयन्ने कुसले पण्डिए वियत्ते मेहावी अवाले मग्गद्वे मग्गविऊ मग्गस्स गइपरिकमन्नू । अहमेयं पउमवरपोण्डरीयं उन्निक्खिस्सामि ति कड्डु इइ बुया से पुरिसे अभिकमेइ तं पुक्खरिणिं । जावं जावं च णं अभिकमेइ तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे पढमे पुरिसजाए ॥ २ ॥

अहावरे दोच्चे पुरिसजाए । अह पुरिसे दक्खिणाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्टियं पासादीयं जाव पडिरूवं । तं च एत्थ एगं पुरिसजायं पासइ पहीणतीरं अपत्तपउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णं । तए णं से पुरिसे तं पुरिसं एवं वयासी-अहो णं इमे पुरिसे अखेयन्ने अकुसले अपण्डिए अवियत्ते अमेहावी वाले नो मग्गट्ठे नो मग्गविऊ नो मग्गस्स गइपरिकमन्नू जं णं एस पुरिसे । अहमंसि खेयन्ने कुसले जाव पउमवरपोण्डरीयं उन्निक्खिस्सामि । नो य खलु एयं पउमवरपोण्डरीयं एयं उन्निक्खेयव्वं जहा णं एस पुरिसे मन्ने । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे मग्गविऊ मग्गस्स गइपरिकमन्नू, अहमेयं पउमवरपोण्डरीयं उन्निक्खिस्सामि ति कहु इइ बुया से पुरिसे अभिकमे तं पुक्खरिणिं । जावं जावं च णं अभिकमेइ तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे दोच्चे पुरिसजाए ॥ ३ ॥

अहावरे तच्चे पुरिसजाए । अह पुरिसे पच्चत्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं एगं पउमवरपोण्डरीयं अणुपुव्वुट्टियं जाव पडिरूवं । ते तत्थ दोग्णि पुरिसजाए पासइ पहीणे तीरं अपत्ते पउमवरपोण्डरीयं नो हव्वाए नो पाराए जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना अकुसला अपण्डिया अवियता अमेहावी बाला नो मग्गट्ठा नो मग्गविऊ नो मग्गस्स गइपरिकमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खिस्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे मग्गविऊ

मग्गस्स गइपरिकमन्नू अहमेयं पउमवरपोण्डरीयं उन्निक्खिस्सामि त्ति कट्ठु इति बुच्चा से पुरिसे अभिक्कमे तं पुक्खरिणिं । जावं जावं च णं अभिक्कमे तावं तावं च णं महन्ते उदए महन्ते सेए जाव अन्तरा पुक्खरिणीए सेयंसि निसण्णे तच्चे पुरिसजाए ॥ ४ ॥

अहावरे चउत्थे पुरिसजाए । अह पुरिसे उत्तराओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवर-पोण्डरीयं अणुपुब्बुट्ठियं जाव पडिरूवं । ते तत्थ तिण्णि पुरिसजाए पासइ पहीणे तीरं अपत्ते जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना जाव नो मग्गस्स गइपरिकमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खि-स्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने जाव मग्गस्स गइपरि-कमन्नू, अहमेयं पउमवरपोण्डरीयं एवं उन्निक्खिस्सामि त्ति कट्ठु इतिच्चा से पुरिसे अभिक्कमे तं पुक्खरिणिं । जावं जावं च णं अभिक्कमे तावं तावं च णं महन्ते उदए महन्ते सेए जाव निसण्णे चउत्थे पुरिसजाए ॥ ५ ॥

अह भिक्खू ल्ह्हे तीरट्ठी खेयन्ने जाव गइपरिकमन्नू अन्नयराओ दिसाओ वा अणुदिसाओ वा आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं जाव पडिरूवं । ते तत्थ चत्तारि पुरिसजाए पासइ पहीणे तीरं अपत्ते जाव पउमवरपोण्ड-रीयं नो हव्वाए नो पाराए अन्तरा पुक्खरिणीए सेयंसि निसण्णे । तए णं से भिक्खू एवं वयासी-अहो णं इमे पुरिसा अखेयन्ना जाव नो मग्गस्स गइपरिकमन्नू जं एए पुरिसा एवं मन्ने अम्हे एयं पउमवरपोण्डरीयं उन्निक्खिस्सामो, नो य खलु एयं पउमवरपोण्डरीयं एवं उन्निक्खे-यव्वं जहा णं एए पुरिसा मन्ने । अहमंसि भिक्खू ल्ह्हे तीरट्ठी खेयन्ने

जाव गइपरिक्रमन्नु अहमेयं पउमवरपोण्डरीयं उन्निक्खिस्सामि त्ति कड्डु इति वुच्चा से भिक्खू नो अभिक्रमे तं पुक्खरिणिं तीसे पुक्खरिणीए तीरे ठिच्चा सद्दं कुज्जा—उप्पयाहि खलु भो पउमवरपोण्डरीया उप्पयाहि । अह उप्पइए से पउमवरपोण्डरीए ॥ ६ ॥

किट्टिए नाए समणाउसो, अट्ठे पुण से जाणियव्वे भवइ । भन्ते त्ति समणं भगवं महावीरं निग्गन्था य निग्गन्थीओ य वन्दन्ति नमंसन्ति वन्दित्ता नमंसित्ता एवं वयासी—किट्टिए नाए समणाउसो, अट्ठं पुण से न जाणामो समणाउसो त्ति । समणे भगवं महावीरे ते य वहवे निग्गन्थे य निग्गन्थीओ य आमन्तेत्ता एवं वयासी—हन्त समणाउसो आइक्खामि विभावेभि कित्तेमि पवेएमि सअट्ठं सहेउं सनिमित्तं भुज्जो भुज्जो उवदंसेमि । से वेमि ॥ ७ ॥

लोकं च खलु मए अप्पाहड्डु समणाउसो पुक्खरिणी वुइया । कम्मं च खलु मए अप्पाहड्डु समणाउसो से उदए वुइए । कामभोगे य खलु मए अप्पाहड्डु समणाउसो से सेए वुइए । जगजाणवयं च खलु मए अप्पाहड्डु समणाउसो ते वहवे पउमवरपोण्डरीए वुइए । रायाणं च खलु मए अप्पाहड्डु समणाउसो से एगे महं पउमवरपोण्डरीए वुइए । अन्नतिथिया य खलु मए अप्पाहड्डु समणाउसो ते चत्तारि पुरिसजाया वुइया । धम्मं च खलु मए अप्पाहड्डु समणाउसो से भिक्खू वुइए । धम्मतित्थं च खलु मए अप्पाहड्डु समणाउसो से तीरे वुइए । धम्मकहं च खलु मए अप्पाहड्डु समणाउसो से सद्दे वुइए । निव्वाणं च खलु मए अप्पाहड्डु समणाउसो से उप्पाए वुइए । एवमेयं च मए अप्पाहड्डु समणाउसो से एवमेयं वुइयं ॥ ८ ॥

इह खलु पाईणं वा पडीणं वा उदीणं वा दाहिणं वा सन्तेगइया मणुस्सा भवन्ति अणुपुव्वेणं लोगं उववच्चा । तं जहा—आरिया वेगे

अणारिया वेगे उच्चागोत्ता वेगे णीयागोया वेगे कायमन्ता वेगे रहस्स-
मन्ता वेगे सुवण्णा वेगे दुव्वण्णा वेगे सुरूवा वेगे दुरूवा वेगे । तेसिं च
णं मणुयाणं एगे राया भवइ महया हिमवन्तमलयमन्दरमहिन्दसारे
अच्चन्तविसुद्धरायकुलवंसप्पभूए निरन्तररायलक्खणविराइयङ्गमङ्गे बहु-
जणवहुभाणपूइए सव्वगुणसमिद्धे खत्तिए मुदिए मुद्धाभिसित्ते माउ-
पिउसुजाए दयप्पिए सीमंकरे सीमंधरे खेमंकरे खेमंधरे मणुस्सिन्दे
जणवयपिया जणवयपुरोहिए सेउकरे केउकरे नरपवरे पुरिसपवरे पुरिस-
सीहे पुरिसआसीविसे पुरिसवरपोण्डरीए पुरिसवरगन्धहत्थी अट्टे
दित्ते वित्ते वित्थिण्णविउलभवणसयणासणजाणवाहणाइण्णे बहुधण-
वहुजायरूवरयए आओगपओगसंपउत्ते विच्छड्डियपउरभत्तपाणे बहुदासी-
दासगोमहिसगवेलगप्पभूए पडिपुण्णकोसकोडागाराउहागारे बलवं दुव्वल-
पच्चामित्ते ओहयकण्ठयं निहयकण्ठयं मलियकण्ठयं उद्धियकण्ठयं अकण्ठयं
ओहयसत्तू निहयसत्तू मलियसत्तू उद्धियसत्तू निज्जियसत्तू पराइयसत्तू
ववगयदुब्बिक्खमारिभयविप्पमुक्कं (रायवण्णओ जहा ओववाइए) जाव
पसन्तडिण्वडमरं रज्जं पसासेमाणे विहरइ । तस्स णं रन्नो परिसा भवइ-
उग्गा उग्गपुत्ता भोगा भोगपुत्ता इक्खागाइ इक्खागाइपुत्ता नाया नायपुत्ता
कोरव्वा कोरव्वपुत्ता भट्टा भट्टपुत्ता माहणा माहणपुत्ता लेच्छइ लेच्छइ-
पुत्ता पसत्थारो पसत्थपुत्ता सेणावई सेणावइपुत्ता । तेसिं च णं एग-
इए सट्ठी भवइ कामं तं समणा वा माहणा वा संपहारिंसु गमणाए ।
तत्थ अन्नयरेणं धम्मणेणं पन्नत्तारो वयं इमेणं धम्मणेणं पन्नवइस्सामो से
एवमायाणह भयन्तारो जहा मए एस धम्मो सुयक्खाए सुपन्नत्ते भवइ ।
तं जहा-उट्ठं पायतला अहे केसग्गमत्थया तिरिय तयपरियन्ते जीवे एस
आयापज्जवे कसिणे एस जीवे जीवइ, एस मए नो जीवइ, सरीरे धर-
माणे धरइ विणट्टम्मि य नो धरइ । एयं तं जीवियं भवइ, आदहणाए
परेहिं निज्जइ, अगणिज्जामिए सरीरे कवोयवण्णाणि अट्ठीणि भवन्ति,
आसन्दीपञ्चमा पुरिसा गामं पच्चागच्छन्ति, एवं असन्ते असंविज्ज-

माणे । जेसिं तं असन्ते असंविज्जमाणे तेसिं तं सुयक्खायं भवइ—अन्नो भवइ जीवो अन्नं सरीरं, तम्हा ते एवं नो विपडिवेदेन्ति—अयमाउसो आया दीहे त्ति वा हस्से त्ति वा परिण्डले त्ति वा वट्टे त्ति वा तंसे त्ति वा चउरंसे त्ति वा आयए त्ति वा छलंसिए त्ति वा अटंसे त्ति वा किण्हे त्ति वा नीले त्ति वा लोहियहालिदे त्ति वा सुक्किल्ले त्ति वा सुब्भिगन्धे त्ति वा दुब्भिगन्धे त्ति वा तित्ते त्ति वा कडुए त्ति वा कसाए त्ति वा अम्बिले त्ति वा महुरे त्ति वा कक्खडे त्ति वा मउए त्ति वा गुरुए त्ति वा लहुए त्ति वा सीए त्ति वा उसिणे त्ति वा निद्धे त्ति वा लुक्खे त्ति वा । एवं असन्ते असंविज्जमाणे । जेसिं तं सुयक्खायं भवइ—अन्नो जीवो अन्नं सरीरं, तम्हा ते नो एवं उवलब्भन्ति । से जहानामए—केइ पुरिसे कोसीओ असिं अभिनिव्वड्डित्ता णं उवदंसेज्जा अयमाउसो असी अयं कोसी, एवमेव नत्थि केइ पुरिसे अभिनिव्वड्डित्ता णं उवदंसेत्तारो अयमाउसो आया इयं सरीरं । से जहानामए—केइ पुरिसे मुज्जाओ इसियं अभिनिव्वड्डित्ता णं उवदंसेज्जा अयमाउसो मुज्जे इयं इसियं, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए—केइ पुरिसे मंसाओ अट्ठिं अभिनिव्वड्डित्ता णं उवदंसेज्जा अयमाउसो मंसे अयं अट्ठी, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए—केइ पुरिसे करयलाओ आमलकं अभिनिव्वड्डित्ता णं उवदंसेज्जा अयमाउसो करयले अयं आमलए, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए—केइ पुरिसे दहीओ नवणीयं अभिनिव्वड्डित्ता णं उवदंसेज्जा अयमाउसो नवणीयं अयं तु दही, एवमेव नत्थि केइ पुरिसे जाव सरीरं । से जहानामए—केइ पुरिसे तिलेहिन्तो तेहं अभिनिव्वड्डित्ता णं उवदंसेज्जा अयमाउसो तेहं अयं पिण्णाए, एवमेव जाव सरीरं । से जहानामए—केइ पुरिसे इम्बूओ खोयरसं अभिनिव्वड्डित्ता

णं उवदंसेजा अयमाउसो खोयरसे अयं छोए, एवमेव जाव
 सरीरं । से जहानामए—केइ पुरिमे अरणीओ अग्गि अभिनिव्वट्टित्ता णं
 उवदंसेजा अयमाउसो अरणी अयं अग्गी, एवमेव जाव सरीरं ।
 एवं असन्ते असंविज्जमाणे । जेसिं तं सुयक्खायं भवइ तं जहा—अन्नो
 जीवो अन्नं सरीरं । तम्हा ते मिच्छा ॥ से हन्ता तं हणह खणह
 छणह डहह पयह आलुम्पह विलुम्पह सहसकारेह विपरासुसह, एया-
 वया जीवे नत्थि परलोए । ते नो एवं विप्पडिवेदेन्ति, तं जहा—किरि-
 या इ वा अकिरिया इ वा सुक्कडे इ वा दुक्कडे इ वा कल्लाणे इ वा पावए इ
 वा साहु इ वा असाहु इ वा सिद्धी इ वा असिद्धी इ वा निरए इ वा
 अणिरए इ वा । एवं ते विरूवरूवेहिं कम्मसमारंभेहिं विरूवरूवाइं
 कामभोगाइं समारभन्ति भोयणाए ॥ एवं एगे पागब्भिया निक्खम्म
 मामगं धम्मं पन्नवेन्ति । तं सदहमाणा तं पत्तियमाणा तं रोएमाणा
 साहु सुयक्खाए समणे त्ति वा माहणे त्ति वा कामं खलु
 आउसो तुमं पूययामि, तं जहा—असणेण वा पाणेण वा खाइमेण वा
 साइमेण वा वत्थेण वा पडिग्गहेण वा कम्बलेण वा पायपुच्छणेण वा ।
 तत्थेगे पूयणाए समाउट्ठिसु तत्थेगे पूयणाए निकाइंसु ॥ पुव्वमेव
 तेसिं नायं भवइ—समणा भविस्सामो अणगारा अकिंचणा अपुत्ता
 अपसू परदत्तभोइणो भिक्खुणो पावं कम्मं नो करिस्सामो समुट्ठाए ।
 ते अप्पणा अप्पडिविरया भवन्ति, सयमाइयन्ति, अन्ने वि आइ-
 यावेन्ति अन्नं पि आययन्तं समणुजाणन्ति । एवमेव ते इत्थिकाम-
 भोगेहिं मुच्छिया गिद्धा गट्ठिया अज्झोववन्ना लुद्धा रागदोसवसट्ठा । ते
 नो अप्पाणं समुच्छेदेन्ति ते नो परं समुच्छेदेन्ति ते नो अन्नाइं पाणाइं
 भूयाइं जीवाइं सत्ताइं समुच्छेदेन्ति, पहीणा पुव्वसंजोगं आयरियं मग्गं
 असंपत्ता इति ते नो हव्वाए नो पाराए अन्तरा कामभोगेसु विसण्णा ।
 इति पढमे पुरिसजाए तज्जीवतच्छरीरए त्ति आहिए ॥ ९ ॥

अहावरे दोच्चे पुरिसजाए पञ्चमहब्भूइए त्ति आहिज्जइ । इह खलु पार्इणं वा ६ सन्तेगइया मणुस्सा भवन्ति अणुपुव्वेण लोयं उववन्ना, तं जहा-अरिया वेगे अणारिया वेगे एवं जाव दुरूवा वेगे । तेसिं च णं महं एगे राया भवइ इहया एवं चेव निरवसेसं जाव सेणा-वइपुत्ता । तेसिं च णं एगइए सट्ठा भवन्ति कामं तं ससणा य माहणा य पहारिंसु गमणाए । तत्थ अन्नयरेणं धम्मेणं पन्नत्तारो वयं इमेणं धम्मेणं पन्नवइस्सामो से एवमायाणह भयन्तारो जहा मए एस धम्मे सुअक्खाए सुपन्नत्ते भवइ । इह खलु पञ्चमहब्भूया जेहिं नो विज्जइ किरिया त्ति वा अकिरिया त्ति वा सुकडे त्ति वा दुकडे त्ति वा कल्लणो त्ति वा पावए त्ति वा साहु त्ति वा असाहु त्ति वा सिद्धि त्ति वा निरए त्ति वा अनिरए त्ति वा अवि अन्तसो तणमाय-मवि ॥ तं च पिहुद्वेमेणं पुढोभूयसमवायं जाणेज्जा । तं जहा पुढवी एगे महब्भूए, आऊ दुच्चे महब्भूए, तेऊ तच्चे महब्भूए, वाऊ चउत्थे महब्भूए, आगासे पञ्चमे महब्भूए । इच्चेए पञ्च महब्भूया अनिम्मिया अनिम्माविया अकडा नो कित्तिमा नो कडगा अणाइया अणिहणा अवञ्जा अपुरोहिया संतता सासया आयल्लट्ठा । पुण एगे एवमाहु-सओ नत्थि विणासो असओ नत्थि संभवो । एयावया व जीवकाए एयावया व अत्थिकाए एयावया व सव्वलोए, एयं मुहं लोगस्स करणयाए, अवि अन्तसो तणमायमवि । से किणं किणावेमाणे हणं घायमाणे पयं पयावेमाणे अवि अन्तसो पुरिसमवि कीणित्ता घायइत्ता एत्थं पि जाणाहि नत्थित्थ दोसो । ते नो एवं विप्पडिवेदेन्ति । तं जहा-किरिया इ वा जाव अनिरए इ वा । एवं ते विरूवरूवेहिं कम्म-समारंभेहिं विरूवरूवाइं कामभोगाइं समारभन्ति भोयणाए । एवमेव ते अणारिया विप्पडिवन्ना तं सदहमाणा तं पत्तियमाणा जाव ते नो हव्वाए नो पाराए अन्तरा कामभोगेसु विसण्णा । दोच्चे पुरिसजाए पञ्चमहब्भूइए त्ति आहिए ॥ १० ॥

अहावरे तच्चे पुरिसजाए ईसरकारणिए त्ति आहिज्जइ । इह खलु पड्डिणं वा ६ सन्तेगइया मणुस्सा भवन्ति अणुपुव्वेणं लोयं उववन्ना । तं जहा-आरिया वेगे जाव तेसिं च णं महन्ते एगे राया भवइ जाव सेणावइपुत्ता । तेसिं च णं एगइए सट्ठी भवइ, कामं तं समणा य माहणा य पहारिसु गमणाए जाव जहा मए एस धम्मे सुयक्खाए सुपन्नत्ते भवइ । इह खलु धम्मा पुरिसादिया पुरिसोत्तरिया पुरिसप्पणीया पुरिससंभूया पुरिसपज्जोइया पुरिसअभिसमन्नागया पुरिसमेव अभिभूय चिट्ठन्ति । से जहानामए-गण्डे सिया सरीरे जाए सरीरे संवुट्ठे सरीरे अभिसमन्नागए सरीरेमेव अभिभूय चिट्ठइ, एवमेव धम्मा पुरिसादिया जाव पुरिसमेव अभिभूय चिट्ठन्ति । से जहानामए-अरई सिया सरीरे जाया सरीरे संवुट्ठा सरीरे अभिसमन्नागया सरीरेमेव अभिभूय चिट्ठइ, एवमेव धम्मा वि पुरिसादिया जाव पुरिसमेव अभिभूय चिट्ठन्ति । से जहानामए-वम्मिए सिया पुढविजाए पुढविसंवुट्ठे पुढविअभिसमन्नागए पुढविमेव अभिभूय चिट्ठइ, पुरिसमेव अभिभूय चिट्ठन्ति । एवमेव धम्मा वि पुरिसादिया जाव से जहानामए-रुक्खे सिया पुढविजाए पुढविसंवुट्ठे पुढविअभिसमन्नागए पुढविमेव अभिभूय चिट्ठइ, एवमेव धम्मा वि पुरिसादिया जाव पुरिसमेव अभिभूय चिट्ठन्ति । से जहानामए-पुक्खरिणी सिया पुढविजाया जाव पुढविमेव अभिभूय चिट्ठइ, एवमेव धम्मा वि पुरिसादिया जाव पुरिसमेव अभिभूय चिट्ठन्ति । से जहानामए-उद्गपुक्खले सिया उद्गजाए जाव उद्गमेव अभिभूय चिट्ठइ, एवमेव धम्मा वि पुरिसादिया जाव पुरिसमेव अभिभूय चिट्ठन्ति । से जहानामए-उद्गवुव्वुए सिया उद्गजाए जाव उद्गमेव अभिभूय चिट्ठइ, एवमेव धम्मा वि पुरिसादिया जाव पुरिसमेव अभिभूय चिट्ठन्ति । जं पि य इमं समणाणं निग्गन्थाणं उदिट्ठं पणीयं वियञ्जियं दुवालसङ्गं गणिपिडगं, तं जहा-आयारो सयगडो जाव दिट्ठिवाओ, सव्वमेवं भिच्छा, न एयं तहियं न एयं आहातहियं, इमं सच्चं इमं तहियं इमं आहातहियं । ते एवं सन्नं कुव्वन्ति, ते एवं सन्नं संठवेन्ति,

ते एवं सन्नं सोवद्वन्ति । तमेवं ते तज्जाड्यं दुक्खं नाइउड्ढन्ति सउणी पञ्जरं जहा । ते नो एवं विप्पडिवेदेन्ति तं जहा—किरिया इ वा जाव अणिए इ वा, एवामेव ते विरूवरूवेहिं कम्मसमारम्भेहिं विरूवरूवाइं कामभोगाइं समारम्भन्ति भोयणाए । एवामेव ते अणारिया विप्पडिवन्ना एवं सदहभाणा जाव इति ते नो हच्चाए नो पाराए, अन्तरा कामभोगेसु विसण्णे त्ति, तच्चे पुरिसजाए ईसरकारणिए त्ति आहिए ॥ ११ ॥

अहावरे चउत्थे पुरिसजाए नियइवाइए त्ति आहिज्जइ । इह खलु पाईणं वा ६ तहेव जाव सेणावइपुत्ता वा । तेसिं च णं एगइए सद्धी भवइ, कामं तं समणा य माहणा य संपहारिंसु गमणाए जाव मए एस धम्मसे सुअक्खाए सुपन्नत्ते भवइ । इह खलु दुवे पुरिसा भवन्ति—एगे पुरिसे किरियमाइक्खइ एगे पुरिसे नोकिरियमाइक्खइ । जे य पुरिसे किरियमाइक्खइ जे य पुरिसे नोकिरियमाइक्खइ दो वि ते पुरिसा तुल्ला एगट्ठा कारणमावन्ना । वाले पुण एवं विप्पडिवेदेन्ति कारणमावन्ने—अहमंसि दुक्खामि वा सोयामि वा जूराभि वा तिप्पामि वा पीडामि वा परितप्पामि वा अहमेयमकासि, परो वा जं दुक्खइ वा सोयइ वा जूरइ वा तिप्पइ वा पीडइ वा परितप्पइ वा परो एवमकासि । एवं से वाले सकारणं वा परकारणं वा एवं विप्पडिवेदेन्ति कारणमावन्ने । मेहावी पुण एवं विप्पडिवेदेन्ति कारणमावन्ने—अहमंसि दुक्खामि वा सोयामि वा जूराभि वा तिप्पामि वा पीडामि वा परितप्पामि वा, नो अहं एवमकासि । परो वा जं दुक्खइ वा जाव परितप्पइ वा नो परो एवमकासि, एवं से मेहावी सकारणं वा परकारणं वा एवं विप्पडिवेदेन्ति कारणमावन्ने । से वेमि पाईणं वा ६ जे तसथावरा पाणा ते एवं संघायमागच्छन्ति ते एवं विप्परियासमावज्जन्ति ते एवं विवेगमागच्छन्ति ते एवं विहाणमागच्छन्ति ते एवं संगइयन्ति उवेहाए । नो एवं विप्पडिवेदेन्ति, तं जहा—किरिया इ वा जाव निरए इ वा अनिरए इ वा । एवं ते विरूवरूवेहिं कम्मसमारम्भेहिं विरूवरूवाइं कामभोगाइं समारम्भन्ति भोयणाए । एवमेव ते

अणारिया विप्पडिवन्ना तं सदहमाणा जाव इति ते नो हव्वाए नो पाराए
अन्तरा कामभोगेसु विसण्णा । चउत्थे पुरिसजाए नियइवाइए त्ति आहिए ॥
इच्चेए चत्तारि पुरिसजाया नाणापन्ना नाणाछन्दा नाणासीला नाणादिट्ठी
नाणारुई नाणारम्भा नाणाअज्झवमाणसंजुत्ता पहीणपुव्वसंजोगा आरियं
मग्गं असंपत्ता इति ते नो हव्वाए नो पाराए अन्तरा कामभोगेसु
विसण्णा ॥ १२ ॥

से वेमि पाईणं वा ६ सन्तेगइया मणुस्सा भवन्ति । तं जहा—आरिया
वेगे अणारिया वेगे उच्चागोया वेगे नीयागोया वेगे कायमन्ता वेगे
हस्समन्ता वेगे सुवण्णा वेगे दुवण्णा वेगे सुरूवा वेगे दुरूवा वेगे ।
तेसिं च णं जणजाणवयाइं परिग्गहियाइं भवन्ति, तं जहा अप्पयरा
भुज्जयरा वा । तहप्पगारेहिं कुलेहिं आगम्भ अभिभूय एगे भिक्खायरि-
याए समुट्ठिया । सओ वा वि एगे नायओ (अणायओ) य उवगरणं च
विप्पजहाय भिक्खायरियाए समुट्ठिया । असओ वा वि एगे नायओ
(अणायओ) य उवगरणं च विप्पजहाय भिक्खायरियाए समुट्ठिया ।
[जे ते सओ वा असओ वा नायओ य अणायओ य उवगरणं च विप्प-
जहाय भिक्खायरियाए समुट्ठिया] पुव्वमेवं तेहिं नायं भवइ । तं जहा—
इह खलु पुरिसे अन्नमन्नं ममट्ठाए एवं विप्पडिवेदेन्ति । तं जहा— खेत्तं
मे वत्थू मे हिरण्णं मे सुवण्णं मे धणं मे धन्नं मे कंसं मे दूसं मे विपुल-
धणकणगरयणमणिमोत्तियसंखसिलप्पवालरत्तरयणसन्तसारसावएयं मे ।
सदा मे रूवा मे गन्धा मे रसा मे फासा मे । एए खलु मे कामभोगा
अहमवि एएसिं । से मेहावी पुव्वामेव अप्पणो एवं समभिजाणेज्जा ।
तं जहा—इह खलु मम अन्नयरे दुक्खे रोगायंके समुप्पजेज्जा अणिट्ठे
अकन्ते अप्पिए असुमे अमणुत्ते अमणामे दुक्खे नो सुहे । से हन्ता भय-
न्तारो कामभोगाइं मम अन्नयरं दुक्खं रोगायंकं परियाइयह अणिट्ठं
अकन्तं अप्पियं असुभं अमणुत्तं अमणामं दुक्खं नो सुहं । ता अहं

दुक्खामि वा सोयामि वा जूरामि वा तिप्पामि वा पीडामि वा परितप्पामि वा इमाओ मे अन्नयराओ दुक्खाओ रोगायंकाओ पडिमोयह अणिट्ठाओ अकन्ताओ अप्पियाओ असुभाओ अमणुन्नाओ अमणामाओ दुक्खाओ नो सुहाओ । एवमेव नो लद्धपुच्चं भवइ । इह खलु कामभोगा नो ताणाए वा नो सरणाए वा । पुरिसे वा एगया पुच्चिं कामभोगे विप्पजहइ, काम-भोगा वा एगया पुच्चिं पुरिसं विप्पजहन्ति । अन्ने खलु कामभोगा अन्नो अहमंसि । से किमंग पुण वयं अन्नमन्नेहिं कामभोगेहिं मुच्छामो । इति संखाए णं वयं च कामभोगेहिं विप्पजहिस्सामो । से मेहावी जाणेज्जा वहिरङ्गमेयं इणमेव उवणीययरागं । तं जहा-माया मे पिया मे भाया मे भगिणी मे भज्जा मे पुत्ता मे धूया मे पेसा मे नत्ता मे सुण्हा मे सुहा मे पिया मे सहा मे सयणसंगन्थसंथुया मे । एए खलु मम नायओ अहमवि एएसिं । एवं से मेहावी पुच्चामेव अप्पणा एवं समभिजाणेज्जा । इह खलु मम अन्नयरे दुक्खे रोगायंके समुप्पजेज्जा अणिट्ठे जाव दुक्खे नो सुहे । से हंता भयन्तारो नायओ इमं मम अन्नयरं दुक्खं रोगायंकं परियाइयह अणिट्ठं जाव नो सुहं । ता अहं दुक्खामि वा सोयामि वा जाव परितप्पामि वा, इमाओ मे अन्नयराओ दुक्खाओ रोगायंकाओ परि-मोएह अणिट्ठाओ जाव नो सुहाओ, एवमेव नो लद्धपुच्चं भवइ । तेसिं वा वि भयन्ताराणं मम नाययाणं अन्नयरे दुक्खे रोगायंके समुप्पजेज्जा अणिट्ठे जाव नो सुहे, से हन्ता अहमेएसिं भयन्ताराणं नाययाणं इमं अन्नयरं दुक्खं रोगायंकं परियाइयामि अणिट्ठं जाव नो सुहे, मा मे दुक्खन्तु वा जाव मा मे परितप्पन्तु वा, इमाओ णं अन्नयराओ दुक्खाओ रोगायंकाओ परिमोएमि अणिट्ठाओ जाव नो सुहाओ, एवमेव नो लद्ध-पुच्चं भवइ । अन्नस्स दुक्खं अन्नो न परियाइयइ अन्नेण कडं अन्नो नो पडिसंवेदेइ पत्तेयं जायइ पत्तेयं मरइ पत्तेयं चयइ पत्तेयं उववज्जइ पत्तेयं झंझा पत्तेयं सन्ना पत्तेयं मन्ना एवं विन्नु वेयणा । इइ खलु नाइसंजोगा नो ताणाए वा नो सरणाए वा । पुरिसे वा एगया पुच्चिं नाइसंजोगे

विप्पजहइ, नाइसंजोगा वा एगया पुव्विं पुरिसं विप्पजहन्ति, अन्ने खलु नाइसंजोगा अन्नो अहमंसि, से किमंग पुण वयं अन्नमन्नेहिं नाइसंजोगे-हिं मुच्छामो, इति संखाए णं वयं नाइसंजोगं विप्पजहिस्सामो । से मेहावी जाणेज्जा बहिरङ्गमेयं, इणमेव उवणीययरागं । तं जहा-हत्था मे पाया मे वाहा मे उरू मे उयरं मे सीसं मे सीलं मे आऊ मे बलं मे वण्णो मे तथा मे छाया मे सोयं मे चक्खू मे घाणं मे जिब्भा मे फासा मे समाइज्जइ, वयाउ पडिज्जरइ । तं जहा-आउओ बलाओ वण्णाओ तथाओ छायाओ सोयाओ जाव फासाओ । सुसंधिओ संधी विसंधीभवइ, वलियतरंगे गाए भवइ, किण्हा केसा पलिया भवन्ति । तं जहा-जं पि य इमं सरीरगं उरालं आहारोवइयं एयं पि य अणुपुव्वेणं विप्पजहियव्वं भविस्सइ । एयं संखाए से भिक्खू भिक्खायरियाए समुट्टिए दुहओ लोगं जाणेज्जा, तं जहा-जीवा चेव अजीवा चेव, तसा चेव थावरा चेव ॥१३॥

इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, जे इमे तसा थावरा पाणा ते सयं समारभन्ति अन्नेण वि समारम्भावेति अन्नं पि समारभन्तं समणुजाणन्ति । इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, जे इमे कामभोगा सचित्ता वा अचित्ता वा ते सयं परि-गिण्हन्ति अन्नेण वि परिगिण्हावेन्ति अन्नं पि परिगिण्हन्तं समणुजाणन्ति । इह खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, अहं खलु अणारम्भे अपरिग्गहे, जे खलु गारत्था सारम्भा सपरिग्गहा, सन्तेगइया समणा माहणा वि सारम्भा सपरिग्गहा, एणसिं चेव निस्साए बम्भचेरवासं वसिस्सामो । कस्स णं तं हेउं ? जहा पुव्वं तथा अवरं जहा अवरं तथा पुव्वं, अञ्जू एए अणुवरया अणुवट्टिया पुणरवि तारिसगा चेव । जे खलु गारत्था सारम्भा सपरिग्गहा, सन्ते-गइया समणा माहणा वि सारम्भा सपरिग्गहा, दुहओ पावाइं कुव्वन्ति इति संखाए दोहि वि अन्तेहिं अदिस्समाणो इति भिक्खू रीएज्जा । से

वेमि पार्हणं वा ६ जाव एवं से परिन्नायकम्मे, एवं से ववेयकम्मे, एवं से विअन्तकारए भवइ त्ति-मक्खायं ॥ १४ ॥

तत्थ खलु भगवया छज्जीवनिकायहेऊ पन्नत्ता । तं जहा-पुटवीकाए जाव तसकाए । से जहानामए-मम अस्सायं दण्डेण वा अट्टीण वा मुट्टीण वा लेल्लण वा क्वाल्लेण वा आउट्टिज्जमाणस्स वा हम्ममाणस्स वा तज्जिज्जमाणस्स वा ताडिज्जमाणस्स वा परियाविज्जमाणस्स वा किलामिज्जमाणस्स वा उद्विज्जमाणस्स वा जाव लोमुक्खणणमायमवि हिंसाकारगं दुक्खं भयं पडिसंवेदेमि, इच्चेवं जाण सव्वे जीवा सव्वे भूया सव्वे पाणा सव्वे सत्ता दण्डेण वा जाव क्वाल्लेण वा आउट्टिज्जमाणा वा हम्ममाणा वा तज्जिज्जमाणा वा ताडिज्जमाणा वा परियाविज्जमाणा वा किलामिज्जमाणा वा उद्विज्जमाणा वा जाव लोमुक्खणणमायमवि हिंसाकारगं दुक्खं भयं पडिसंवेदेन्ति । एवं नच्चा सव्वे पाणा जाव सत्ता न हन्तव्वा न अज्जावेयव्वा न परिघेयव्वा न परितावेयव्वा न उद्वेयव्वा । से वेमि जे य अईया जे य पडुप्पन्ना जे य आगभिरसा अरिहन्ता भगवन्ता सव्वे ते एवमाइक्खन्ति एवं भासन्ति एवं पन्नवेन्ति एवं परूवेन्ति सव्वे पाणा जाव सत्ता न हन्तव्वा न परिघेयव्वा न अज्जावेयव्वा न परितावेयव्वा न उद्वेयव्वा । एस धम्मे धुवे नीइए सासए सभिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव विरए परिग्गहाओ नो दन्तपक्खाल्लेणं दन्ते पक्खाल्लेज्जा नो अज्जणं नो वमणं नो धूवणे नो तं परिआविएज्जा ॥ से भिक्खू अकिरिए अल्लसए अकोहे अमाणे अमाए अलोहे उवसन्ते परिनिव्वुडे नो आसंसं पुरओ करेज्जा इभेण मे दिट्ठेण वा सुएण वा मएण वा विन्नाएण वा इभेण वा सुचरियतव-नियमवमभचेरवासेण इभेण वा जायामायावुत्तिएणं धम्मएणं इओ चुए पेच्चा देवे सिया कामभोगाण वसवत्ती सिद्धे वा अदुक्खमसुभे एत्थ वि सिया एत्थ वि नो सिया । से भिक्खू सदेहिं अमुच्छिए रूवेहिं अमुच्छिए गन्धेहिं अमुच्छिए रसेहिं अमुच्छिए फासेहिं अमुच्छिए विरए

कोहाओ माणाओ मायाओ लोभाओ पेजाओ दोसाओ कलहाओ
 अब्भक्खाणाओ पेसुन्नाओ परपरिवायाओ अरहरईओ मायामोसाओ
 भिच्छादंसणसह्हाओ इति से महओ आयाणाओ उवसन्ते उवट्टिए
 पडिविरए से भिक्खू । जे इमे तसथावरा पाणा भवन्ति ते नो सयं
 समारम्भइ नो वन्नेहिं समारम्भावेइ अन्ने समारम्भन्ते वि न समणुजाणइ
 इति से महओ आयाणाओ उवसन्ते उवट्टिए पडिविरए से भिक्खू । जं
 पि य इमं संपराइयं कम्मं किज्जइ, नो तं सयं करेइ नो अन्नाणं कारवेइ
 अन्नं पि करेन्तं न समणुजाणइ, इति से महओ आयाणाओ उवसन्ते
 उवट्टिए पडिविरए । से भिक्खू जाणेज्जा असणं वा ४ अरिंस पडियाए
 एगं साहम्मियं समुदिसस पाणाइं भूयाइं जीवाइं सत्ताइं समारम्भ समुदिसस
 कीयं पाभिच्चं अच्छिज्जं अनिसट्ठं अभिहणं आहहुदेसियं तं चेइयं सिया
 तं (अप्पणो पुत्ताइणट्टाए जाव आएसाए पुढो पहेणाए सामासाए
 पायरासाए संनिहिसंनिचओ किज्जइ इह एएसिं माणवाणं भोयणाए)
 नो सयं भुज्जइ नो अन्नेणं भुज्जावेइ अन्नं पि भुज्जन्तं न समणुजाणइ, इति
 से महओ आयाणाओ उवसन्ते उवट्टिए पडिविरए । तत्थ भिक्खू परकडं
 परनिडियमुग्गामुप्पायणेसणासुद्धं सत्थाइयं सत्थपरिणामियं अविहिसियं
 एसियं वेसियं सामुदाणियं पत्तमसणं कारणट्टा पमाणजुत्तं अक्खोव-
 ज्जणवणलेवणभूयं संजमजायामायावत्तियं विलाभिव पन्नगभूएणं अप्पाणेणं
 आहारं आहारेज्जा अन्नं अन्नकाले पाणं पाणकाले वत्थं वत्थकाले लेणं
 लेणकाले सयणं सयणकाले । से भिक्खू मायन्ने अन्नयरं दिसं अणुदिसं
 वा पडिवन्ने धम्मं आइक्खे विभए किट्ठे उवट्टिएसु वा अणुवाट्टिएसु
 वा सुस्ससमाणेसु पवेयए, सन्तिविरइं उवसमं निव्वाणं सोयवियं
 अज्जवियं मदवियं लाववियं अणइवाइयं सव्वेसिं पाणाणं सव्वेसिं भूयाणं
 जाव सत्ताणं अणुवाइं किट्ठए धम्मं । से भिक्खू धम्मं किट्ठमाणे नो
 अन्नस्स हेउं धम्ममाइक्खेज्जा, नो पाणस्स हेउं धम्ममाइक्खेज्जा, नो
 वत्थस्स हेउं धम्ममाइक्खेज्जा, नो लेणस्स हेउं धम्ममाइक्खेज्जा, नो

सयणस्स हेउं धम्ममाइक्खेज्जा, नो अन्नोसिं विरूवरूवाणं कामभागोणं हेउं धम्ममाइक्खेज्जा, अगिलाए धम्ममाइक्खेज्जा, नन्नत्थ कम्मनिज्जर-
 ट्ठाए धम्ममाइक्खेज्जा । इह खलु तस्स भिक्खुस्स अन्तिए धम्मं सोच्चा
 निसम्म उट्ठाणेणं उट्ठाय वीरा अस्सिं धम्मं समुट्ठिया । जे तस्स भिक्खुस्स
 अन्तिए धम्मं सोच्चा निसम्म सम्मं उट्ठाणेण उट्ठाय वीरा अस्सिं धम्मं
 समुट्ठिया ते एवं सव्वोवगया ते एवं सव्वोवरया ते एवं सव्वोवसन्ता ते
 एवं सव्वत्ताए परिणिव्वुड त्ति वेमि । एवं से भिक्खू धम्मट्ठी धम्म-
 विउ नियागपाडिवन्ने से जहेयं बुइयं अदुवा पत्ते पउमवरपोण्डरीयं
 अदुवा अपत्ते पउमवरपोण्डरीयं, एवं से भिक्खू परिन्नायकम्मं परिन्नाय-
 संगे परिन्नायगेहवासे उवसन्ते समिए सहिए सयाजए । सेवं वयणिज्जे
 तं जहा-समणे त्ति वा माहणे त्ति वा खन्ते त्ति वा दन्ते त्ति वा गुत्ते
 त्ति वा मुत्ते त्ति वा इसि त्ति वा मुणि त्ति वा कइ त्ति वा विउ त्ति वा
 भिक्खु त्ति वा ल्हंहे त्ति वा तीरट्ठि त्ति वा चरणकरणपाराविउ
 त्ति वेमि ॥ १५ ॥

पोण्डरियज्झयणं पढमं

किरियाठाणज्झयणे विइये

2 2

सुयं जे आउसं तेणं भगवया एवमक्खायं । इह खलु किरियाठाणे
 नामज्झयणे पन्नत्ते, तस्स णं अयमट्ठे । इह खलु संजूहेणं दुवे ठाणे
 एवमाहिज्जन्ति । तं जहा । धम्मं चेव अधम्मं चेव उवसन्ते चेव अणुव-
 सन्ते चेव । तत्थ णं जे से पढमस्स ठाणस्स अहम्मपक्खस्स विभङ्गे
 तस्स णं अयमट्ठे पन्नत्ते । इह खलु पाईणं वा ६ सन्तेगइया मणुस्सा
 भवन्ति । तं जहा-आरिया वेगे अणारिया वेगे उच्चागोया वेगे नीया-
 गोया वेगे कायमन्ता वेगे हस्समन्ता वेगे सुवण्णा वेगे दुव्वण्णा वेगे
 सुरूवा वेगे दुरूवा वेगे । तेसिं च णं इमं एयारूवं दण्डसमादाणं

संपेहाए । तं जहा-नेरइएसु वा तिरिक्खजोगिएसु वा मयुस्सेसु वा देव्सेसु वा जे यावन्ने तहप्पगारा पाणा विन्नू वेयणं वेयन्ति ॥ तेसिं पि य णं इमाइं तेरस्स किरियाठाणाइं भवन्तीतिमक्खायं । तं जहा-अट्टादण्डे १, अणट्टादण्डे २, हिंसादण्डे ३, अकम्हादण्डे ४, दिट्ठिविपरियासिया-दण्डे ५, मोसवत्तिए ६, अदिन्नादाणवत्तिए ७, अज्झत्थवत्तिए ८, माणवत्तिए ९, मिच्चदोसवत्तिए १०, मायावत्तिए ११, लोभवत्तिए १२, इरियावहिए १३ ॥ १ ॥

पढमे दण्डसमादाणे अट्टादण्डवत्तिए त्ति आहिज्जइ । से जहा-नामए-केइ पुरिसे आथहेउं वा नाइहेउं वा अगारहेउं वा परिवारहेउं वा मिच्चहेउं वा नागहेउं वा भूयहेउं वा जक्खहेउं वा तं दण्डं तसथावरेहिं पाणेहिं सयमेव निसिरइ अन्नेण वि निसिरावेइ अन्नं पि निसिरन्तं समणुयाणइ, एवं खलु तस्स तप्पत्तियं सावज्जं ति आहिज्जइ । पढमे दण्डसमादाणे अट्टादण्डवत्तिए त्ति आहिए ॥ २ ॥

अहावरे दोच्चे दण्डसमादाणे अणट्टादण्डवत्तिए त्ति आहिज्जइ । से जहानामए-केइ पुरिसे जे इमे तसा पाणा भवन्ति ते नो अच्चाए नो अजिणाए नो मंसाए नो सोणियाए एवं हिययाए पित्ताए वसाए पिच्छाए पुच्छाए वालाए सिंगाए विसाणाए दन्ताए दाढाए नहाए प्हारुणिए अट्टीए अट्टिमज्जाए नो हिंसिसु मे त्ति नो हिंसन्ति मे त्ति नो हिंसिस्सन्ति मे त्ति नो पुत्तपोसणाए नो पसुपोसणाए नो अगार-परिवूहणयाए नो समणमाहणवत्तणाहेउं नो तस्स सरीरगस्स किंचि विप्परियाइत्ता भवन्ति । से हन्ता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं बाले वेरस्स आभागी भवइ अणट्टादण्डे । से जहा-नामए केइ पुरिसे जे इमे थावरा पाणा भवन्ति । तं जहा-इक्कडा इ वा कडिणा इ वा जन्तुगा इ वा परगा इ वा मोक्खा इ वा तणा इ वा कुसा इ वा कुच्छगा इ वा पव्वगा इ वा पलाला इ वा, ते नो पुत्तपोस-

णाए नो पसुयोसणाए नो अगारपरिवूहणयाए नो समणमाहणयोसणयाए नो तस्स सरीरगस्स किंचि विपरियाइत्ता भवन्ति । से हन्ता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं वाले वेरस्स आभागी भवइ अणट्टादण्डे ॥ से जहानामए केइ पुरिसे कच्छंसि वा दहंसि वा उदगंसि वा दवियांसि वा वलयंसि वा नूमंसि वा गहणंसि वा गहणविदुग्गंसि वा वणंसि वा वणविदुग्गंसि वा पच्चयंसि वा पच्चयविदुग्गंसि वा तणाइं ऊसत्रिय ऊसत्रिय सयमेव अगणिकायं निसिरइ अन्नेण वि अगणिकायं निसिरावेइ अन्नं पि अगणिकायं निसिरन्तं समणुजाणइ अणट्टादण्डे । एवं खलु तस्स तप्पत्तियं सावज्जं ति आहिज्जइ । दोबे दण्डसमादाणे अणट्टादण्डवत्तिए ति आहिए ॥ ३ ॥

अहावरे तच्चे दण्डासमादाणे हिंसादण्डवत्तिए ति आहिज्जइ । से जहानामए—केइ पुरिसे ममं वा ममिं वा अन्नं वा अन्निं वा हिंसिसु वा हिंसइ वा हिंसिस्सइ वा तं दण्डं तसथावरेहिं पागेहिं सयमेव निसिरइ अन्नेण वि निसिरावेइ अन्नं पि निसिरन्तं समणुजाणइ हिंसादण्डे, एवं खलु तस्स तप्पत्तियं सावज्जं ति आहिज्जइ । तच्चे दण्डसमादाणे हिंसादण्डवत्तिए ति आहिए ॥ ४ ॥

अहावरे चउत्थे दण्डसमादाणे अकम्हाइण्डवत्तिए ति आहिज्जइ । से जहानामए—केइ पुरिसे कच्छंसि वा जाव वणविदुग्गंसि वा भियवत्तिए भियसंकप्ये भियपणिहाणे भियवहाए गन्ता एए भिय ति काउं अन्नयरस्स भियस्स वहाए उसुं आयामेत्ता णं निसिरेज्जा, स भियं वहिस्सामि ति कट्टु तित्तिरं वा वट्टुगं वा चडगं वा लावगं वा कवोयगं वा कविं वा कविंजलं वा विन्धित्ता भवइ, इह खलु से अन्नस्स अट्टाए अन्नं फुसइ अकम्हादण्डे । से जहानामए केइ पुरिसे सालीणि वा वीहीणि वा कोदवाणि वा कंगूणि वा परगाणि वा रालाणि वा निलिज्जमाणे अन्नयरस्स तगस्स वहाए सत्थं निसिरेज्जा, से सामगं

तणगं कुमुदुगं वीहीऊसियं कलेसुयं तणं छिन्दिस्साभि त्ति कड्डु साल्लिं वा वीहिं वा कोद्वं वा कंगुं वा परगं वा रालयं वा छिन्दित्ता भवइ । इति खलु से अन्नस्स अट्टाए अन्नं फुसइ अकम्हादण्डे । एवं खलु तस्स तप्पत्तियं सावज्जं आहिज्जइ । चउत्थे दण्डसमादाणे अकम्हादण्डवत्तिए आहिए ॥ ५ ॥

अहावरे पञ्चमे दण्डसमादाणे दिट्ठिविपरियासियादण्डवत्तिए त्ति आहिज्जइ । से जहानामए—केइ पुरिसे माईहिं वा पिईहिं वा भाईहिं वा भगिणीहिं वा भजाहिं वा पुत्तेहिं वा धूयाहिं वा सुण्हाहिं वा सद्धिं संवसमागे भित्तं अमित्तमेव मन्नमाणे भित्ते हयपुव्वे भवइ दिट्ठिविपरियासियादण्डे । से जहानामए—केइ पुरिसे गामघायंसि वा नगरघायंसि वा खेडघायंसि कब्बडघायंसि मडंनघायंसि वा दोगमुहघायंसि वा पट्टणघायंसि वा आसमघायंसि वा संनिवेशघायंसि वा निग्गमघायंसि वा रायहाणिघायंसि वा अतेणं तेणमिति मन्नमाणे अतेणे हयपुव्वे भवइ दिट्ठिविपरियासियादण्डे । एवं खलु तस्स तप्पत्तियं सावज्जं ति आहिज्जइ । पञ्चमे दण्डसमादाणे दिट्ठिविपरियासियादण्डवत्तिए त्ति आहिए ॥ ६ ॥

अहावरे छट्ठे किरियट्टाणे भोसावत्तिए त्ति आहिज्जइ । से जहानामए—केइ पुरिसे आयहेउं वा नाइहेउं वा अगारहेउं वा परिवारहेउं वा सयमेव मुसं वयइ मुसं वयन्तं पि अन्नं समणुजाणइ, एवं खलु तस्स तप्पत्तियं सावज्जं ति आहिज्जइ । छट्ठे किरियट्टाणे भोसावत्तिए त्ति आहिए ॥ ७ ॥

अहावरे सत्तमे किरियट्टाणे अदिन्नादाणवत्तिए त्ति आहिज्जइ । से जहानामए—केइ पुरिसे आयहेउं वा जाव परिवारहेउं वा सयमेव अदिन्नं आदियइ अन्नेणं वि अदिन्नं आदियावइ अदिन्नं आदियन्तं अन्नं समणुजाणइ, एवं खलु तस्स तप्पत्तियं सावज्जं ति आहिज्जइ । सत्तमे किरियट्टाणे अदिन्नादाणवत्तिए त्ति आहिए ॥ ८ ॥

अहावरे अट्टमे किरियट्टाणे अज्झत्थवत्तिए त्ति आहिज्जइ । से जहानामए—केइ पुरिसे नत्थि णं केइ किंचि विसंवादेइ सयमेव हीणे दीणे दुट्ठे दुम्मणे ओहयमणसंकप्पे चिन्तारोगसागरसंपविट्ठे करयल-पल्हत्थमुहे अट्टज्जाणोवगए भूमिगयदिट्ठिए झियाइ, तस्स णं अज्झत्थया आसंसइया चत्तारि ठाणा एवमाहिज्जन्ति । तं जहा—कोहे माणे माया लोहे । अज्झत्थमेव कोहमाणमायालोहे । एवं खलु तस्स तप्प-त्तियं सावज्जं ति आहिज्जइ । अट्टमे किरियट्टाणे अज्झत्थवत्तिए त्ति आहिए ॥ ९ ॥

अहावरे नवमे किरियट्टाणे माणवत्तिए त्ति आहिज्जइ । से जहा-नामए—केइ पुरिसे जाइमएण वा कुलमएण वा बलमएण वा रूवमएण वा तवमएण वा सुयमएण वा लाभमएण वा इस्सरियमएण वा पन्ना-मएण वा अन्नयरेण वा मयट्टाणेणं मत्ते समाणे परं हीलेइ निन्देइ खिसइ गरहइ परिभवइ अवमन्नेइ, इत्तरिए अयं, अहमंसि पुण विसिट्ठ-जाइकुलबलाइगुणोववेए । एवं अप्पाणं समुक्कस्से, देहत्तुए कम्मविइए अवसे पयाइ । तं जहा—गब्भाओ गब्भं ४ जम्माओ जम्मं माराओ मारं नरगाओ नरगं चण्डे थट्ठे चवले माणी यावि भवइ । एवं खलु तस्स तप्पत्तियं सावज्जं ति आहिज्जइ । नवमे किरियट्टाणे माणवत्तिए त्ति आहिए ॥ १० ॥

अहावरे दसमे किरियट्टाणे भित्तदोसवत्तिए त्ति आहिज्जइ । से जहानामए—केइ पुरिसे माईहिं वा पिईहिं वा भाईहिं वा भइणीहिं वा भज्जाहिं वा धूयाहिं वा पुत्तेहिं वा सुण्हाहिं वा सट्ठिं संवसमाणे तेसिं अन्नयरंसि अहालहुगंसि अवराहंसि सयमेव गरुयं दण्डं निवत्तेइ । तं जहा—सीओ-दगवियडंसि वा कायं उच्छोलित्ता भवइ, उस्सिणोदगवियडेण वा कायं ओसिञ्चित्ता भवइ, अगणिकायेणं कायं उवडहित्ता भवइ, जोत्तेण वा वेत्तेण वा नेत्तेण वा तयाइ वा [कण्णेण वा छियाए वा] लयाए वा

(अन्नघरेण वा दवरएण) पासाई उदालिता भवइ, दण्डेण वा अट्टीण वा मुट्टीण वा लेलूण वा कवालेण वा कायं आउट्टिता भवइ । तह-
 प्यगारे पुरिसजाए संवसमाणे दुम्मणा भवइ, पवसमाणे सुमणा भवइ,
 तहप्यगारे पुरिसजाए दण्डपासी दण्डगुरूए दण्डपुरकडे अहिए इमांसि
 लोमांसि अहिए परंसि लोमांसि संजलणे कोहणे पिट्टिमंसी यावि भवइ ।
 एवं खलु तस्स तप्पत्तियं सावज्जं ति आहिज्जइ । दसमे किरियट्टाणे
 भित्तदोसवत्तिए त्ति आहिए ॥ ११ ॥

अहावरे एकारसमे किरियट्टाणे मायावत्तिए त्ति आहिज्जइ । जे इमे
 भवन्ति-गूढायारा तमोकसिया उलुगपत्तलहुया पव्वयगुरूया ते आ-
 रिया वि सन्ता अणारियाओ भासाओ वि पउज्जन्ति, अन्नहासन्तं
 अप्पाणं अन्नहा मन्नन्ति, अन्नं पुट्टा अन्नं वागरन्ति, अन्नं आइक्खि-
 यव्वं अन्नं आइक्खन्ति । से जहानामए केइ पुरिसे अन्तोसल्ले तं सल्लं
 नो सयं निहरइ नो अन्नेण निहरावेइ नो पडिविद्वंसेइ, एवमेव निण्ह-
 वेइ, अविउट्टमाणे अन्तोअन्तो रियइ, एवमेव माई मायं कट्ठु नो आलो-
 एइ नो पडिकमेइ नो निन्दइ नो गरहइ नो विउट्टइ नो विसोहेइ
 नो अकरणाए अब्भुट्टेइ नो अहारिहं तवोकम्मं पायच्छित्तं पडिवज्जइ,
 माई अस्मिं लोए पच्चायाइ माई परंसि लोए पुणो पुणो पच्चायाइ निन्दइ
 गरहइ पसंसइ निच्चरइ न नियट्टइ निसिरियं दण्डं छाएइ, माई असमा-
 हडसुहलेस्से यावि भवइ । एवं खलु तस्स तप्पत्तियं सावज्जं ति
 आहिज्जइ । एकारसमे किरियट्टाणे मायावत्तिए त्ति आहिए ॥ १२ ॥

अहावरे वारसमे किरियट्टाणे लोभवत्तिए त्ति आहिज्जइ । जे इमे
 भवन्ति, तं जहा-आरणिया आवसहिया गामन्तिया कण्हुईरहस्सिया
 नो बहुसंजया नो बहुपडिविरया सव्वपाणभूयजीवसत्तेहिं ते अप्पणो
 सच्चामोसाई एवं विउज्जन्ति । अहं न हन्तव्वो अन्ने हन्तव्वा, अहं न
 अज्जावेयव्वो अन्ने अज्जावेयव्वा, अहं न परिघेयव्वो अन्ने परिघेयव्वा,

अहं न परितवेयव्वो, अन्ने परितवेयव्वा, अहं न उद्वेयव्वो अन्ने उद्वे-
यव्वा, एवमेव ते इत्थिकामेहिं मुच्छिया गिद्धा गढिया गरहिया अज्जोववन्ना
जाव वासाइं चउपञ्चमाइं छदसमाइं अप्पयरो वा भुज्जयरो वा भुज्जित्तु
भोगभोगाइं कालमासे कालं किच्चा अन्नयरेसु आसुरिएसु किब्बिसिएसु
ठाणेसु उववत्तारो भवन्ति । तओ विप्पमुच्चमाणे भुज्जो भुज्जो एलमूय-
त्ताए तमूयत्ताए जाइसूयत्ताए पच्चायन्ति । एवं खलु तस्स तप्पत्तिर्यं
सावज्जं ति आहिज्जइ । दुवालसमे किरियट्टाणे लोभवत्तिए त्ति
आहिए । इच्चेयाइं दुवालस किरियट्टाणाइं दविएणं सवणेण वा माह-
णेण वा सम्मं सुपरिजाणियव्वाइं भवन्ति ॥ १३ ॥

अहावरे तेरसमे किरियट्टाणे ईरियावहिए त्ति आहिज्जइ । इह खलु
अत्तत्ताए संबुडस्स अणगारस्स ईरियासमियस्स भासासमियस्स एसणा-
समियस्स आयाणभण्डमत्तनिकखेवणासमियस्स उच्चारपासवणखेल-
सिंघाणजल्लपरिट्टावणियासमियस्स मणसमियस्स वयसमियस्स काय-
समियस्स मणगुत्तस्स वयगुत्तस्स कायगुत्तस्स गुत्तिन्दियस्स गुत्त-
बम्भयारिस्स आउत्तं गच्छमाणस्स आउत्तं चिट्टमाणस्स आउत्तं निसीय-
माणस्स आउत्तं तुयड्डमाणस्स आउत्तं भुज्जमाणस्स आउत्तं भासमाण-
स्स आउत्तं वत्थं पडिग्गहं कम्बलं पायपुच्छणं गिण्हमाणस्स वा
निकिखवमाणस्स वा जाव चक्खुपम्हनिवायमवि अत्थि विमाया सुहुमा
किरिया ईरियावहिया नाम कज्जइ । सा पढमसमए बद्धा पुट्टा विईय-
समए वेइया तइयसमए निज्जिण्णा सा बद्धा पुट्टा उदीरिया वेइया
निज्जिण्णा सेयकाले अकम्मे यावि भवइ । एवं खलु तस्स तप्पत्तिर्यं
सावज्जं ति आहिज्जइ, तेरसमे किरियट्टाणे ईरियावहिए त्ति आहिज्जइ ।
से वेमि जे य अईया जे य पडुपन्ना जे य आगमिस्सा अरिहन्ता भग-
वन्ता सव्वे ते एयाइं चेव तेरस किरियट्टाणाइं भासिंसु वा भासेन्ति
वा भासिस्सन्ति वा पन्नविंसु वा पन्नवेन्ति वा पन्नविस्सन्ति वा, एवं
चेव तेरसमं किरियट्टाणं सेविंसु वा सेवन्ति वा सेविस्सन्ति वा ॥ १४ ॥

अदुत्तरं च णं पुरिसविजयं विभङ्गमाइविस्सामि । इह खलु
नाणापन्नाणं नागाळन्दाणं नागासीलाणं नाणादिट्ठीणं नाणारूईणं
नाणारम्भाणं नाणज्झवसाणसंजुत्ताणं नाणाविहपावसुयज्झयणं एवं
भवइ । तं जहा—भोमं उप्पायं सुविणं अन्तलिक्खं अङ्गं सरं लक्खणं
वज्जणं इत्थिलक्खणं पुरिसलक्खणं हयलक्खणं गयलक्खणं गोग-
लक्खणं मेण्डलक्खणं कुक्कुडलक्खणं तित्तिरलक्खणं वड्डुगलक्खणं
लावयलक्खणं चकलक्खणं छत्तलक्खणं चम्मलक्खणं दण्डलक्खणं
असिलक्खणं मणिलक्खणं कागिणिलक्खणं सुभगाकरं दुब्भगाकरं
गब्भाकरं मोहणकरं आहव्वणिं पागसासणिं दव्वहोमं खत्तियविज्जं
चन्दचरियं सूरचरियं सुक्कचरियं ब्रह्मसइचरियं उक्कापायं दिसादाहं
मियचक्कं वायसयरिमण्डलं पंसुवुट्ठिं केसवुट्ठिं मंसवुट्ठिं रुहिरवुट्ठिं वेयालिं
अद्ववेयालिं ओसोवणिं तालुग्घाडणिं सोवाणिं सोवारिं दामिलिं कालिज्जिं
गोरिं गन्धारिं ओवयणिं उप्पयणिं जम्भणिं थम्भणिं लेसणिं आमय-
करणिं विसल्लकरणिं पक्कमणिं अन्तद्धानिं आयमिणिं, एवमाइयाओ
विज्जाओ अन्नस्स हेउं पउज्जन्ति पाणस्स हेउं पउज्जन्ति वत्थस्स हेउं
पउज्जन्ति लेणस्स हेउं पउज्जन्ति सयणस्स हेउं पउज्जन्ति, अब्भेसिं वा
विरूवरूवाणं कामभोगाण हेउं पउज्जति । तिरिच्छं ते विज्जं सेवन्ति, ते
अणारिया विप्पडिवन्ना कालमासे कालं किच्चा अन्नयराइं आसुरियाइं
किब्बिसयाइं ठाणाइं उव्वत्तारो भयन्ति । तओ वि विप्पमुच्चमाणा
भुज्जो एलमूययाए तमअन्धयाए पच्चायन्ति ॥ १५ ॥

से एगइओ आयहेउं वा नायहेउं वा सयणहेउं वा अणारहेउं वा
परिवारहेउं वा नायगं वा सहवासियं वा निस्साए अदुवा अणुगामिए १
अदुवा उवचरेए २ अदुवा पडिपहिए ३ अदुवा संधिच्छेयए ४
अदुवा गण्ठिच्छेयए ५ अदुवा उरब्भिए ६ अदुवा सोवरिए ७
अदुवा वागुरिए ८ अदुवा साउणिए ९ अदुवा माच्छिए १०
अदुवा गोघायए ११ अदुवा गोवालए १२ अदुवा सोवणिए १३

अदुवा सविणयान्तए १४ । एगइओ आणुगामियभावं पडिसंधाय तमेव अणुगामियाणुगामियं हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ, इति से महया पावेहिं कम्मेहिं अत्ताणं उवक्खाइत्ता भवइ । से एगइओ उवचरयभावं पडिसंधाय तमेव उवचरियं हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ । इति से पावेहिं कम्मेहिं अत्ताणं उवक्खाइत्ता भवइ । से एगइओ पाडिपहियभावं पडिसंधाय तमेव पडिपहे ठिच्चा हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ, इति से महया पावेहिं कम्मेहिं अत्ताणं उवक्खाइत्ता भवइ । से एगइओ संधिच्छेदगभावं पडिसंधाय तमेव संधिं छेत्ता भेत्ता जाव इति से महया पावेहिं कम्मेहिं अत्ताणं उवक्खाइत्ता भवइ । से एगइओ गण्ठिच्छेदगभावं पडिसंधाय तमेव गण्ठिं छेत्ता भेत्ता जाव इति से महया पावेहिं कम्मेहिं अत्ताणं उवक्खाइत्ता भवइ । से एगइओ उरब्भियभावं पडिसंधाय उरब्भं वा अन्नयरं वा तसं पाणं हन्ता जाव उवक्खाइत्ता भवइ । (एसो अभिलावो सच्चत्थ) से एगइओ सोयरियभावं पडिसंधाय महिसं वा अन्नयरं वा तसं पाणं हन्ता जाव उवक्खाइत्ता भवइ । से एगइओ वागुरियभावं पडिसंधाय मियं वा अन्नयरं वा तसं पाणं हन्ता जाव उवक्खाइत्ता भवइ । से एगइओ सउणियभावं पडिसंधाय सउणिं वा अन्नयरं वा तसं पाणं हन्ता जाव उवक्खाइत्ता भवइ । से एगइओ मच्छियभावं पडिसंधाय मच्छं वा अन्नयरं वा तसं पाणं हन्ता जाव उवक्खाइत्ता भवइ । से एगइओ गोघायभावं पडिसंधाय तमेव गोणं वा अन्नयरं वा तसं पाणं हन्ता जाव उवक्खाइत्ता भवइ । से एगइओ गोवालभावं पडिसंधाय तमेव गोवालं वा परिजविय परिजविय हन्ता जाव उवक्खाइत्ता भवइ । से एगइओ सोवणियभावं पडिसंधाय तमेव सुणगं वा अन्नयरं वा तसं पाणं हन्ता जाव उवक्खाइत्ता भवइ । से एगइओ सोवणियन्तियभावं पडिसंधाय तमेव मणुस्सं वा अन्नयरं वा तसं पाणं हन्ता जाव आहारं आहारेइ

इति से महया पावेहिं कम्मेहिं अत्ताणं उवक्खाइत्ता भवइ ॥ १६ ॥

से एगइओ परिसामञ्जाओ उट्टित्ता अहमेयं हणामि त्ति कट्टु
 त्तिचिरं वा वट्टुगं वा लावगं वा कवोयगं वा कविञ्जलं वा अन्नयरं वा
 तसं वा पाणं हन्ता जाव उवक्खाइत्ता भवइ । से एगइओ केणइ आया-
 णेणं विरुद्धे समाणे अदुवा खलदाणेणं अदुवा सुराथालएणं गाहावईण
 वा गाहावइपुत्ताण वा सयमेव अगणिकाएणं सस्साइं झामेइ अन्नेण वि
 अगणिकाएणं सस्साइं झामावेइ अगणिकाएणं सस्साइं झामन्तं पि अन्नं
 समणुजाणइ, इति से महया पावकम्मेहिं अत्ताणं उवक्खाइत्ता भवइ ।
 से एगइओ केणइ आयाणेणं विरुद्धे समाणे अदुवा खलदाणेणं अदुवा
 सुराथालएणं गाहावईण वा गाहावइपुत्ताण वा उट्टाण वा गोगाण वा
 घोडगाण वा गद्दभाग वा सयमेव घूराओ कप्पेइ अन्नेण वि कप्पवेइ
 कप्पन्तं पि अन्नं समणुजाणइ, इति से महया जाव भवइ । से एगइओ
 केणइ आयाणेणं विरुद्धे समाणे अदुवा खलदाणेणं अदुवा सुराथालएणं
 गाहावईण वा गाहावइपुत्ताण वा उट्टसालाओ वा गोगसालाओ वा
 घोडगसालाओ वा गद्दसालाओ वा कण्टकबोदियाए पडिपेहित्ता सय-
 मेव अगणिकाएणं झामेइ अन्नेण वि झामावेइ झामन्तं पि अन्नं समणु-
 जाणइ, इति से महया जाव भवइ । से एगइओ केणइ आयाणेणं विरुद्धे
 समाणे अदुवा खलदाणेणं अदुवा सुराथालएणं गाहावईण वा गाहावइ-
 पुत्ताण वा कुण्डलं वा मणिं वा मोत्तियं वा सयमेव अवहरइ अन्नेण वि
 अवहरावेइ अवहरन्तं पि अन्नं समणुजाणइ इति से महया जाव भवइ ॥
 से एगइओ केणइ वि आयाणेणं विरुद्धे समाणे अदुवा खलदाणेणं
 अदुवा सुराथालएणं समणाण वा माहणाण वा छत्तग वा दण्डगं वा
 भण्डगं वा भत्तगं वा लट्ठिं वा भिसिगं वा चेलगं वा चिलिभिलिगं वा
 चम्मय वा छेयणगं वा चम्मकोसियं वा सयमेव अवहरइ जाव समणु-
 जाणइ, इति से महया जाव उवक्खाइत्ता भवइ ॥ से एगइओ नो विति-
 गिञ्छइ । तं जहा—गाहावईण वा गाहावइपुत्ताण वा सयमेव अगणिकाएणं

ओसहीओ झामेइ जाव अन्नं पि झामन्तं समणुजाणइ, इति से महया जाव उवक्खाइत्ता भवइ । से एगइओ नो वित्तिगिञ्छइ, तं जहा—गाहावईण वा गाहावइपुत्ताण वा उट्टाण वा गोणाण वा घोडगाण वा गद्भाण वा सयमेव घूगओ कप्पेइ अन्नेण वि कप्पावेइ अन्नं पि कप्पन्त समणुजाणइ । से एगइओ नो वित्तिगिञ्छइ, तं जहा—गाहावईण वा गाहावइपुत्ताण वा उट्टसालाओ वा जाव गद्भसालाओ वा कण्टकवोदि-याहिं पडिपेहिता सयमेव अगाणिकाएणं झामेइ जाव समणुजाणइ । से एगइओ नो वित्तिगिञ्छइ, तं जहा—गाहावईण वा गाहावइपुत्ताण वा जाव मोत्तिर्यं वा सयमेव अवहरइ जाव समणुजाणइ । से एगइओ नो वित्तिगिञ्छइ तं जहा—समणाण वा माहणाण वा छत्तगं वा दण्डगं वा जाव चम्मछेयणं वा सयमेव अवहरइ जाव समणुजाणइ । इति से महया जाव उवक्खाइत्ता भवइ । से एगइओ समणं वा माहणं वा दिस्सा नाणाविहेहिं पावकम्महेहिं अत्ताणं उवक्खाइत्ता भवइ, अदुवा णं अच्छराए आत्तालिता भवइ, अदुवा णं फरुसं वदिता भवइ, कालेण वि से अणुपविट्ठस्स असणं वा पाणं वा जाव नो दवावेत्ता भवइ, जे इमे भवन्ति वोगमन्ता भारकन्ता अलसगा वसलगा किवणगा समणगा पव्वयन्ति ते इणमेव जीवियं धिजीवियं संपडिबूहेन्ति, नाइ ते परलोगस्स अट्टाए किंचि वि सिलीसन्ति, ते दुक्खन्ति ते सौयन्ति ते जूरन्ति ते तिप्पन्ति ते पिट्टन्ति ते परितप्पन्ति ते दुक्खणजूरणसोयणतिप्पणपिट्टणपरितिप्पणवहवन्धणपरिकिलेसाओ अप्पडिविरया भवन्ति । ते महया आरम्भेण ते महया समारम्भेण ते महया आरम्भसमारम्भेण विरूव-रूवेहिं पावकम्मकिच्चेहिं उरालाइं माणुस्सगाइं भोगभोगाइं भुञ्जितारो भवन्ति । तं जहा—अन्नं अन्नकाले पाणं पाणकाले वत्थं वत्थकाले लेणं लेणकाले सयणं सयणकाले सपुव्वावरं च णं प्हाए कयवलिकम्मि कय-कोउयमङ्गलपायच्छित्ते सिरसा प्हाए कण्ठमालाकडे आविद्धमणिसुवण्णे कप्पियमालामउली पडिबद्धसरीरे वग्घारियसोणिमुत्तगमहद्धामकला ५

अहयवन्थपरिहिए च्दगोविखत्तगायसरीं महइमहालियाए कूडागार-
 सालाए महइमहालयंमि सीहामणंसि इत्थीगुम्हसंपरिकडे सव्वराइएणं
 जोइणा झियायमाणेणं महयाहयनट्टगीयवाइयतन्तीतलतालतुडियघण-
 मुइंगपडुप्पवाइयरवेणं उरालाइं ऱाणुस्सगाइं भोगभोगाइं भुञ्जमाणे विह-
 रइ । तस्स णं एगमवि आणवेमाणस्स जाव चत्तारि पञ्च जणा अबुत्ता
 चेव अब्भुट्टन्ति । भणह देवाणुप्पिया किं करेमो ? किं आहरेमो ? किं
 उवणेमो ? किं आचिट्ठामो ? किं भे हियं इच्छियं ? किं भे आसगस्स
 सयइ ? तमेव पासित्ता अणारिया एवं वयन्ति—देवे खलु अयं पुरिसे,
 देवसिणाए खलु अयं पुरिसे, देवजीवणिञ्जे खलु अयं पुरिसे, अन्ने वि
 य णं उवजीवन्ति । तमेव पासित्ता आरिया वयन्ति—अभिकन्तकूक्कम्मे
 खलु अयं पुरिसे अइधुए अइयायरक्खे दाहिणगामिए नेरइए कण्ह-
 पक्खिए आगमिस्साणं दुल्लहबोहियाए यावि भविस्सइ । इच्चेयस्स ठाणस्स
 उट्टिया वेगे अभिगिज्जन्ति अणुट्टिया वेगे अभिगिज्जन्ति अभिइंझाउरो
 अभिगिज्जन्ति । एस ठाणे अणारिए अकेवले अप्पडिपुण्णे अणेयाउए
 असंसुद्धे असल्लगत्तणे आसिट्ठिमग्गे अमुत्तिमग्गे अनिच्चाणमग्गे अनि-
 ज्ञाणमग्गे असव्वदुक्खपहीणमग्गे एगन्तामिच्छे असाहु । एस खलु
 पढमस्स ठाणस्स अधम्मपक्खस्स विभङ्गे एवमाहिए ॥ १७ ॥

अहावरे दोच्चस्स ठाणस्स धम्मपक्खस्स विभङ्गे एवमाहिज्जइ ।
 इह खलु पाईणं वा पडीणं वा उदीणं वा दाहिणं वा सन्तेगइया
 मणुस्सा भवन्ति । तं जहा—आरिया वेगे अणारिया वेगे उच्चागोया
 वेगे नीयागोया वेगे कायमन्ता वेगे हस्समन्ता वेगे सुवण्णा वेगे
 दुवण्णा वेगे सुरुवा वेगे दुरुवा वेगे । तेसिं च णं खेत्तवत्थूणि
 परिग्गाहियाइं भवन्ति, एसो आलावगो जहा पोण्डरीए तहा नेयव्वो,
 तेणेव अभिलवेण जाव सव्वोवसन्ता सव्वत्ताए परिनिव्वुडे त्ति वेमि ॥
 एस ठाणे आरिए केवले जाव सव्वदुक्खपहीणमग्गे एगन्तसम्मे साहु ।
 दोच्चस्स ठाणस्स धम्मपक्खस्स विभङ्गे एवमाहिए ॥ १८ ॥

अहावरे तच्चस्म ठाणस्स मिस्सगस्स विभङ्गे एवमाहिज्जइ । जे इमे भवन्ति आरणिया आवसहिया गामणियन्तिया कण्हुईग्गहस्सिया जाव ते तओ विप्पमुच्चमाणा भुज्जो एलमूयाए तमूयत्ताए पच्चायन्ति । एम ठाणे अणारिए अकेवले जाव असव्वदुक्खपर्हाणमग्गे एगन्त-भिच्छे असाहू । एम खलु तच्चस्स ठाणस्स मिस्सगस्स विभङ्गे एव-माहिए ॥ १९ ॥

अहावरे पढमस्स ठाणस्स अधम्मपक्खस्स विभङ्गे एवमाहिज्जइ । इह खलु पाईणं वा ४ सन्तेगइया मणुस्सा भवन्ति—गिहत्था महिच्छा महारम्भा महापरिग्गहा अधम्भिया अधम्माणुया अधम्भिटा अधम्मक्खाई अधम्मपायजीविणो अधम्मपलोई अधम्मपलज्जणा अधम्मसीलसमुदायारा अधम्मेणं चैव वित्तिं कप्पेमाणा विहरन्ति । हण छिन्द मिन्द विग-त्तगा लोहियपाणी चण्डा रुदा खुदा साहस्सिया उक्कुञ्चणवञ्चणमाया-नियडिकूडकवडसाइसंपओगवहुला दुस्सीला दुव्वया दुप्पडियाणन्दा असाहू सव्वाओ पाणाइवायाओ अप्पडिविरया जावजीवाए जाव सव्वाओ परिग्गहाओ अप्पडिविरया जावजीवाए सव्वाओ कोहाओ जाव भिच्छादंसणसल्लाओ अप्पडिविरया, सव्वाओ ष्हाणुम्मदणवण्णगन्ध-विलेवणसदफरिसरसरूवगन्धमल्लालंकाराओ अप्पडिविरया जावजीवाए सव्वाओ सगडरहजाणजुग्गागिच्छिथिच्छिसियासंदंमाणियासयणासणजाण-वाहणभोगभोयणपवित्थरविहीओ अप्पडिविरया जावजीवाए सव्वाओ हिरण्णसुवण्णधणधन्मणिमोत्तियसंखसिलप्पवालाओ अप्पडिविरया जावजीवाए सव्वाओ कूडतुलकूडमाणाओ अप्पडिविरया जावजी-वाए सव्वाओ आरम्भसमारम्भाओ अप्पडिविरया जावजीवाए सव्वाओ करणकारावणाओ अप्पडिविरया जावजीवाए सव्वाओ पयणपयावणाओ अप्पडिविरया जावजीवाए सव्वाओ कुट्टणपिट्टणतज्जणताडणवहवन्ध-परिकिलेसाओ अप्पडिविरया जावजीवाओ । जे यावण्णे तहप्पगारा सावज्जा अबोहिया कम्मन्ता परपाणपरियावणकरा जे अणारिएहिं कज्जन्ति

तओ अप्पाडिविरया जावजीवाए । से जहानामए केइ पुरिसे कलम-
मसूरतिलमुग्गमासनिप्फावकुलत्थआलिसन्दगपलिसन्थगमादिएहिं अयन्ते
कूरे मिच्छादण्डं पउञ्जति, एवमेव तहप्पगारे पुरिसजाए तित्तिर-
वट्टगलावगकवोयकविञ्जलभियमहिसवराहगाहगोहकुम्मसिरिसिवमादिएहिं
अयन्ते कूरे मिच्छादण्डं पउञ्जन्ति । जा वि य से वाहिरिया परिसा
भवइ, तं जहा—दासे इ वा पेसे इ वा भयए इ वा भाइछे इ वा
कम्मकरण इ वा भोगपुरिसे इ वा तेसिं पि य णं अन्नयरसि अहालहु-
गांसि अवराहांसि सयमेव गरुयं दण्डं निवत्तेइ । त जहा—इमं दण्डेह इमं
मुण्डेह इमं तजेह इमं तालेह इमं अदुयवन्धणं करेह इमं नियलवन्धणं
करेह इमं हड्डिवन्धणं करेह इमं चारगवन्धणं करेह इमं नियलजुयल-
संकोधियमोडियं करेह इमं हत्थच्छिन्नयं करेह इमं पायच्छिन्नयं करेह
इमं कण्णच्छिन्नं करेह इमं नक्कओट्टसीसमुहच्छिन्नयं करेह वेयगच्छहियं
अङ्गच्छहियं पक्खाफोडियं करेह इमं नयणुप्पाडियं करेह इमं दंसणु-
प्पाडियं वसणुप्पाडियं जिब्भुप्पाडियं ओलम्बियं करेह घसियं करेह
घोलियं करेह सल्लाइयं करेह सल्लामिन्नयं करेह खारवत्तियं करेह वज्झ-
वत्तियं करेह सीहपुच्छियगं करेह वसभपुच्छियगं करेह दवग्गिदड्डुयङ्गं
कागणिमंसखावियङ्गं भत्तपाणनिरुद्वगं इमं जावजीवं वहवन्धणं करेह
इमं अन्नयरेण असुभेणं कुमारेणं मारेह । जा वि य से अब्भिन्तरिया
परिसा भवइ, तं जहा—माया इ वा पिया इ वा भाया इ वा भगिणी
इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं
अन्नयरंसि अहालहुगांसि अवराहांसि सयमेव गरुयं दण्डं निवत्तेइ,
सीओदगवियडंसि उच्छोलित्ता भवइ जहा भित्तदोसवत्तिए जाव अहिए
परंसि लोगांसि । ते दुक्खन्ति सोयन्ति जूरन्ति तिप्पान्ति पिट्टन्ति परि-
तप्पन्ति ते दुक्खणसोयणजूरणतिप्पणपिट्टणपरितप्पणवहवन्धणपरिकिले-
साओ अप्पाडिविरया भवन्ति । एवमेव ते इत्थिकामेहिं मुच्छिया गिद्धा
गट्टिया अज्झोववन्ना जाव वासाइं चउपञ्चमाइं छदसमाइं वा अप्पयरो

वा भुञ्जरो वा कालं भुञ्जितु भोगभोगाईं पविसुइत्ता वेराययणाईं संचि
णित्ता बहूईं पावाईं कम्माईं उस्सन्नाईं संभारकडेण कम्मुणा से जहा-
नामए अयगोले इ वा सेलगोले इ वा उदगांसि पक्खित्ते समाणे उदग-
यलमइवइत्ता अहे धरणियलपइट्ठाणे भवइ, एवमेव तहप्पगारे पुरिसजाए
वज्जवहुले धूयवहुले पङ्कवहुले वेरवहुले अप्पत्तियवहुले दम्भवहुले
नियडिबहुले साइवहुले अयसवहुले उस्सन्नतसपाणघाईं कालमासे कालं
किञ्चा धरणियलमइवइत्ता अहे नरगयलपइट्ठाणे भवइ ॥ २० ॥

ते णं नरगा अन्तो वड्ढा वाहिं चउरंसा अहे खुरप्पसंठाणसंठिया
निच्चन्धकारतमसा ववगयगहचन्दसूरनक्खत्तजोइसप्पहा भेदवसामंस-
रुहिरपूयपडलचिक्खिल्लित्ताणुलेवणयला असुईं वसिा परमदुब्भिगन्धा
कण्हा अगणिवण्णाभा कम्खडफासा दुरहियासा असुभा नरगा असुभा
नरएसु वेयणाओ ॥ नो चेव नरएसु नेरइया निदायन्ति वा पयलायन्ति
वा सुईं वा रईं वा धिईं वा मईं वा उवलभन्ते । ते णं तत्थ उज्जलं
विउलं पगाटं कडुयं कक्कसं चण्डं दुक्खं दुग्गं तिव्वं दुरहियासं नेरइया
वेयणं पच्चणुभवमाणा विहरन्ति ॥ २१ ॥

से जहानामए रुक्खे मिया पक्वयग्गे जाए मूले छिन्ने अग्गे गरुए
जओ निण्णं जओ विसमं जओ दुग्गं तओ पवडइ, एवामेव तहप्पगारे
पुरिसजाए गब्भाओ गब्भं जम्माओ जम्मं माराओ मारं नरगाओ नरगं
दुक्खाओ दुक्खं दाहिणगामिए नेरइए कण्हपक्खिए आगामिस्साणं दुल्लह-
बोहिए याचि भवइ । एस ठाणे अणारिए अकेवले जाव असव्व-
दुक्खपहमिणग्गे एगन्तमिच्छे असाहू । पढमस्स ठाणस्स अधम्म-
पक्खस्स विभङ्गे एवमाहिए ॥ २२ ॥

अहावरे दोच्चस्स ठाणस्स धम्मपक्खस्स विभङ्गे एवमाहिज्जइ । इह
खलु पाईणं वा ४ सन्तेगइया मणुस्सा भवन्ति । तं जहा-अणारम्भा अप-
रिग्गहा धम्मिया धम्माणुगा धम्मिडा जाव धम्मेणं चेव वित्तिं कप्पेमाणा

विहरन्ति, सुसीला सुव्वया सुप्पडियाणन्दा सुसाहू सव्वओ पाणाइवा-
याओ पडिविरया जावज्जीवाए जाव जे यावन्ने तहप्पगारा सावज्जा अवोहिया
कम्मन्ता परपाणपरियावणकरा कज्जन्ति तओ वि पडिविरया जाव
ज्जीवाए ॥ से जहानामए—अणगारा भगवन्तो ईरियासमिया भासासमिया
एसणासमिया आयाणभण्डमत्तनिक्खेवणसमिया उचारपासवणखेलसिं-
घाणजल्लपरिट्ठावणियासमिया मणसमिया वयसमिया कायसमिया मण-
गुत्ता वयगुत्ता कायगुत्ता गुत्ता गुत्तिन्दिया गुत्तवरभयारी अकोहा अमाणा
अमाया अलोभा सन्ता पसन्ता उवसन्ता परिनिव्वुडा अणासवा अग्गन्था
छिन्नसोया निरुव्वेवा कंसपाइ व्व मुकतोया संखो इव निरञ्जणा जीव इव
अपडिहियगई गगणतलं पिव निरालम्बणा वाउरिव अपडिवद्धा सारद-
सलिलं व सुद्धहियया पुक्खरपत्तं व निरुव्वेवा कुम्मो इव गुत्तिन्दिया
विहग इव विप्पमुक्का खग्गिविसाणं व एगजाया भारुण्डपक्खी व अप्प-
मत्ता कुञ्जरो इव सोण्डीरा वसभो इव जायत्थामा सीहो इव दुद्धरिसा
मन्दरो इव अप्पकम्पा सागरो इव गम्भीरा चन्दो इव सोमलेसा सूरु
इव दित्ततेया जच्चकच्चणगं व जायरूवा वसुंधरा इव सव्वफासविसहा
सुहुयहुयासणो विय तेयसा जलन्ता । नत्थि णं तेसिं भगवन्ताणं कत्थ
वि पडिवन्धे भवइ । से पडिवन्धे चउव्विहे पन्नते । तं जहा—अण्डए इ वा
पोयए इ वा उग्गहे इ वा पग्गहे इ वा जं णं जं णं दिसं इच्छन्ति तं णं तं णं
दिसं अपडिवद्धा सुइभूया लहुभूया अप्पगन्था संजमेणं तवसा अप्पाणं
भावेमाणा विहरन्ति ॥ तेसिं णं भगवन्ताणं इमा एयारूवा जायामायाविच्ची
होत्था । तं जहा—चउत्थे भत्ते छट्ठे भत्ते अट्ठमे भत्ते दसमे भत्ते दुवालसमे
भत्ते चउदसमे भत्ते अद्धमासिए भत्ते मासिए भत्ते दोमासिए तिमासिए
चाउम्मासिए पञ्चमासिए छम्मासिए अटुत्तरं च णं उक्खित्तचरया-
निक्खित्तचरया उक्खित्तनिक्खित्तचरया अन्तचरगा पन्तचरगा ल्हचरगा
समुदाणचरगा संसट्ठचरगा असंसट्ठचरगा तज्जायसंसट्ठचरगा दिट्ठलाभिया
अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खलाभिया

अन्नायचरगा उवनिहिया संखादात्तिया परिभियपिण्डवाइया सुद्वेसणिया
 अन्ताहारा पन्ताहारा अरसाहारा विरसाहारा ल्हाहारा तुच्छाहारा अन्तजीवी
 पन्तजीवी आयम्बिलिया पुरिमड्डिया निव्विगइया अमज्जमंसासिणो नो
 नियामरसभोई ठाणाइया पडिमाठाणाइया उक्कडुआसणिया नेसज्जिया
 वीरासणिया दण्डायइया लगण्डसाइणो अप्पाउडा अगत्तया अक्कण्डुया
 अणिदुहा (एवं जहोववाइए) धुयकेसमंसुरोमनहा सव्वगायपाडिकम्म-
 विप्पमुक्का चिद्वन्ति । ते णं एणं विहारेणं विहरमाणा बहूइं वासाइं
 सामन्नपरियागं पाउणन्ति २ बहुबहु आवाहांसि उप्पन्नंसि वा अणुप्पन्नं-
 सि वा बहूइं भत्ताइं पच्चक्खन्ति पच्चक्खाइत्ता बहूइं भत्ताइं अणसणाए
 छेदेन्ति, अणसणाए छेदित्ता जस्सडाए कीरइ नग्गभावे मुण्डभावे अण्हा-
 णभावे अदन्तवणगे अछत्तए अणोवाहणए भूमिसेज्जा फलगसेज्जा कट-
 सेज्जा केसलोए बम्भचेरवासे परघरपवेसे लद्धावलद्धे माणावमाणणाओ
 हीलणाओ निन्दणाओ खिंसणाओ गरहणाओ तज्जणाओ तालणाओ
 उच्चावया गामकण्टगा बावीसं परीसहोवसग्गा अहियासिज्जन्ति तमइं
 आराहेन्ति तमइं आराहित्ता चरमेहिं उस्सासनिस्सासेहिं अणन्तं अणुत्तरं
 निव्वाघायं निरावरणं कसिणं पाडिपुण्णं केवलवरणाणदंसणं समुप्पाडेन्ति,
 समुप्पाडित्ता तओ पच्छा सिज्जन्ति बुज्जन्ति मुच्चन्ति परिणिव्वायन्ति
 सव्वदुक्खाणं अन्तं करन्ति । एगच्चाए पुण एगे भयन्तारो
 भवन्ति, अवरे पुण पुव्वकम्मावसेसेणं कालमासे कालं
 किच्चा अन्नयरेसु देवलोएसु देवत्ताए उववत्तारो भवन्ति । तं
 जहा-महाड्डिएसु महज्जुइएसु महापरकमेसु महाजसेसु महाबलेसु
 महाणुभावेसु महासुक्खेसु । ते णं तत्थ देवा भवन्ति महड्डिया मह-
 ज्जुइया जाव महासुक्खा हारविराइयवच्छा कडगतुडियथम्भिभयुया
 अङ्गयक्कुण्डलमट्टगण्डयलकण्णपीढधारी विचित्तहत्थाभरणा विचित्तमाला-
 मउलिमउडा कल्लाणगन्धपवरवत्थपरिहिया कल्लाणगपवरमल्लाणुलेवण-
 धरा भासुरबोंदी पलम्भवणमालाधरा दिव्वेणं रूवेणं दिव्वेणं वण्णेणं

दिव्वेणं गन्धेणं दिव्वेणं फासेणं दिव्वेणं संवाएणं दिव्वेणं संठाणेणं दिव्वाए इड्डीए दिव्वाए जुईए दिव्वाए पभाए दिव्वाए छायाए दिव्वाए अच्चाए दिव्वेणं तेएणं दिव्वाए लेसाए दस दिसाओ उज्जोवे-
माणा पभासेमाणा गइकल्लाणा ठिइकल्लाणा आगमेसिभइया यावि भवन्ति । एस ठाणे आरिए जाव सव्वदुक्खपहीणमग्गे एगन्तसम्मि सुसाहू । दोच्चस्स ठाणस्स धम्मपक्खस्स विभङ्गे एवमाहिए ॥ २३ ॥

अहावरे तच्चस्स ठाणस्स मीसगस्स विभङ्गे एवमाहिज्जइ । इह खलु पाईणं वा ४ सन्तेगइया मशुस्सा भवन्ति । तं जहा—अप्पिच्छा अप्पा-
रम्भा अप्पपरिग्गहा धम्मिया धम्माणुया जाव धम्मिणं चेव विट्ठिं कप्पे-
माणा विहरन्ति सुसीला सुच्चया सुपडियाणन्दा साहू एगच्चाओ पाणाइ-
वायाओ पडिविरया जावजीवाए एगच्चाओ अप्पडिविरया जाव जे यावन्ने तहप्पगारा सावज्जा अबोहिया कम्मन्ता परपाणपरितावणकरा कज्जन्ति तओ वि एगच्चाओ अप्पडिविरया । से जहानामए समणो-
वासगा भवन्ति अभिगयजीवाजीवा उवलद्वपुण्णपावा आसवसंवरवेयणा-
निज्जराकिरियाहिगरणबन्धमोक्खकुसला असहेज्जदेवासुरनागसुवण्णजक्ख-
रक्खसकिंनरकिंपुरिसगरुलगन्धव्वमहोरगाइएहिं देवगणेहिं निग्गन्थाओ पावयणाओ अणइकमणिज्जा, इणमेव निग्गन्थे पावयणे निस्सं-
किया निक्कंखिया निव्विइग्गिच्छा लद्धटा गहियट्टा पुच्छियट्टा विणिच्छि-
यट्टा अभिगयट्टा अट्टिमिज्जपेम्माणुरागरत्ता । अयमाउसो निग्गन्थे पाव-
यणे अट्टे अयं परमट्टे सेसे अणट्टे उसियफलिहा अवंगुयदुवारा अचियत्त-
न्तेउरपरघरपवेसा चाउदसट्टमुदिट्टपुण्णिमासिणीसु पडिपुण्णं पोसहं सम्मं अणुपालेमाणे समणे निग्गन्थे फासुएसणिज्जेणं असणपाणखाइम-
साइमेणं वत्थपडिग्गहकम्बलपायपुञ्छणेणं ओसहभेसज्जेणं पीठफलगसेज्जा-
सन्थारएणं पडिलाभेमाणा बहूहिं सीलव्वयगुणवेरमणपच्चक्खाणपोसहो-
ववासेहिं अहापरिग्गहिएहिं तवोकम्मेहिं अप्पाणं भावेमाणा विहरन्ति ॥
ते णं एयारूवेणं विहारेणं विहरमाणा बहूइं वासाइं समणोवासगपरियागं

पाउणन्ति पाउणिता आवाहांसि उप्पन्नांसि वा अणुप्पन्नांसि वा बहूइं भत्ताइं पच्चक्खायन्ति, बहूइं भत्ताइं पच्चक्खाएत्ता बहूइं भत्ताइं अणसणाए छेदेन्ति, बहूइं भत्ताइं अणसणाए छेउत्ता आलोइयपडिक्कन्ता समाहिपत्ता कालमासे कालं किच्चा अन्नयरेसु देवलोएसु देवत्ताए उववत्तारो भवन्ति । तं जहा—महिद्धिएसु महज्जुइएमु जाव महासुक्खेसु सेसं तहेव जाव एस ठाणे आरिए जाव एगन्तसम्मि साहू । तच्चस्स ठाणस्स मिस्सगस्म विभङ्गे एवं आहिए ॥ अविरइं पडुच्च वाले आहिज्जइ, विरइं पडुच्च पण्डिए आहिज्जइ, विरयाविरइं पडुच्च बालपण्डिए आहिज्जइ । तत्थ णं जा सा सव्वओ अविरइं एस ठाणे आरम्भट्टाणे अणारिए जाव असव्वदुक्खपहीणमग्गे एगन्तमिच्छे असाहू । तत्थ णं जा सा सव्वओ विरइं एस ठाणे अणारम्भट्टाणे आरिए जाव सव्वदुक्खपहीणमग्गे एगन्तसम्मि साहू । तत्थ णं जा सा सव्वओ विरयाविरइं एम ठाणे आरम्भनो-आरम्भट्टाणे एस ठाणे आरिए जाव सव्वदुक्खपहीणमग्गे एगन्तसम्मि साहू ॥ २४ ॥

एवमेव समणुगम्ममाणा इमेहिं चेव दोहिं ठाणेहिं समोअरन्ति । तं जहा—धम्मि चेव अधम्मि चेव उवसन्ते चेव अणुवसन्ते चेव । तत्थ णं जे से पढमस्स ठाणस्स अधम्मपक्खस्स विभङ्गे एवमाहिए, तत्थ णं इमाइं तिन्नि तेवट्टाइं पावादुयसयाइं भवन्तीति मक्खायाइं । तं जहा—किरियावाइणं अकिरियावाइणं अन्नाणियवाइणं वेणइयवाइणं । ते वि परिनिव्वाणमाहंसु मोक्खमाहंसु ते वि लवन्ति, सावगा, ते वि लवन्ति सावइत्तारो ॥२५॥

ते सव्वे पावाउया आइगरा धम्माणं नाणापन्ना नाणाच्छन्दा नाणासीला नाणादिट्ठी नागारुई नाणारम्भा नाणज्झवसाणसंजुत्ता एगं महं मण्डलिबन्धं किच्चा सव्वे एगओ चिट्ठन्ति ॥ पुरिसे य सागाणियाणं इज्जालाणं पाइं बहुपडिपुण्णं अयोमएणं संडासएणं गहाय ते सव्वे पावाउए आइगरे धम्माणं नाणापन्ने जाव नाणज्झवसाणसंजुत्ते एवं वयासी ।

हं भो पावाउया आइगरा धम्माणं नाणापन्ना जाव नाणज्झवसाण-
संजुत्ता इमं ताव तुब्भे सागणियाणं इज्जालाणं पाइं बहुपडिपुण्णं गहाय
मुहुत्तयं मुहुत्तगं पाणिणा धरेह, नो बहुसंडासगं संसारियं कुज्जा नो
बहुअग्गिथम्भणियं कुज्जा नो बहुसाहम्मियवेयावडियं कुज्जा नो बहु-
परधम्मियवेयावडियं कुज्जा उज्जुया नियागपडिवन्ना अमायं कुव्वमाणा
पाणिं पसारहे । इति वुच्चा से पुरिसे तेसिं पावादुयाणं तं सागणियाणं
इज्जालाणं पाइं बहुपडिपुण्णं अयोमएणं संडासएण गहाय पाणिंसु
निसिरइ । तए णं ते पावादुया आइगरा धम्माणं नाणा-
पन्ना जाव नाणज्झवसाणसंजुत्ता पाणिं पडिसाहरन्ति । तए णं से
पुरिसे ते सव्वे पावाउए आइगरे धम्माणं जाव नाणज्झवसाणसंजुत्ते
एवं वयासी । हं भो पावादुया आइगरा धम्माणं नाणापन्ना जाव
नाणज्झवसाणसंजुत्ता । कम्हा णं तुब्भे पाणिं पडिसाहरह ? पाणिं नो
डहिज्जा, दड्ढे किं भविस्सइ ? दुक्खं दुक्खं ति मन्नमाणा पडिसाहरह ।
एस तुला एस पमाणे एस समोसरणे, पत्तेयं तुला पत्तेयं पमाणे पत्तेयं
समोसरणे । तत्थ णं जे ते समणा माहणा एवमाइक्खन्ति जाव परू-
वेन्ति—सव्वे पाणा जाव सव्वे सत्ता हन्तव्वा अज्जावेयव्वा परिधेयव्वा
परितावेयव्वा किलाभेयव्वा उद्वेयव्वा, ते आगन्तुच्छेयाए ते आगन्तु-
भेयाए जाव ते आगन्तुजाइजरामरणजोणिजम्मणसंसारपुणब्भवगब्भवास-
भवपवंचकलंकलीभागिणो भविस्सन्ति । ते बहूणं दण्डणाणं बहूणं सुण्ड-
णाणं तज्जणाणं तालणाणं अन्दुबन्धणाणं जाव धोलणाणं माइमरणाणं
पिइमरणाणं भाइमरणाणं भग्गिणीमरणाणं भज्जापुत्तधूयसुण्हामरणाणं
दरिदाणं दोहग्गाणं अप्पियसंवासाणं पियविप्पयोगाणं बहूणं दुक्ख-
दोम्मणस्साणं आभागिणो भविस्सन्ति । अणाइयं च णं अणवयग्गं
दीहमद्वं चाउरन्तसंसारकन्तारं भुज्जो भुज्जो अणुपरियट्ठिस्सन्ति । ते
नो सिज्झिस्सन्ति नो बुज्झिस्सन्ति जाव नो सव्वदुक्खाणं अन्तं करि-
स्सन्ति । एस तुला एस पमाणे एस समोसरणे, पत्तेयं तुला पत्तेयं

पमाणे पतेयं समोसरणे । तत्थ णं जे ते समणा माहणा एवमाइक्खन्ति जाव परूवेन्ति । सव्वे पाणा सव्वे भूया सव्वे जीवा सव्वे सत्ता न हन्तव्वा न अज्जावेयव्वा न परिघेयव्वा न उद्देयव्वा ते नो आगन्तु-च्छेयाए ते नो आगन्तुभेयाए जाव जाइजरामरणजोगिजम्मणसंसारपुण-ब्भवगम्भवासमन्नपवंचकलंकलीभागिणो भविस्सन्ति, अणाइयं च णं अणवयग्गं दीहमद्धं चाउरन्तसंमारकन्तारं भुज्जो भुज्जो नो अणुपरि-यट्ठिस्सन्ति, ते सिज्झिस्सन्ति जाव सव्वदुक्खाणं अन्तं करिस्सन्ति ॥२६॥

इच्चेएहिं वारसहिं किरियाठाणेहिं वट्टमाणा जीवा नो सिज्झिस्सु नो बुज्झिस्सु नो मुच्चिंस्सु नो परिणिव्वाइंस्सु जाव नो सव्वदुक्खाणं अन्तं करेस्सु वा नो करेन्ति वा नो करिस्सन्ति वा । एयंसि चैव तेरसमे किरियाठाणे वट्टमाणा जीवा सिज्झिस्सु बुज्झिस्सु मुच्चिंस्सु परिणिव्वाइंस्सु जाव सव्वदुक्खाणं अन्तं करेस्सु वा करन्ति वा करिस्सन्ति वा । एवं से भिकखू आयट्ठी आयहिए आयगुत्ते आयजोगे आयपरकमे आयरक्खिए आयाणुक्कम्पए आयणिक्केडए आयाणमेव पडिसाहरेज्जासि ति वेमि ॥२७॥

किरियाट्ठाणज्झयणं विइयं

आहारपरिन्नज्झयणे तइये

2 3.

सुयं मे आउसं तेणं भगवया एवमक्खायं । इह खलु आहारपरिन्ना नामज्झयणे तस्स णं अयमट्ठे । इह खलु पाईणं वा ४ सव्वओ सव्वावन्ति य णं लोणंसि चत्तारि वीथिकाया एवमाहिज्जन्ति । तं जहा-अग्गवीया मूलवीया पोरवीया खन्धवीया । तेसिं च णं अहावीएणं अहावगासेणं इहेगइया सत्ता पुढवीजोगिया पुढवीसंभवा पुढवीवुक्कमा

तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा नाणाविहजोणियासु पुढवीसु रुक्खत्ताए विउट्टन्ति ॥ ते जीवा तेसिं नाणाविहजोणियाणं पुढवीणं सिणेहमाहारेन्ति । ते जीवा आहारेन्ति पुढवीसरीरं आउसरीरं तेउसरीरं वाउसरीरं वणस्सइसरीरं । नाणाविहाणं तसथावराणं पाणाणं सरीरं अचित्तं कुव्वन्ति परिविद्धत्थं । तं सरीरं पुव्वाहारियं तथाहारियं विपरिणयं सारूवियकडं सन्तं । अवेरे वि य णं तेसिं पुढविजोणियाणं रुक्खाणं सरीरा नाणावण्णा नाणागन्धा नाणारसा नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोववन्नगा भवन्तीति मक्खायं ॥ १ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा पुढवीजोणिएहिं रुक्खेहिं रुक्खत्ताए विउट्टन्ति । ते जीवा तेसिं पुढवीजोणियाणं रुक्खाणं सिणेहमाहारेन्ति, ते जीवा आहारेन्ति पुढवीसरीरं आउतेउवाउवणस्सइसरीरं नाणाविहाणं तसथावराणं पाणाणं सरीरं अचित्तं कुव्वन्ति परिविद्धत्थं । तं सरीरं पुव्वाहारियं तथाहारियं विपरिणामियं सारूवियकडं सन्तं । अवेरे वि य णं तेसिं रुक्खजोणियाणं रुक्खाणं सरीरा नाणावण्णा नाणागन्धा नाणारसा नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोववन्नगा भवन्तीति मक्खायं ॥ २ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा रुक्खजोणिएसु रुक्खत्ताए विउट्टन्ति । ते जीवा तेसिं रुक्खजोणियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं आउतेउवाउवणस्सइसरीरं तसथावराणं पाणाणं सरीरं अचित्तं कुव्वन्ति परिविद्धत्थं । तं सरीरं पुव्वाहारियं तथाहारियं विपरिणामियं सारूवियकडं

सन्तं । अवरे वि य णं तेसिं रुक्खजोणियाणं रुक्खाणं सरीरा नाणावण्णा जाव ते जीवा कम्मोववन्नगा भवन्तीति मक्खायं ॥ ३ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुकमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुकमा रुक्खजोणिएसु रुक्खेसु मूलत्ताए कन्दत्ताए खन्धत्ताए तयत्ताए सालत्ताए पवालत्ताए पत्तत्ताए पुप्फत्ताए फलत्ताए वीयत्ताए विउट्टन्ति । ते जीवा तेसिं रुक्खजोणियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं आउतेउवाउवणस्सडसरीरं नाणाविहाणं तसथावराणं पाणाणं सरीरं अचित्तं कुव्वन्ति परिविट्ठत्थं तं सरीरगं जाव सारूवियकडं सन्तं । अवरे वि य णं तेसिं रुक्खजोणियाणं मूलाणं कन्दाणं खन्धाणं तयाणं सालाणं पवालानं जाव वीयाणं सरीरा नाणावण्णा नाणागन्धा जाव नाणाविहसरीरपुग्गलविउव्विया ते जीवा कम्मोववन्नगा भवन्तीति मक्खायं ॥ ४ ॥

अहावरं पुरक्खायं इहेगइया सत्ता रुक्खजोणिया रुक्खसंभवा रुक्खवुकमा तज्जोणिया तस्संभवा तदुवक्कमा कम्मोववन्नगा कम्मनियाणेणं तत्थवुकमा रुक्खजोणिएहिं रुक्खेहिं अज्झारोहत्ताए विउट्टन्ति । ते जीवा तेसिं रुक्खजोणियाणं रुक्खाणं सिणेहमाहारेन्ति । ते जीवा आहारेन्ति पुढवीसरीरं जाव सारूवियकडं सन्तं । अवरे वि य णं तेसिं रुक्खजोणियाणं अज्झारुहाणं सरीरा नाणावण्णा जाव मक्खायं ॥ ५ ॥

अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मनियाणेणं तत्थवुकमा रुक्खजोणिएसु अज्झारोहेसु अज्झारोहत्ताए विउट्टन्ति । ते जीवा तेसिं रुक्खजोणियाणं अज्झारोहाणं सिणेहमाहारेन्ति । ते जीवा पुढवीसरीरं जाव सारूवियकडं सन्तं । अवरे वि य णं

तेसिं अज्झारोहजोगियाणं अज्झारोहाणं सरीरा नाणावण्णा जाव मक्खायं ॥ ६ ॥

अहावरं पुरक्खायं इहेगइया सत्ता अज्झारोहजोगियो अज्झारोहसंभवा जाव कम्मनियाणेणं तत्थवुक्कमा अज्झारोहजोगिएसु अज्झारोहत्ताए विउट्टन्ति । ते जीवा तेसिं अज्झारोहजोगियाणं अज्झारोहाणं सिणेहमाहारेन्ति । ते जीवा आहारेन्ति पुट्ठीसरीरं आउसरीरं जाव सारूवियकडं सन्तं । अवरं वि य णं तेसिं अज्झारोहजोगियाणं अज्झारोहाणं सरीरा नाणावण्णा जाव मक्खायं ॥ ७ ॥

अहावरं पुरक्खायं इहेगइया सत्ता अज्झारोहजोगिया अज्झारोहसंभवा जाव कम्मनियाणेणं तत्थवुक्कमा अज्झारोहजोगिएसु अज्झारोहेसु मूलत्ताए जाव बीयत्ताए विउट्टन्ति । ते जीवा तेसिं अज्झारोहजोगियाणं अज्झारोहणं सिणेहमाहारेन्ति जाव अवरं वि य णं तेसिं अज्झारोहजोगियाणं मूलानं जाव बीयाणं सरीरा नाणावण्णा जाव मक्खाय ॥ ८ ॥

अहावरं पुरक्खायं इहेगइया सत्ता पुढविजोगिया पुढविसंभवा जाव नाणाविहजोगियासु पुढवीसु तणत्ताए विउट्टन्ति । ते जीवा तेसिं नाणाविहजोगियाणं पुढवीणं सिणेहमाहारेन्ति जाव ते जीवा कम्मोववन्ना भवन्तीति मक्खायं ॥ ९ ॥

एवं पुढविजोगिएसु तणेसु तणत्ताए विउट्टन्ति जाव मक्खायं ॥ १० ॥

एवं तणजोगिएसु तणेसु तणत्ताए विउट्टन्ति । तणजोगियं तणसरीरं च आहारेन्ति जाव मक्खायं । एवं तणजोगिएसु तणेसु मूलत्ताए जाव बीयत्ताए विउट्टन्ति ते जीवा जाव मक्खायं । एवं तणजोगिएसु तणेसु मूलत्ताए जाव बीयत्ताए विउट्टन्ति ते जीवा जाव एवमक्खायं । एवं ओसहीण वि चत्तारि आलावगा ॥ एवं हरियाण वि चत्तारि आलावगा ॥ ११ ॥

अहावरं पुरम्खायं इहेगइया सत्ता पुढविजोगिया पुढविसंभवा जाव कम्मनियाणेणं तत्थवुक्कमा नाणाविहजोगियासु पुढवीसु आयत्ताए वायत्ताए कायत्ताए कूहणत्ताए कन्दुकत्ताए उव्वेहणियत्ताए निव्वेहणियत्ताए सछत्ताए छत्तगत्ताए वासणियत्ताए कूरत्ताए विउड्डन्ति । ते जीवा तेसिं नाणाविहजोगियाणं पुढवीणं सिणेहमाहारेन्ति । ते वि जीवा आहारेन्ति पुढविसरीरं जाव सन्तं । अवरे वि य णं तेसिं पुढविजोगियाणं आयत्ताणं जाव कूराणं सरीरा नाणावण्णा जाव मक्खायं । एगो चैव आलावगो सेसा तिण्णि नत्थि । अहावरं पुरम्खायं इहेगइया सत्ता उदगजोगिया उदगसंभवा जाव कम्मनियाणेणं तत्थवुक्कमा नाणाविहजोगिएसु उदएसु रुक्खत्ताए विउड्डन्ति । ते जीवा तेसिं नाणाविहजोगियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं उदगजोगियाणं रुक्खाणं सरीरा नाणावण्णा जाव मक्खायं । जहा पुढविजोगियाणं रुक्खाणं चत्तारि गमा अज्झारुहाण वि तहेव, तणाणं ओसहीणं हरियाणं चत्तारि आलावगा भाणियव्वा एक्केके । अहावरं पुरम्खायं इहेगइया सत्ता उदगजोगिया उदगसंभवा जाव कम्मनियाणेणं तत्थवुक्कमा नाणाविहजोगिएसु उदएसु उदगत्ताए अवगत्ताए पणगत्ताए सेवालत्ताए कलम्बुगत्ताए हडत्ताए कसेरुगत्ताए कच्छभाणियत्ताए उप्पलत्ताए पउमत्ताए कुमुयत्ताए नलिंगत्ताए सुभगत्ताए सोगन्धियत्ताए पोण्डरीयमहापोण्डरीयत्ताए सयपत्तत्ताए सहस्सपत्तत्ताए एवं कल्हारकोकणयत्ताए अरविन्दत्ताए तामरसत्ताए भिसभिसमुणालपुक्खलत्ताए पुक्खलच्छिभगत्ताए विउड्डन्ति । ते जीवा तेसिं नाणाविहजोगियाणं उदगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसिं उदगजोगियाणं उदगाणं जाव पुक्खलच्छिभगाणं सरीरा नाणावण्णा जाव मक्खायं । एगो चैव आलावगो ॥ १२ ॥

अहावरं पुरक्खायं इहेगइया सत्ता तेसिं चव पुढवीजोगिएहिं रुक्खेहिं रुक्खजोगिएहिं रुक्खेहिं रुक्खजोगिएहिं मूलेहिं जाव वीएहिं, रुक्खजोगिएहिं अज्जारोहेहिं अज्जारोहजोगिएहिं अज्जारोहेहिं अज्जारोहजोगिएहिं मूलेहिं जाव वीएहिं, पुढविजोगिएहिं तणेहिं तणजोगिएहिं तणेहिं तणजोगिएहिं मूलेहिं जाव वीएहिं । एवं ओमहीहिं वि तिण्णि आलावगा एवं हरिएहिं वि तिण्णि आलावगा । पुढविजोगिएहिं वि आएहिं काएहिं जाव कूरोहिं उदगजोगिएहिं रुक्खेहिं रुक्खजोगिएहिं मूलेहिं जाव वीएहिं एवं अज्जारोहेहिं वि तिण्णि । तणेहिं पि तिण्णि आलावगा । ओसहीहिं पि तिण्णि, हरिएहिं पि तिण्णि, उदगजोगिएहिं, उदएहिं अवएहिं जाव पुक्खलच्छिभएहिं तसपाणत्ताए विउड्ढन्ति ॥ ते जीवा तेसिं पुढवीजोगियाणं उदगजोगियाणं रुक्खजोगियाणं अज्जारोहजोगियाणं तणजोगियाणं ओसहीजोगियाणं हरियजोगियाणं रुक्खाणं अज्जारोहाणं तगाणं ओसहीणं हरियाणं मूलाणं जाव वीयाणं आयाणं कायाणं जाव कुरवाणं [कूराणं] उदगाण अवगाणं जाव पुक्खलच्छिभगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि यणं तेसिं रुक्खजोगियाणं अज्जारोहजोगियाणं तणजोगियाणं ओसहिजोगियाणं हरियजोगियाणं मूलजोगियाणं कन्दजोगियाणं जाव वीयजोगियाणं आयजोगियाणं कायजोगियाणं जाव कूरजोगियाणं उदगजोगियाणं अवगजोगियाणं जाव पुक्खलच्छिभगजोगियाणं तसपाणाणं सरीरा नागावण्णा जाव मक्खायं ॥ १३ ॥

अहावरं पुरक्खायं नाणाविहाणं मणुस्साणं । तं जहा—कम्मभूमगाणं अकम्मभूमगाणं अन्तरदीवगाणं आरियाणं मिलक्खुयाणं । तेसिं च णं अहावीएणं अहावगासेणं इत्थीए पुरिसस्स य कम्मकडाए जोगिएएत्थ णं मेहुणवत्तियाए व नामं संजोगे समुप्पज्जइ । ते दुहओ वि सिणेहं संचिणन्ति । तत्थ णं जीवा इत्थियाए पुरिसत्ताए नपुंसगत्ताए विउड्ढन्ति, ते जीवा माओउयं पिउसुक्कं तं तदुभयं संसटं कालुसं

किञ्चिदसं तं पठमत्ताए आहारमाहारेन्ति । तओ पच्छा जं से माया नाणाविहाओ रम्बिहीओ आहारमाहारेइ तओ एगदेसेणं ओयमाहारेन्ति । अणुपुव्वेण वुड्ढा पलिपागमणुववन्ना तओ कायाओ अभिनिवड्डमाणा इत्थि वेगया जणयन्ति पुरिसं वेगया जणयन्ति नपुंसगं वेगया जणयन्ति । ते जीवा डहरा समाणा माउमखीरं सभियं आहारेन्ति । आणुपुव्वेणं वुड्ढा ओयणं कुम्मासं तसथावरे य पागे । ते जीवा आहारेन्ति पुढविसरीरं जाव सारुवियकडं सन्तं । अवरे वि य णं तेसिं नाणाविहाणं मणुस्सगाणं कम्मभूमगाणं अकम्मभूमगाणं अन्तरदीवगाणं आरियाणं मिलक्खूणं सरीरा नाणावण्णा भवन्तीति मक्खायं ॥ १४ ॥

अहावरं पुरक्खायं नाणाविहाणं जलचराणं पञ्चिन्दियतिरिक्खजोगियाणं । तं जहा—मच्छाणं जाव सुंसुमाराणं । तेसिं च णं अहावीएणं अहावगासेणं इत्थिए पुरिसस्स य कम्मकए तहेव जाव तओ एगदेसेणं ओयमाहारेन्ति, अणुपुव्वेणं वुड्ढा परिपालगमणुपवन्ना तओ कायाओ अभिनिवड्डमाणा अण्डं वेज्जा जणयन्ति पोयं वेगया जणयन्ति । से अण्डे उब्भिज्जमाणे इत्थि वेगया जणयन्ति पुरिसं वेगया जणयन्ति नपुंसगं वेगया जणयन्ति । ते जीवा डहरा समाणा आउसिणेहमाहारेन्ति अणुपुव्वेणं वुड्ढा वणस्सइकायं तसथावरे य पागे । ते जीवा आहारेन्ति पुढविसरीरं जाव सन्तं । अवरे वि य णं तेसिं नाणाविहाणं जलचरपञ्चिन्दियतिरिक्खजोगियाणं मच्छाणं सुंसुमाराणं सरीरा नाणावण्णा जाव मक्खायं । अहावरं पुरक्खायं नाणाविहाणं चउप्पयथलयरपञ्चिन्दियतिरिक्खजोगियाणं । तं जहा—एगखुराणं दुखुराणं गण्डीपदाणं सणफ्फयाणं । तेसिं च णं अहावीएणं अहावगासेणं इत्थिपुरिसस्स य कम्म जाव भेहुणवत्तिए नामं संजोगे समुप्पज्जइ । ते दुहओ सिणेहं मंचिणन्ति । तत्थ णं जीवा इत्थिच्चाए पुरिसच्चाए जाव विउड्डन्ति । ते जीवा माओउयं पिउसुकं एवं जहा मणुस्साणं, इत्थि पि वेगया जण-

यन्ति पुरिसं पि नपुंसगं पि । ते जीवा डहरा समाणा माउक्खीरं सपिं
 आहारेन्ति, अणुपुच्चेणं वुड्ढा वणस्सइकायं तसथावरे य पाणे । ते
 जीवा आहारेन्ति पुढविसरीरं जाव सन्तं । अवरे वि य णं तेसिं नाणा-
 विहाणं चउप्पयथलयरपञ्चिन्दियतिरिक्खजोगियाणं एगखुराणं जाव
 सणफ्फयाणं सरीरा नाणावण्णा जाव मक्खायं । अहावरं पुरक्खायं
 नाणाविहाणं उरपरिसप्पथलयरपञ्चिन्दियतिरिक्खजोगियाणं । तं जहा-
 अहीणं अयगराणं आसालियाणं महोरगाणं । तेसिं च णं अहावीएणं
 अहावगासेणं इत्थीए पुरिस जाव एत्थ णं मेहुणे एवं तं चेव । नाणत्तं
 अण्डं वेगइया जणयन्ति, पोयं वेगइया जणयन्ति । से अण्डे उब्भिज्ज-
 माणे इत्थिं वेगइया जणयन्ति पुरिसं पि नपुंसगं पि । ते जीवा डहरा
 समाणा वाउकायमाहारेन्ति अणुपुच्चेणं वुड्ढा वणस्सइकायं तसथावर-
 पाणे । ते जीवा आहारेन्ति पुढविसरीरं जाव सन्तं । अवरे वि य णं तेसिं
 नाणाविहाणं उरपरिसप्पथलयरपञ्चिन्दियतिरिक्खजोगियाणं । तं जहा-
 अहीणं जाव महोरगाणं सरीरा नाणावण्णा नाणागंधा जावमक्खायं ।
 अहावरं पुरक्खायं नाणाविहाणं भुयपरिसप्पथलयरपञ्चिन्दियतिरिक्ख-
 जोगियाणं । तं जहा—गोहाणं नउलाणं सिहाणं सरडाणं सल्लाणं सरवाणं
 खराणं घरकोइलियाणं विस्संभराणं मुसगाणं मंगुसाणं पयलाइयाणं
 विरालियाणं जोहाणं चउप्पाइयाणं । तेसिं च णं अहावीएणं अहाव-
 गासेणं इत्थीए पुरिसस्स य जहा उरपरिसप्पाणं तहा भाणियच्चं जाव
 सारुवियकडं सन्तं । अवरे वि य णं तेसिं नाणाविहाणं भुयपरिसप्पपञ्चि-
 न्दियथलयरतिरिक्खाणं । तं जहा—गोहाणं जावमक्खायं । अहावरं
 पुरक्खायं नाणाविहाणं जलचरपञ्चिन्दियतिरिक्खजोगियाणं । तं जहा—
 चम्मपक्खीणं लोमपक्खीणं समुग्गपक्खीणं विययपक्खीणं । तेसिं च
 णं अहावीएणं अहावगासेणं इत्थीए जहा उरपरिसप्पाणं । नाणत्तं ते
 जीवा डहरा समाणा माउगतसिगेहमाहारेन्ति अणुपुच्चेणं वुड्ढा वणस्सइ-
 कायं तसथावरे य पाणे । ते जीवा आहारेन्ति पुढविसरीरं जाव सन्तं ।

अवरे वि य णं तेसिं नाणाविहाणं खहचरपञ्चिन्दियतिरिक्खजोणियाणं चम्मपक्खीणं जाव मक्खायं ॥ १५ ॥

अहावरं पुरक्खायं इहेगइया सत्ता नाणाविहजोणिया नाणाविहसंभवा नाणाविहवुक्कमा तज्जोणिया तस्संभवा तदुवक्कमा कम्मोवगा कम्मनियानेणं तत्थवुक्कमा नाणाविहाणं तसथावरणं पोग्गलाणं सरीरेसु वा सच्चित्तेसु वा अचित्तेसु वा अणुसूयत्ताए विउट्टन्ति । ते जीवा तेसिं नाणाविहाणं तसथावरणं पाणाणं सिणेहमाहरोन्ति । ते जीवा आहारोन्ति पुढाविसरीरं जाव सन्तं । अवरे वि य णं तेसिं तसथावरजोणियाणं अणुसूयगाणं सरीरा नाणावण्णा जाव मक्खायं । एवं दुरूवसंभवत्ताए । एवं खुरदुगत्ताए ॥ १६ ॥

अहावरं पुरक्खायं इहेगइया सत्ता नाणाविहजोणिया जाव कम्मनियानेणं तत्थवुक्कमा नाणाविहाणं तसथावरणं पाणाणं सरीरेसु सच्चित्तेसु वा अचित्तेसु वा तं सरीरगं वायसंसिद्धं वा वायसंगाहियं वा वायपरिग्गहियं उट्टुवाएसु उट्टुभागी भवइ, अहेवाएसु अहेभागी भवइ, तिरियवाएसु तिरियभागी भवइ । तं जहा-ओसा हिमए महिए करए हरतणुए सुद्धोदए । ते जीवा तेसिं नाणाविहाणं तसथावरणं पाणाणं सिणेहमाहरोन्ति । ते जीवा आहारोन्ति पुढाविसरीरं जाव सन्तं । अवरे वि य णं तेसिं तसथावरजोणियाणं ओसाणं जाव सुद्धोदगाणं सरीरा नाणावण्णा जावमक्खायं । अहावरं पुरक्खायं इहेगइया सत्ता उदगजोणिया उदगसंभवा जाव कम्मनियानेणं तत्थवुक्कमा तसथावरजोणिएसु उदएसु उदगत्ताए विउट्टन्ति । ते जीवा तेसिं तसथावरजोणियाणं उदगाणं सिणेहमाहरोन्ति । ते जीवा आहारोन्ति पुढाविसरीरं जाव सन्तं । अवरे वि य णं तेसिं तसथावरजोणियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोणियाणं जाव कम्मनियानेणं तत्थवुक्कमा उदगजोणिएसु उदएसु उदगत्ताए विउट्टन्ति

ते जीवा तेसिं उदगजोणियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरं वि य णं तेसिं उदगजोणियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोणियाणं जाव कम्मनियाणेण तत्थवुक्कमा उदगजोणिएसु उदएसु तसपाणत्ताए विउट्टन्ति । ते जीवा तेसिं उदगजोणियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरं वि णं तेसिं उदगजोणियाणं तसपाणाणं सरीरा नाणावण्णा जाव मक्खायं ॥ १७ ॥

अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सच्चित्तेसु वा अचित्तेसु वा अगणिकायत्ताए विउट्टन्ति । ते जीवा तेसिं नाणाविहाणं तसथावराणं पाणाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरं वि य णं तेसिं तसथावरजोणियाणं अगणीणं सरीरा नाणावण्णा जावमक्खायं । सेसा तिण्णि आलावगा जहा उदगाणं । अहावरं पुरक्खायं इहेगइया सत्ता नाणाविहजोणियाणं जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सच्चित्तेसु वा अचित्तेसु वा वाउक्कायत्ताए विउट्टन्ति । जहा अगणीणं तहा भाणियव्वा चत्तारि गमा ॥ १८ ॥

अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सच्चित्तेसु वा अचित्तेसु वा पुढवित्ताए सक्कारत्ताए वालुयत्ताए । इमाओ गाहाओ अणुगन्तव्वाओ—

पुढवी य सक्करा वालुया य उवले सिला य लोणूसे ।


अथ तउय तम्ब सीसग रुप्य सुवण्णे य वइरे य ॥ १ ॥

हरियाले हिङ्गुलए मणोसिला सासगञ्जणपवाले ।
 अब्भपडलब्भवालुयवायरकाए मणिविहाणा ॥ २ ॥
 गोमेज्जए य रुयए अंके फलिहे य लोहियक्खे य ।
 मरगयमसारगह्णे भुयमोयग इन्दणीले य ॥ ३ ॥
 चन्दण गेरुय हंसगब्भ पुलए सोगन्धिए य बोद्धव्वे ।
 चन्दप्पभ वेरुल्लिए जलकन्ते सूरकन्ते य ॥ ४ ॥

एयाओ एएसु भणियव्वाओ गाहाओ जाव सूरकन्तत्ताए
 विउट्टन्ति । ते जीवा तेसिं नाणाविहाणं तसथावराणं पाणाणं सिणेहमा-
 हारेन्ति । ते जीवा आहारेन्ति पुढविसरीरं जाव सन्तं । अवरे वि य णं
 तेसिं तसथावरजोणियाणं पुढवीणं जाव सूरकन्ताणं सरीरा नाणावण्णा
 जाव मक्खायं । सेसा तिण्णि आलावगा जहा उदगाणं ॥ १९ ॥

अहावरं पुरक्खायं सव्वे पाणा सव्वे भूया सव्वे जीवा सव्वे
 सत्ता नाणाविहजोणिया नाणाविहसंभवा नाणाविहवुक्कमा सरीरजोणिया
 सरीरसंभवा सरीरवुक्कमा सरीराहारा कम्मोवगा कम्मनियाणा कम्मगइया
 गम्मठिइया कम्मणा चेव विप्परियासमुवेन्ति ॥ से एवमायाणह से
 एवमायाणित्ता आहारगुत्ते सहिए समिए सया जए त्ति वेमि ॥ २० ॥

आहारपरिञ्जञ्जयणं तइयं



पञ्चक्खाणकिरियज्जयणे चउत्थे

2. 4

सुयं मे आउसं तेणं भगवया एवमक्खायं । इह खलु पञ्चक्खाण-
 किरिया नामज्जयणे । तस्स णं अयमट्ठे पण्णत्ते । आया अपञ्चक्खाणी
 यावि भवइ, आया अकिरियाकुसले यावि भवइ, आया मिच्छासंठिए

यावि भवइ, आया एगन्तदण्डे यावि भवइ, आया एगन्तवाले यावि भवइ, आया एगन्तसुत्ते यावि भवइ, आया आवियारमणवयणकायवक्के यावि भवइ, आया अप्पडिहयअपच्चक्खायपावकम्मे यावि भवइ । एस खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंबुडे एगन्तदण्डे एगन्तवाले एगन्तसुत्ते से वाले आवियारमणवयणकायवक्के सुविणमवि न पस्सइ, पावे य से कम्मे कज्जइ ॥१॥

तत्थ चोयए पन्नवगं एवं वयासी । असन्तएणं मणेणं पावएणं, असन्तियाए वइए पावियाए, असन्तएणं काएणं पावएणं, अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावकम्मे नो कज्जइ, कस्स णं तं हेउं । चोयए एवं ववीइ । अन्नयरेणं मणेणं पावएणं मणवत्तिए पावे कम्मे कज्जइ, अन्नयरीए वइए पावियाए वइवत्तिए पावे कम्मे कज्जइ, अन्नयरेणं कायेणं पावएणं कायवत्तिए पावे कम्मे कज्जइ, हणन्तस्स समणक्खस्स सवियारमणवयणकायवक्कस्स सुविणमवि पासओ एवंगुणजाड्यस्स पावे कम्मे कज्जइ । पुणरवि चोयए एवं ववीइ । एत्थ णं जे ते एवमाहंसु—असन्तएणं मणेणं पावएणं, असन्तियाए वइए पावियाए, असन्तएणं काएणं पावएणं, अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु मिच्छा ते एवमाहंसु । तत्थ पन्नवए चोयगं एवं वयासी । तं सम्मं जं मए पुव्वं बुत्तं । असन्तएणं मणेणं पावएणं, असन्तियाए वइए पावियाए, असन्तएणं कायेणं पावएणं अहणन्तस्स अमणक्खस्स आवियारमणवयणकायवक्कस्स सुविणमवि अपस्सओ पावे कम्मे कज्जइ, तं सम्मं, कस्स णं तं हेउं । आचार्य आह—तत्थ खलु भगवया छजीवनिकायहेऊ पण्णत्ता । तं जहा—पुढवि-काइया जाव तसकाइया । इच्चेएहिं छहिं जीविकाएहिं आया अप्पडिहयपच्चक्खायपावकम्मे निच्चं पसढविउवायचित्तदण्डे । तं जहा—पाणाइवाए जाव परिग्गहे कोहे जाव मिच्छादंसणसल्ले । आचार्य आह—

तस्य खलु भगवया वहए दिद्वन्ते पण्णत्ते । से जहानामए—वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि पहारेमाणे से किं नु हु नाम से वहए तस्स गाहावइस्स वा गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि पहारमाणे दिया वा राओ वा सुत्ते वा जागरमाणे अमित्तभूए भिच्छासंठिए निच्चं पसढविडवायाचित्तदण्डे भवइ ? एवं वियागरेमाणे समियाए वियागरे चोयए—हंता भवइ । आचार्य आह—जहा से वहए तस्स गाहावइस्स व तस्स गाहावइपुत्तस्स वा रण्णो वा रायपुरिसस्स वा खणं निदाय पविसिस्सामि खणं लद्धूणं वहिस्सामि ति पहारेमाणे दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढविडवायाचित्तदण्डे, एवमेव बाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढविडवायाचित्तदण्डे । तं जहा—पाणाइवाए जाव भिच्छादंसणसह्णे । एवं खलु भगवया अक्खाए असजए अविरए अप्पडिहयपच्चक्खायपावकम्मे सकिरिए असंवुडे एगन्तदण्डे एगन्तबाले एगन्तसुत्ते यावि भवइ । से बाले अवियारमणवयणकायवक्के सुविण-मवि न पस्सइ पावे य से कम्मे कज्जइ । जहा से वहए तस्स वा गाहा-वइस्स जाव तस्स वा रायपुरिसस्स पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए भिच्छासंठिए निच्चं पसढ-विडवायाचित्तदण्डे भवइ, एवमेव बाले सव्वेसिं पाणाणं जाव सव्वेसिं सत्ताणं पत्तेयं पत्तेयं चित्तसमादाए दिया वा राओ वा सुत्ते वा जागर-माणे वा अमित्तभूए भिच्छासंठिए निच्चं पसढविडवायाचित्तदण्डे भवइ ॥ २ ॥

नो इण्डे समट्टे [चोयए] । इह खलु बहवे पाणा० जे इमेणं सरिसमुत्सएणं नो दिट्ठा वा सुया वा नाभिमया वा विन्नाया वा जेसिं

नो पत्तेयं पत्तेयं चित्तसमायाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे । तं जहा पाणाइवाए जाव मिच्छादंसणसल्ले ॥ ३ ॥

आचार्य आह—तत्थ खलु भगवया दुवे दिट्ठन्ता पण्णत्ता । तं जहा—सन्निदिट्ठन्ते य असन्निदिट्ठन्ते य । से किं तं सन्निदिट्ठन्ते ? जे इमे सन्निपञ्चिन्दिया पज्जत्तगा एएसिं णं छजीवनिकाए पडुच्च, तं जहा—पुढवीकायं जाव तसकायं । से एगइओ पुढवीकाएणं किच्चं करेइ वि कारवेइ वि । तस्स णं एवं भवइ—एवं खलु अहं पुढवीकाएणं किच्चं करेमि वि कारवेमि वि, नो चेव णं से एवं भवइ—इमेण वा इमेण वा से एएणं पुढवीकाएणं किच्च करेइ वि कारवेइ वि । से णं ताओ पुढवीकायाओ असंजयअविरयअप्पडिहयपच्चक्खायपावकम्मे यावि भवइ । एवं जाव तसकाए त्ति भाणियव्वं । से एगइओ छजीवनिकाएहिं किच्चं करेइ वि कारवेइ वि । तस्स णं एवं भवइ—एवं खलु छजीवनिकाएहिं किच्चं करेमि वि कारवेमि वि । नो चेव णं से एवं भवइ—इमेहिं वा इमेहिं वा, से य तेहिं छहिं जीवनिकाएहिं जाव कारवेइ वि । से य तेहिं छहिं जीवनिकाएहिं असंजयअविरयअप्पडिहयपच्चक्खायपावकम्मे, तं जहा—पाणाइवाए जाव मिच्छादंसणसल्ले । एस खलु भगवया अक्खाए असंजए अविरए अप्पडिहयपच्चक्खायपावकम्मे सुविणमवि अपस्सओ । पावे य से कम्मे कज्जइ । से तं सन्निदिट्ठन्ते ॥ से किं तं असन्निदिट्ठन्ते ? जे इमे असन्निणो पाणा, तं जहा—पुढवीकाइया जाव वणस्सइकाइया छट्ठा वेगइया तसा पाणा, जेसिं नो तक्का इ वा सन्ना इ वा पन्ना इ वा मणा इ वा वई इ वा सयं वा करणाए अन्नेहिं वा कारवेत्तए करन्तं वा समणुजाणित्तए, ते वि णं वाले सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूया मिच्छासंठिया निच्चं पसढविउवायचित्तदण्डा, तं जहा—पाणाइवाए जाव मिच्छादंसणसल्ले । इच्चेव जाव नो चेव मणो नो चेव वई पाणाणं जाव सत्ताणं दुक्खणयाए

सोयणयाए जूरणयाए तिप्पणयाए पिट्टणयाए परित्पणयाए ।
 ते दुक्खणसोयण जाव परित्पणवहवन्धणपरिकिलेसाओ अप्पडिविरया
 भवन्ति । इति खलु से असन्निणो वि सत्ता अहोनिंसिं पाणाइवाए
 उवक्खाइज्जन्ति जाव अहोनिंसिं परिग्गहे उवक्खाइज्जन्ति जाव
 मिच्छादंसणसल्ले उवक्खाइज्जन्ति [एवं भूयवाई] । सव्वजोणिया वि
 खलु सत्ता सन्निणो हुच्चा असन्निणो होन्ति असन्निणो हुच्चा सन्निणो
 होन्ति, होच्चा सन्नी अदुवा असन्नी, तत्थ से अवित्रिचित्ता अविधूणिता
 असंसुच्छित्ता अणणुतावित्ता असन्निकायाओ वा सन्निकाए संकमन्ति
 सन्निकायाओ वा असन्निकायं संकमन्ति, सन्निकायाओ वा सन्निकायं
 संकमन्ति असन्निकायाओ वा असन्निकायं संकमन्ति । जे एए सन्नि वा
 असन्नि वा सव्वे ते मिच्छायारा निच्चं पसढविउवायचित्तदण्डा । तं जहा-
 पाणाइवाए जाव मिच्छादंसणसल्ले । एवं खलु भगवया अक्खाए
 असंजए अविरए अप्पडिहयपच्चक्खायपावकम्मे सकिरिए असंबुडे
 एगन्तदण्डे एगन्तबाले एगन्तसुत्ते से बाले अवियारमणवयणकायवक्के
 सुविणमवि न पासइ पावे य से कम्मे कज्जइ ॥ ४ ॥

चोयए - से किं कुव्वं किं कारवं कहं संजयविरयप्पडिहयपच्च-
 क्खायपावकम्मे भवइ ? आचार्य आह-तत्थ खलु भगवया छज्जीव-
 निकायहेऊ पन्नत्ता, तं जहा-पुढवीकाइया जाव तराकाइया । से जहानामए
 मम अस्सायं दण्डेण वा अट्टीण वा मुट्टीण वा लेल्लण वा क्वाल्लेण वा
 आतोडिज्जमाणस्स वा जाव उवद्दविज्जमाणस्स वा जाव लोमुक्खणणमाय-
 मवि हिंसाकारं दुक्खं भयं पडिसंवेदेमि, इच्चें जाण सव्वे पाणा सव्वे
 सत्ता दण्डेण वा जाव क्वाल्लेण वा आतोडिज्जमाणे वा हम्ममाणे वा
 तज्जिज्जमाणे वा तालिज्जमाणे जाव उवद्दविज्जमाणे वा जाव लोमुक्खणण-
 मायमवि हिंसाकारं दुक्खं भयं पडिसंवेदेन्ति । एवं नच्चा सव्वे पाणा जाव
 सव्वे सत्ता न हन्तव्वा न उद्दवेयव्वा । एस धम्मे धुवे निइए सासए
 सभिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव

मिच्छादंसणसल्लाओ । से भिक्खू नो दन्तपक्खालणेणं दन्ते पक्खा-
लेजा, नो अञ्जणं नो वमणं नो धूवणित्तं पिआइए । से भिक्खू
अकिरिए अत्तसए अकोहे जाव अलोभे उवसन्ते परिनिव्वुडे । एस
खलु भगवया अक्खाए संजयविरयपडिहयपच्चक्खायपावकम्मे अकिरिए
संवुडे एगन्तपण्डिए भवइ ति वेमि ॥ ५ ॥

पच्चक्खाणाकिरियज्ज्ञयणं चउत्थं

आयारसुयज्ज्ञयणे पञ्चमे

2 5.

आदाय वम्भचेरं च आसुपन्ने इमं वइं ।
अस्सिं धम्मे अणायारं नायरेज्ज कयाइ त्ति ॥ १ ॥
अणाईयं परिन्नाय अणवदग्गे त्ति वा पुणो ।
सासयमसासए वा इइ दिट्ठिं न धारए ॥ २ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ३ ॥
समुच्छिहन्ति सत्थारो सव्वे पाणा अणेलिसा ।
गण्ठिगा वा भविस्सन्ति सासयं ति व नो वए ॥ ४ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ५ ॥
जे केइ खुद्दगा पाणा अदुवा सन्ति महालया ।
सरिसं तेहि वेरं ति असरिसं ति य नो वए ॥ ६ ॥
एएहिं दोहि ठाणेहिं ववहारो न विज्जई ।
एएहिं दोहि ठाणेहिं अणायारं तु जाणए ॥ ७ ॥
अहाक्कम्माणि भुञ्जन्ति, अन्नमन्ने सकम्मुणा ।
उवालत्ते त्ति जागिज्जा अगुवालत्ते त्ति वा पुणो ॥ ८ ॥

एएहिं दोहि ठाणेहिं ववहारो न विज्झई ।
 एएहिं दोहि ठाणेहिं अणायारं तु जाणए ॥ ९ ॥
 जामिदं ओरालमाहारं कम्मगं च तहेव य ।
 सव्वत्थ वीरियं अत्थि नत्थि सव्वत्थ वीरियं ॥ १० ॥
 एएहिं दोहि ठाणेहिं ववहारो न विज्झई ।
 एएहिं दोहि ठाणेहिं अणायारं तु जाणए ॥ ११ ॥
 नत्थि लोए अलोए वा नेवं सन्नं निवेसए ॥
 अत्थि लोए अलोए वा एवं सन्नं निवेसए ॥ १२ ॥
 नत्थि जीवा अजीवा वा नेवं सन्नं निवेसए ।
 अत्थि जीवा अजीवा वा एवं सन्नं निवेसए ॥ १३ ॥
 नत्थि धम्मे अधम्मे वा नेवं सन्नं निवेसए ।
 अत्थि धम्मे अधम्मे वा एवं सन्नं निवेसए ॥ १४ ॥
 नत्थि बन्धे व मोक्खे वा नेवं सन्नं निवेसए ।
 अत्थि बन्धे व मोक्खे वा एवं सन्नं निवेसए ॥ १५ ॥
 नत्थि पुण्णे व पावे वा नेवं सन्नं निवेसए ।
 अत्थि पुण्णे व पावे वा एवं सन्नं निवेसए ॥ १६ ॥
 नत्थि आसवे संवरे वा नेवं सन्नं निवेसए ।
 अत्थि आसवे संवरे वा एवं सन्नं निवेसए ॥ १७ ॥
 नत्थि वेयणा निज्जरा वा नेवं सन्नं निवेसए ।
 अत्थि वेयणा निज्जरा वा एवं सन्नं निवेसए ॥ १८ ॥
 नत्थि किरिया अकिरिया वा नेवं सन्नं निवेसए ।
 अत्थि किरिया अकिरिया वा एवं सन्नं निवेसए ॥ १९ ॥
 नत्थि कोहे व माणे वा नेवं सन्नं निवेसए ।
 अत्थि कोहे व माणे वा एवं सन्नं निवेसए ॥ २० ॥
 नत्थि माया व लोभे वा नेवं सन्नं निवेसए ।
 अत्थि माया व लोभे वा एवं सन्नं निवेसए ॥ २१ ॥

नत्थि पेज्जे व दोसे वा नेवं सन्नं निवेसए ।
 अत्थि पेज्जे व दोसे वा एवं सन्नं निवेसए ॥ २२ ॥
 नत्थि चाउरन्ते संसारे नेवं सन्नं निवेसए ।
 अत्थि चाउरन्ते संसारे एवं सन्नं निवेसए ॥ १३ ॥
 नत्थि देवो व देवी वा नेवं सन्नं निवेसए ।
 अत्थि देवो व देवी वा एवं सन्नं निवेसए ॥ २४ ॥
 नत्थि सिद्धी असिद्धी वा नेवं सन्नं निवेसए ।
 अत्थि सिद्धी असिद्धी वा एवं सन्नं निवेसए ॥ २५ ॥
 नत्थि सिद्धी नियं ठाणं नेवं सन्नं निवेसए ।
 अत्थि सिद्धी नियं ठाणं एवं सन्नं निवेसए ॥ २६ ॥
 नत्थि साहू असाहू वा नेवं सन्नं निवेसए ।
 अत्थि साहू असाहू वा एवं सन्नं निवेसए ॥ २७ ॥
 नत्थि कल्लाण पावे वा नेवं सन्नं निवेसए ।
 अत्थि कल्लाण पावे वा एवं सन्नं निवेसए ॥ २८ ॥
 कल्लाणे पावए वा वि ववहारो न विज्जइ ।
 जं वेरं तं न जागन्ति समणा बाल पण्डिया ॥ २९ ॥
 असेसं अक्खयं वावि सव्वदुक्खे इ वा पुणो ।
 वज्झा पाणा न वज्झ ति इइ वायं न नीसरे ॥ ३० ॥
 दीसन्ति समियायारा भिक्खुणो साहुजीविणो ।
 एए मिच्छोवजीवन्ति इइ दिट्ठिं न धारए ॥ ३१ ॥
 दक्खिणाए पडिलम्भो अत्थि वा नत्थि वा पुणो ।
 न वियागरेज्ज मेहावी सन्तिमगं च वूहए ॥ ३२ ॥
 इच्चेएहिं ठाणेहिं जिणदिट्ठेहि संजए ।
 धारयन्ते उ अप्पाणं आ मोक्खाए परिव्वज्जासि ॥ ३३ ॥
 त्ति वेमि ॥

अहइज्जज्जयणे छट्ठे

2 6.

पुराकडं अह इमं सुणेह मेगन्तयारी समणे पुरासी ।
 से भिक्खुणो उवणेत्ता अणेगे आइक्खएण्हिं पुढो वित्थरेणं ॥ १ ॥
 साजीविया पट्टवियाथिरेणं सभागओ गणओ भिक्खुमज्जे ।
 आइक्खमाणो बहुजन्नमत्थं न संधयाई अवरेणं पुवं ॥ २ ॥
 एगन्तमेवं अदुवा वि एण्हिं दोवन्नमन्नं न समेइ जम्हा ।
 पुव्विं च एण्हिं च अणागयं वा एगन्तमेवं पडिसंधयाइ ॥ ३ ॥
 समिच्च लोगं तसथावरणं खेमंकरे समणे माहणे वा ।
 आइक्खमाणो वि सहस्समज्जे एगन्तयं सारयई तहच्चे ॥ ४ ॥
 धम्मं कहन्तस्स उ नत्थि दोसो खन्तस्स दन्तस्स जिइन्दियस्स ।
 भासाय दोसे य विवज्जगस्स गुणे य भासाय निसेवगस्स ॥ ५ ॥
 महव्वए पञ्च अणुव्वए य तेहव पञ्चासव संवरे य ।
 विरइं इह स्सामणियम्मि पुण्णे लवावसक्की समणे ति बेमि ॥ ६ ॥
 सीओदगं सेवउ वीयकायं आहायकम्मं तह इत्थियाओ ।
 एगन्तचारिस्सिह अम्ह धम्मे तवस्सिणो नाभिसमेइ पावं ॥ ७ ॥
 सीओदगं वा तह वीयकायं आहायकम्मं तह इत्थियाओ ।
 एयाइ जाणं पडिसेवमाणा अगारिणो अस्समणा भवन्ति ॥ ८ ॥
 सिया य वीयोदग इत्थियाओ पडिसेवमाणा समणा भवन्तु ।
 अगारिणो वि समणा भवन्तु सेवन्ति ऊ तं पि तहप्पगारं ॥ ९ ॥
 जे यावि वीयोदगभोइ भिक्खू भिक्खं विहं जायइ जीवियट्ठी ।
 ते नाइसंजोगमविप्पहाय कायोवगा नन्तकरा भवन्ति ॥ १० ॥
 इमं वयं तु तुम पाउकुव्वं पावाइणो गरिहिसि सच्च एव ।
 पावाइणो पुढो पुढो किट्टयन्ता सयं सयं दिट्ठि करोन्ति पाउ ११
 ते अन्नमन्नस्स उ गरहमाणा अक्खन्ति भो समणा माहणा य ।
 सओ य अत्थी असओ य नत्थि गरहामु दिट्ठिं न गरहामु किंचि १२

न किञ्चि रूवेण भिधारयामो सदिट्टिमग्गं तु करेसु पाउं ।
 मग्गे इमे किट्टिएँ आरिएँहिं अणुत्तरे सप्पुरिसेहि अञ्जु ॥ १३ ॥
 उट्ठं अहे यं तिरियं दिसासु तसा य जे थावर जे य पाणा ।
 भूयाहिसंकाभि दुगुञ्छमाणा नो गरहइ बुसिमं किञ्चि लोए ॥ १४ ॥
 आगन्तगारे आरामगारे समणे उ भीए न उवेइ वासं ।
 दक्खा हु सन्ती बहवे मणुस्सा ऊणाइरित्ता य लवालवा य ॥ १५ ॥
 मेहाविणो सिक्खिय बुद्धिमन्ता सुत्तेहि अत्थेहि य निच्छयन्ना ।
 पुच्छिसु मा णे अणगार अन्ने इइ संकमाणो न उवेइ तत्थ ॥ १६ ॥
 नाकामकिच्चा न य बालकिच्चा रायाभियोगेण कुओ भएणं ।
 वियागरेज्ज पसिणं न वा वि सकामकिच्चेणिह आरियाणं ॥ १७ ॥
 गन्ता च तत्था अदुवा अगन्ता वियागरेज्जा समियासुपन्ने ।
 अणारिया दंसणओ परित्ता इइ संकमाणो न उवेइ तत्थ ॥ १८ ॥
 पणं जहा वणिए उदयट्ठी आयस्स हेउं पगरेइ सज्जं ।
 तयोवमे समणे नायपुत्ते इच्चेव मे होइ मई वियक्को ॥ १९ ॥
 नवं न कुज्जा विहुणे पुराणं चिच्चामइं ताइ यमाह एवं ।
 एयावया बम्भवइ त्ति बुत्ता तस्सोदयट्ठी समणे त्ति बेमि ॥ २० ॥
 समारभन्ते वणिया भूयगामं परिग्गहं चेव ममायमाणा ।
 ते नाइसंजोगमविप्पहाय आयस्स हेउं पगरेन्ति सज्जं ॥ २१ ॥
 वित्तेसिणो मेहुणसंपगाढा ते भोयणट्ठा वणिया वयन्ति ।
 वयं तु कामेसु अज्जोववन्ना अणारिया पेमरसेसु गिद्धा ॥ २२ ॥
 आरम्भगं चेव परिग्गहं च अविउस्सिया निस्सिय आयदण्डा ।
 तेसिं च से उदए जं वयासी चउरन्तणन्ताय दुहाय नेह ॥ २३ ॥
 नेगन्ति नच्चन्ति य ओदए सो वयन्ति ते दो विगुणोदयम्मि ।
 से उदए साइमणन्तपत्ते तमुदयं साहयइ ताइ नाई ॥ २४ ॥
 अहिसयं सव्वपयाणुकम्पी धम्मे ठियं कम्मविवेगहेउं ।
 तमायदण्डेहि समायरन्ता अबोहिए ते पडिरूवमेयं ॥ २५ ॥

पिण्णागपिण्डीमवि विद्ध सूले केई पएज्जा पुरिसे इमे त्ति ।
 अलाउयं वा वि कुमारए त्ति स लिप्पई पाणिवहेण अम्हं ॥ २६ ॥
 अहवा वि विद्धूण मिलक्खु सूले पिण्णागबुद्धीह नरं पएज्जा ।
 कुमारगं वा वि अलावुयं ति न लिप्पई पाणिवहेण अम्हं ॥ २७ ॥
 पुरिसं च विद्धूण कुमारगं वा सूलंमि केई पए जायतेए ।
 पिण्णागपिण्डं सइमारुहेत्ता बुद्धाण तं कप्पइ पारणाए ॥ २८ ॥
 सिणायगाणं तु दुवे सहस्से जे भोयए नियए भिक्खुयाणं ।
 ते पुण्णखन्धं सुमह जिणित्ता भवन्ति आरोप्प महन्त सत्ता ॥ २९ ॥
 अजोगरूवं इह संजयाणं पावं तु पाणाण पसज्ज काउं ।
 अबोहिए दोण्ह वि तं असाहु वयन्ति जे यावि पडिस्सुणन्ति ॥ ३० ॥
 उट्ठं अहे यं तिरियं दिसासु विन्नाय लिङ्गं तसथावराणं ।
 भूयाभिसंकाइ दुगुच्छमाणे वए करेज्जा व कुओ विहत्थि ॥ ३१ ॥
 पुरिसे त्ति विन्नत्ति न एवमत्थि अणारिए से पुरिसे तथा हु ।
 को संभवो पिण्णागपिण्डियाए वाया वि एसा बुइया असच्चा ॥ ३२ ॥
 वायाभियोगेण जमावहेज्जा नो तारिसं वायमुदाहरेज्जा ।
 अट्टाणमेयं वयणं गुणाणं नो दिक्खिए वूय सुरालमेयं ॥ ३३ ॥
 लद्धे अट्टे अहो एव तुब्भे जीवाणुभागे सुविचिन्तिए व ।
 पुच्चं समुदं अवरं च पुट्टे ओलोइए पाणितले ठिए वा ॥ ३४ ॥
 जीवाणुभागं सुविचिन्तयन्ता आहारिया अन्नविहीए सोहिं ।
 न वियागरे छन्नपओपजीवी एसोऽणुधम्मो इह संजयाणं ॥ ३५ ॥
 सिणायगाणं तु दुवे सहस्से जे भोयए नियए भिक्खुयाणं ।
 असंजए लोहियपाणि से ऊ नियच्छई गरिहमिहेव लोए ॥ ३६ ॥
 थूलं उरब्भं इह मारियाणं उट्ठिभत्तं च पगप्पएत्ता ।
 तं लोणतेल्लेण उवक्खडेत्ता सपिप्पलीयं पगरन्ति मंसं ॥ ३७ ॥
 तं भुञ्जमाणा पिसियं पभूयं नो ओवलिप्पासु वयं रएणं ।
 इच्चेवमाहंसु अणज्जधम्मा अणारिया बाल रसेसु गिद्धा ॥ ३८ ॥

ते यावि भुञ्जन्ति तहप्पगारं सेवन्ति ते पावमजाणमाणा ।
 मणं न एयं कुसला करेन्ति वाया वि एसा बुइया उ मिच्छा ॥ ३९ ॥
 सव्वेसि जीवाण दयइयाए सावज्जदोसं परिवज्जयन्ता ।
 तस्संकिणो इसिणो नायपुत्ता उदिट्ठमत्तं परिवज्जयन्ति ॥ ४० ॥
 भूयाभिसंकाएँ दुगुञ्छमाणा सव्वेसि पाणाण निहाय दण्डं ।
 तम्हा न भुञ्जन्ति तहप्पगारं एसोऽणुधम्मो इह संजयाणं ॥ ४१ ॥
 निग्गन्थधम्मम्मि इमं समाहिं अस्सि सुट्ठिच्चा अणिहे चरेज्जा ।
 बुद्धे मुणी सीलगुणोववेए अच्चत्थतं पाउणई सिलोगं ॥ ४२ ॥
 रिणायगाणं तु दुवे सहस्से जे भोयए नियए माहणाणं ।
 ते पुण्णखन्धे सुमहज्जणित्ता भवन्ति देवा इइ वेयवाओ ॥ ४३ ॥
 सिणायगाणं तु दुवे सहस्से जे भोयए नियएँ कुलालयाणं ।
 से गच्छई लोलुवसंपगाटे तिव्वाभितावी नरगाभिसेवी ॥ ४४ ॥
 दयावरं धम्म दुगुञ्छमाणा वहावहं धम्म पसंसमाणा ।
 एगं पि जे भोययई असीलं निवो निसं जाइ कुओऽसुरेहिं ॥ ४५ ॥
 दुहओ वि धम्मम्मि समुट्ठियामो अस्सि सुट्ठिच्चा तह एसकालं ।
 आयारसीले बुइएह नाणी न संपरायम्मि विसेसमत्थि ॥ ४६ ॥
 अच्चत्तरूवं पुरिसं महन्तं सणातणं अक्खयमच्चयं च ।
 सव्वेसु भूएसु वि सव्वओ से चन्दो व ताराहि समत्तरूवे ॥ ४७ ॥
 एवं न मिज्जन्ति न संसरन्ति न माहणा खत्तिय वेस पेसा ।
 क्रीडा य पक्खी य सरीसिवा य नरा य सव्वे तह देवलोगा ॥ ४८ ॥
 लोगं अयाणित्तिह केवलेणं कहन्ति जे धम्ममजाणमाणा ।
 नासन्ति अप्पाण परं च नट्टा संसार घोरम्मि अणोरपारे ॥ ४९ ॥
 लोगं विजाणन्तिह केवलेणं पुण्णेण नाणेण समाहिजुत्ता ।
 धम्मं समत्तं च कहन्ति जे उ तारन्ति अप्पाण परं च तिण्णा ॥ ५० ॥
 जे गरहियं ठाणमिहावसन्ति जे यावि लोए चरणोववेया ।
 उदाहडं तं तु समं मईए अहाउसो विप्परियासमेव ॥ ५१ ॥

संवच्छरेणावि य एगमेगं बाणेण मारेउ महागयं तु ।
 सेसाण जीवाण दयट्टयाए वासं वयं वित्ति पकप्पयामो ॥ ५२ ॥
 संवच्छरेणावि य एगमेगं पाणं हणन्ता अणियत्तदोसा ।
 सेसाण जीवाण वहेण लग्गा सिया य थोवं गिहिणो वि तम्हा ॥ ५३ ॥
 संवच्छरेणावि य एगमेगं पाणं हणन्ता समणव्वएसु ।
 आयाहिए से पुरिसे अणजे न तारिसे केवल्लिणो भवन्ति ॥ ५४ ॥
 बुद्धस्स आणाए इमं समाहिं अस्सिं सुठिच्चा तिविहेण ताई ।
 तरिउं समुदं व महाभवोवं आयाणवं धम्ममुदाहोरेज्ज ॥ ५५ ॥
 ति बेमि ॥

अद्दइज्जज्झयणं छट्ठं

नालन्दइज्जज्झयणे सत्तमे

2. 7.

तेणं कालेणं तेणं समएणं रायगिहे नामं नयरे होत्था रिद्धि-
 त्थिमियसामिद्धे (वण्णओ) जाव पडिरूवे । तस्स णं रायगिहस्स नयरस्स
 बहिया उत्तरपुरत्थिमे दिसीभाए एत्थ णं नालन्दा नामं बाहिरिया
 होत्था अणेगभवणसयसंनिविट्ठा जाव पडिरूवा । तत्थ णं नालन्दाए
 बाहिरियाए लेवे नामं गाहावई होत्था अट्ठे दित्ते वित्ते वित्थिण्णविपुल-
 भवणसयणासणजाणवाहणाइण्णे बहुधणवहुजायरूवरजए आओग-
 पओगसंपउत्ते विच्छड्डियपउरभत्तपाणे बहुदासीदासगोमहिसगवेलग-
 प्पभूए बहुजणस्स अपरिभूए यावि होत्था ॥ १ ॥

से णं लेवे नामं गाहावई समणोवासए यावि होत्था अभिगय-
 जीवाजीवे जाव विहरइ निग्गन्थे पावयणे निस्संकिए निक्कंखिए निव्विइ-
 गिच्छे लद्धट्ठे गहियट्ठे पुच्छियट्ठे विणिच्छियट्ठे अभिगहियट्ठे अट्ठिमिच्चा
 पेमाणुरागरत्ते । अयमाउसो निग्गन्थे पावयणे, अयं अट्ठे, अयं परमट्ठे,
 सेसे अणट्ठे, उस्सियफल्लिहे अप्पावयदुवारि चियत्तन्तेउरप्पवेसे चाउद्दसट्ठ-

मुद्दिद्वपुष्णमासिणीसु पडिपुष्णं पोसहं सम्मं अणुपालेमाणे समणे
निग्गन्थे तहाविहेणं एसणिज्जेणं असणपाणखाइमसाइमेणं पडिलाभेमाणे
बहुहिं सीलव्वयगुणाविरमणपच्चक्खाणपोसहोववासेहिं अप्पाणं भावेमाणे
एवं च णं विहरइ ॥ २ ॥

तस्स णं लेवस्स गाहावइस्स नालन्दाए बाहिरियाए उत्तरपुरत्थिमे
दिसिभाए एत्थ णं सेसदविया नामं उदगसाला होत्था अणेगखम्भ-
सयसंनिविट्ठा पासादीया जाव पडिरूवा । तीसे णं सेसदवियाए उदग-
सालाए उत्तरपुरत्थिमे दिसिभाए एत्थ णं हत्थिजामे नामं वणसण्डे
होत्था किण्हे (वण्णओ वणसण्डस्स) ॥ ३ ॥

तस्सि च णं गिहपदेसम्मि भगवं गोयमे विहरइ, भगवं च णं अहे
आरामंसि । अहे णं उदए पेढालपुत्ते भगवं पासावच्चिजे निगण्ठे मेयजे
गोत्तेणं जेणेव भगवं गोयमे तेणेव उवागच्छइ, उवागच्छित्ता भगवं
गोयमं एवं वयासी-आउसंतो गोयमा, अत्थि खलु मे केइ पदेसे
पुच्छियव्वे, तं च आउसो अहासुयं अहादरिसियं मे वियागरेहि सवायं ।
भगवं गोयमे उदयं पेढालपुत्तं एवं वयासी-अविद्याइ आउसो, सोच्चा
निसम्म जाणिस्सामो सवायं । उदए पेढालपुत्ते भगवं गोयमं एवं वयासी ॥४॥

आउसो गोयमा, अत्थि खलु कुमारपुत्तिया नाम समणा निग्गन्था
तुम्हाणं पवयणं पवयमाणा गाहावइं समणोवासगं उवसंपन्नं एवं पच्च-
क्खावेन्ति । नन्नत्थ अभिओएणं गाहावइचोरग्गहणविमोक्खणयाए तसेहिं
पाणेहिं निहाय दण्डं । एवं ण्हं पच्चक्खन्ताणं दुप्पच्चक्खायं भवइ ।
एवं ण्हं पच्चक्खावेमाण्णं दुप्पच्चक्खावियव्वं भवइ । एवं ते परं पच्च-
क्खावेमाणा अइयरन्ति सयं पइण्णं । कस्स णं तं हेउं ? संसारिया
खलु पाणा, थावरा वि पाणा तसत्ताए पच्चायन्ति, तसा वि पाणा थावर-
त्ताए पच्चायन्ति, थावरकायाओ विप्पमुच्चमाणा तसकायंसि उववज्जन्ति,
तसकायाओ विप्पमुच्चमाणा थावरकायंसि उववज्जन्ति । तेसिं च णं थावर-
कार्थेसि उववण्णणं ठण्णमेयं घत्तं ॥ ५ ॥

एवं ष्हं पञ्चक्खावन्ताणं सुपञ्चक्खायं भवइ । एवं ष्हं पञ्चक्खावे-
माणानं सुपञ्चक्खावियं भवइ । एवं ते परं पञ्चक्खावेमाणा नाइयरन्ति
सयं पइण्णं नन्नत्थ अभियोगेणं गाहावइचोरग्गहणविमोक्खणयाए
तसभूएहिं पाणेहिं निहाय दण्डं । एवमेव सइ भासाए परक्कमे विज्जमाणे
जे ते कोहा वा लोहा वा परं पञ्चक्खावेन्ति अयं पि नो उवएसे नो
नेयाउए भवइ । अवियाइ आउसो गोयमा तुब्भं पि एवं रोयइ ? ॥६॥

सवार्यं भगवं गोयमे उदयं पेढालपुत्तं एवं वयासी-आउसन्तो
उदगा, नो खलु अम्हे एयं रोयइ । जे ते समणा वा माहणा वा एव-
माइक्खन्ति जाव परूवेन्ति नो खलु ते समणा वा निग्गन्था भासं
भासन्ति, अणुतावियं खलु ते भासं भासन्ति, अब्भाइक्खन्ति खलु ते
समणे समणोवासए वा जेहिं पि अन्नेहिं जीवेहिं पाणेहिं भूएहिं
सत्तेहिं संजमयन्ति ताण वि ते अब्भाइक्खन्ति । कस्स णं तं हेउं ?
संसारिया खलु पाणा, तसा वि पाणा थावरत्ताए पञ्चायन्ति थावरा वि
वा पाणा तसत्ताए पञ्चायन्ति तसकायाओ विप्पमुच्चमाणा थावरकायंसि
उववज्जन्ति, थावरकायाओ विप्पमुच्चमाणा तसकायंसि उववज्जन्ति, तेसिं
च णं तसकायंसि उववन्नाणं ठाणभेयं अघत्तं ॥ ७ ॥

सवार्यं उदए पेढालपुत्ते भगवं गोयमं एवं वयासी-कयरे खलु ते
आउसन्तो गोयमा तुब्भे वयह तसा पाणा तसा आउ अन्नहा ? सवार्यं
भगवं गोयमे उदयं पेढालपुत्तं एवं वयासी-आउसन्तो उदगा जे तुब्भे
वयह तसभूया पाणा तसा ते वयं वयामो तसा पाणा, थे वयं वयामो तसा
पाणा ते तुब्भे वयह तसभूया पाणा । एए सन्ति दुवे ठाणा तुल्ला एगट्टा ।
किमाउसो इमे भे सुप्पणीयतराए भवइ तसभूया पाणा तसा, इमे भे दुप्पणी-
यतराए भवइ-तसा पाणा तसा । तओ एगमाउसो पडिकोसह एकं अभि-
नन्दह । अयं पि भेदो से नो नेयाउए भवइ । भगवं च णं उदाहु-सन्ते-
गइया मणुस्सा भवन्ति, तेसिं च जं एवं वुत्तपुव्वं भवइ-नो खलु वयं
संचाएमो मुण्डा भवित्ता अगाराओ अणगारियं पव्वइत्तए । सवार्यं ष्हं

अणुपुञ्चणं गुत्तस्स लिसिस्सामो । ते एवं संखवेन्ति, ते एवं संखं
ठवयन्ति ते एवं संखं ठवयन्ति नन्नत्थ अभिओएणं गाहावइचोरग्गहण-
विमोक्खणयाए तसेहिं पाणेहिं निहाय दण्डं । तं पि तेसिं कुसलमेव
भवइ ॥ ८ ॥

तसा वि वुच्चन्ति तसा तससंभारकडेणं कम्मणा नामं च णं अब्भुव-
गयं भवइ, तसाउयं च णं पलिक्खीणं भवइ, तसकायट्ठिइया ते
तओ आउयं विप्पजहन्ति । ते तओ आउयं विप्पजहिता थावरत्ताए
पच्चायन्ति । थावरा वि वुच्चन्ति थावरा थावरसंभारकडेणं कम्मणा नामं
च णं अब्भुवगयं भवइ थावराउयं च णं पलिक्खीणं भवइ । थावर-
कायट्ठिइया ते तओ आउयं विप्पजहन्ति तओ आउयं विप्पजहिता
भुज्जो परलोइयत्ताए पच्चायन्ति । ते पाणा वि वुच्चन्ति, ते तसा वि
वुच्चन्ति, ते महाकाया ते चिरट्ठिइया ॥ ९ ॥

सवायं उदए पेढालपुत्ते भयवं गोयमं एवं वयासी-आउसन्तो गोयमा
नत्थि णं से केइ परियाए जं णं समणोवासगस्स एगपाणाइवाय-
विरए वि दण्डे निक्खित्ते । कस्स णं तं हेउं ? संसारिया खलु पाणा,
थावरा वि पाणा तसत्ताए पच्चायन्ति, तसा वि पाणा थावरत्ताए पच्चा-
यन्ति, थावरकायाओ विप्पमुच्चमाणा सव्वे तसकायंसि उववज्जन्ति, तस-
कायाओ विप्पमुच्चमाणा सव्वे थावरकायंसि उववज्जन्ति, तेसिं च णं
थावरकायंसि उववन्नाणं ठाणमेयं घत्तं । सवायं भगवं गोयमे उदयं
पेढालपुत्तं एवं वयासी-नो खलु आउसो अम्हाकं वत्तव्वएणं तुब्भं चैव
अणुपुत्राएणं अत्थि णं से परियाए जे णं समणोवासगस्स सव्वपाणेहिं
सव्वभूएहिं सव्वजीवेहिं सव्वसत्तेहिं दण्डे निक्खित्ते भवइ । कस्स णं
तं हेउं ? संसारिया खलु पाणा, तसा वि पाणा थावरत्ताए पच्चायन्ति,
थावरा वि पाणा तसत्ताए पच्चायन्ति, तसकायाओ विप्पमुच्चमाणा सव्वे
थावरकायंसि उववज्जन्ति, थावरकायाओ विप्पमुच्चमाणा सव्वे तस-
कायंसि उववज्जन्ति, तेसिं च णं तसकायंसि उववन्नाणं ठाणमेयं अघत्तं ।

ते पाणा वि बुचन्ति, ते तसा वि बुचन्ति, ते महाकाया ते चिरद्विद्या ।
ते बहुयरगा पाणा जेहिं समणोवासगस्स सुपच्चक्खायं भवइ । ते
अप्पयरगा पाणा जेहिं समणोवासगस्स अपच्चक्खायं भवइ । से महया
तसकायाओ उवसन्तस्स उवद्वियस्स पडिविरयस्स जं णं तुब्भे वा अन्नो
वा एवं वयह-नत्थि णं से केइ परियाए जंसि समणोवासगस्स एगपाणाए
वि दण्डे निक्खित्ते । अयं पि भेदे से नो नेयाउए भवइ ॥ १० ॥

भगवं च णं उदाहु नियण्ठा खलु पुच्छियव्वा । आउसन्तो
नियण्ठा इह खलु सन्तेगइया मणुस्सा भवन्ति । तेसिं च एवं वुत्तपुव्वं
भवइ-जे इमे मुण्डे भवित्ता अगाराओ अणगारियं पव्वइए एसिं च
णं आमरणन्ताए दण्डे निक्खित्ते । जे इमे अगारमावसन्ति एएसिं णं
आमरणन्ताए दण्डे नो निक्खित्ते । केई च णं समणा जाव वासाइं
चउपञ्चमाइं छट्ठसमाइं अप्पयरो वा भुज्जयरो वा देसं दूइज्जित्ता अगार-
मावसेज्जा ? हंता-वसेज्जा । तस्स णं तं गारत्थं वहमाणस्स से पच्च-
क्खाणे भज्जे भवइ ? नो इण्ठे समडे । एवमेव समणोवासगस्स वि
तसेहिं पाणेहिं दण्डे निक्खित्ते, थावरेहिं पाणेहिं दण्डे नो निक्खित्ते ।
तस्स णं तं थावरकायं वहमाणस्स से पच्चक्खाणे नो भज्जे भवइ । से
एवमायाणह ? नियण्ठा । एवमायाणियव्वं ॥ भगवं च णं उदाहु
नियण्ठा खलु पुच्छियव्वा-आउसन्तो नियण्ठा इह खलु गाहावई वा
गाहावइपुत्तो वा तहप्पगारेहिं कुलेहिं आगम्म धम्मं सवणवत्तिर्यं उवसं-
कमेज्जा ? हन्ता उवसंकमेज्जा । तेसिं च णं तहप्पगाराणं धम्मं आइक्खियव्वे?
हन्ता आइक्खियव्वे । किं ते तहप्पगारं धम्मं सोच्चा निसम्म एवं वएज्जा-
इणमेव निग्गन्थं पावयणं सच्चं अणुत्तरं केवलियं पडिपुण्णं संसुद्धं नेयाउयं
सल्लकत्तणं सिद्धिमग्गं मुत्तिमग्गं निज्जाणमग्गं निव्वाणमग्गं अवितहमसं-
दिद्धं सव्वदुक्खप्पहीणमग्गं । एत्थ ठिया जीवा सिज्जन्ति बुज्जन्ति
मुचन्ति परिणिव्वायन्ति सव्वदुक्खाणमन्तं करोन्ति । तमाणाए तहा
गच्छामो तहा चिहामो तहा निसीयामो तहा तुयडामो तहा भुज्जामो

तहा भासामो तहा अब्भुट्टामो तहा उट्टाए उट्टेमो त्ति पाणाणं भूयाणं जीवाणं सत्ताणं संजमेणं संजमामो त्ति वएज्जा ? हन्ता वएज्जा । किं ते तहप्पगारा कप्पन्ति पव्वावित्तए ? हन्ता कप्पन्ति । किं ते तहप्पगारा कप्पन्ति मुण्डावित्तए ? हन्ता कप्पन्ति । किं ते तहप्पगारा कप्पन्ति सिक्खावित्तए ? हन्ता कप्पन्ति । किं ते तहप्पगारा कप्पन्ति उवट्टावित्तए ? हन्ता कप्पन्ति । तेसिं च णं तहप्पगाराणं सव्वपाणेहिं जाव सव्वसत्तेहिं दण्डे निक्खित्ते ? हन्ता निक्खित्ते । से णं एयारूवेणं विहारेणं विहरमाणा जाव वासाइं चउपञ्चमाइं छट्ठदसमाइं वा अप्पयरो वा भुज्जयरो वा देसं दूइजेत्ता अगारं वएज्जा ? हन्ता वएज्जा । तस्स णं सव्वपाणेहिं जाव सव्वसत्तेहिं दण्डे नो निक्खित्ते ? नो इण्ढे समट्ठे । से जे से जीवे जस्स परेणं सव्वपाणेहिं जाव सव्वसत्तेहिं दण्डे नो निक्खित्ते । से जे से जीवे जस्स आरेणं सव्वपाणेहिं जाव सत्तेहिं दण्डे निक्खित्ते । से जे से जीवे जस्स इयाणिं सव्वपाणेहिं जाव सत्तेहिं दण्डे नो निक्खित्ते भवइ, परेणं असंजए आरेणं संजए, इयाणिं असंजए, असंजयस्स णं सव्वपाणेहिं जाव सत्तेहिं दण्डे नो निक्खित्ते भवइ । से एवमायाणह ? नियण्ठा से एवमायाणियव्वं ॥ भगवं च णं उदाहु नियण्ठा खलु पुच्छियव्वा-आउसन्तो नियण्ठा इह खलु परिव्वाइया वा परिव्वाइयाओ वा अन्नयोरेहितो तित्थाययणेहितो आगम्म धम्मं सवणवत्तियं उवसंक्रमेज्जा ? हन्ता उवसंक्रमेज्जा । किं तेसिं तहप्पगारेणं धम्मे आइक्खियव्वे ? हन्ता आइक्खियव्वे । तं चेव उवट्टावित्तए जाव कप्पन्ति ? हन्ता कप्पन्ति । किं ते तहप्पगारा कप्पन्ति संभुज्जित्तए ? हन्ता कप्पन्ति । तेणं एयारूवेणं विहारेणं विहरमाणा तं चेव जाव अगारं वएज्जा ? हन्ता वएज्जा । ते णं तहप्पगारा कप्पन्ति संभुज्जित्तए ? नो इण्ढे समट्ठे । से जे से जीवे जे परेणं नो कप्पन्ति संभुज्जित्तए । से जे से जीवे आरेणं कप्पन्ति संभुज्जित्तए । से जे से जीवे जे इयाणिं नो कप्पन्ति संभुज्जित्तए । परेणं अस्समणे आरेणं समणे, इयाणिं अस्समणे,

अस्समणेणं साद्धिं नो कप्पन्ति समणाणं निगन्थाणं संभुञ्जित्तए । से एवमायाणह ? नियण्ठा से एवमायाणियव्वं ॥ ११ ॥

भगवं च णं उदाहु सन्तेगइया समणोवासगा भवन्ति । तेसिं च णं एवं वुत्तपुव्वं भवइ-नो खलु वयं संचाएमो मुण्डा भवित्ता अगाराओ अणगारियं पव्वइत्तए । वयं णं चाउद्दसमुद्धिद्वपुण्णिमासिणीसु पडिपुण्णं पोसहं सम्मं अणुपालेमाणा विहारिस्सामो । थूलगं पाणाइवायं पच्चक्खाइस्सामो, एवं थूलगं मुसावायं थूलगं अदिन्नादाणं थूलगं मेहुणं थूलगं परिग्गहं पच्चक्खाइस्सामो । इच्छापरिमाणं करिस्सामो, दुविहं तिविहेणं । मा खलु ममद्दाए किंचि करेह वा करावेह वा तत्थ वि पच्चक्खाइस्सामो । ते णं अभोच्चा अपिच्चा असिणाइत्ता आसन्दीपेठियाओ पच्चोरुहित्ता, ते तहा कालगया किं वत्तव्वं सिया-सम्मं कालगय त्ति ? वत्तव्वं सिया । ते पाणा वि वुच्चन्ति ते तसा वि वुच्चन्ति ते महाकाया ते चिराद्विइया । ते बहुयरगा पाणा जेहिं समणोवासगस्स सुपच्चक्खायं भवइ । ते अप्पयरगा पाणा जेहिं समणोवासगस्स अपच्चक्खायं भवइ । इति से महयाओ जं णं तुब्भे वयह तं चेव जाव अयं पि भेदे से नो नेयाउए भवइ ॥ भगवं च णं उदाहु सन्तेगइया समणोवासगा भवन्ति । तेसिं च णं एवं वुत्तपुव्वं भवइ-नो खलु वयं संचाएमो मुण्डा भवित्ता अगाराओ जाव पव्वइत्तए । नो खलु वयं संचाएमो चाउद्दसमुद्धिद्वपुण्णिमासिणीसु जाव अणुपालेपाणे विहारित्तए । वयं णं अपच्छिममामरणन्तियं संलेहणाजूसणाजूसिया भत्तपाणं पडियाइक्खिया जाव कालं अणवकंखमाणा विहारिस्सामो । सव्वं पाणाइवायं पच्चक्खाइस्सामो जाव सव्वं परिग्गहं पच्चक्खाइस्सामो तिविहं तिविहेणं मा खलु ममद्दाए किंचि वि जाव आसन्दीपेठियाओ पच्चोरुहित्ता एए तहा कालगया, किं वत्तव्वं सिया सम्मं कालगय त्ति ? वत्तव्वं सिया । ते पाणा वि वुच्चन्ति जाव अयं पि भेदे से नो नेयाउए भवइ ॥ भगवं च णं उदाहु सन्तेगइया मणुस्सा भवन्ति । तं जहा-महइच्छा महारम्भा महापरिग्गहा

णं उदाहु सन्तेगइया मणुस्सा भवन्ति । तं जहा—अणारम्भा अपरिग्गहा धम्मिया धम्माणुया जाव सच्चाओ परिग्गहाओ पडिविरया जावज्जीवाए, जेहिं समणोवासगस्स आयाणसो आमरणन्ताए दण्डे निक्खित्ते, ते तओ आउगं विप्पजहन्ति, ते तओ भुज्जो सगमायाए सोग्गइगामिणो भवन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्ते-गइया मणुस्सा भवन्ति । तं जहा—अप्यिच्छा अप्पारम्भा अप्पपरिग्गहा धम्मिया धम्माणुया जाव एगच्चाओ परिग्गहाओ अप्पडिविरया, जेहिं समणोवासगस्स आयाणसो आमरणन्ताए दण्डे निक्खित्ते । ते तओ आउगं विप्पजहन्ति, तओ भुज्जो सगमादाए सोग्गइगामिणो भवन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्तेगइया मणुरसा भवन्ति । तं जहा—आरणिण्या आवसाहिया गाम-णियन्तिया कण्हुईरहास्सिया, जेहिं सण्णोवासगस्स आयाणसो आमरणन्ताए दण्डे निक्खित्ते भवइ । नो बहुसंजया नो बहुपडिविरया पाण-भूयजीवसत्तोहिं । अप्पणा सच्चाओसाइं एवं विप्पडिवेदेन्ति—अहं न हन्तव्वो अन्ने हन्तव्वा जाव कालमासे कालं किच्चा अन्नयराइं आसुरि-याइं किच्चिसियाइं जाव उववत्तारो भवन्ति, तओ विप्पमुच्चमाणा भुज्जो एल्लमुयत्ताए तमोरूवत्ताए पच्चायन्ति । ते पाणा वि बुच्चन्ति जाव नो नेयाउए भवइ । भगवं च णं उदाहु सन्तेगइया पाणा दीहाउया जेहिं समणोवासगस्स आयाणसो आमरणन्ताए जाव दण्डे निक्खित्ते भवइ । ते पुव्वामेव कालं करोन्ति करित्ता पारलोइयत्ताए पच्चायन्ति । ते पाणा वि बुच्चन्ति, ते तसा वि बुच्चन्ति । ते महाकाया ते चिरट्टिइया ते दीहाउया ते बहुयरगा, जेहिं समणोवासगस्स सुपच्चक्खार्यं भवइ, जाव नो नेयाउए भवइ । भगवं च णं उदाहु सन्तेगइया पाणा समाउया, जेहिं समणोवासगस्स आयाणसो आमरणन्ताए जाव दण्डे निक्खित्ते भवइ । ते सयमेव कालं करोन्ति, करित्ता पारलोइयत्ताए पच्चायन्ति । ते पाणा वि बुच्चन्ति, तसा वि बुच्चन्ति, ते

महाकाया ते समाउया ते बहुयरगा जेहिं समणोवासगस्स सुपच्चक्खायं भवइ जाव नो नेयाउए भवइ । भगवं च णं उदाहु सन्तेगइया पाणा अप्पाउया, जेहिं समणोवासगस्स आयाणसो आमरणन्ताए जाव दण्डे निक्खित्ते भवइ । ते पुब्बामेव कालं करेन्ति, करेत्ता पारलोइयत्ताए पञ्चायन्ति । ते पाणा वि बुच्चन्ति, ते तसा वि बुच्चन्ति, ते महाकाया ते अप्पाउया ते बहुयरगा पाणा, जेहिं समणोवासगस्स सुपच्चक्खायं भवइ, जाव नो नेयाउए भवइ । भगवं च णं उदाहु सन्तेगइया समणोवासगा भवन्ति । तेसिं च णं एवं वुत्तपुच्चं भवइ— नो खलु वयं संचाएमो मुण्डे भवित्ता जाव पव्वइत्तए । नो खलु वयं संचाएमो चाउदसद्व-मुदिद्वपुण्णमाभिणीसु पडिपुण्णं पोसहं अणुपालित्तए । नो खलु वयं संचाएमो अपच्छिभं जाव विहरित्तए । वयं च णं सामाइयं देसावगासियं पुरत्था पार्इयं वा पडीयं वा दाहिणं वा उदीयं वा एयावया जाव सव्वपाणेहिं जाव सव्वसत्तेहिं दण्डे निक्खित्ते सव्वपाणभूयजीवसत्तेहिं खेमंकरे अहमंसि । तत्थ आरेणं जे तसा पाणा जेहिं समणोवासगस्स आयाणसो आमरणन्ताए दण्डे निक्खित्ते । तओ आउं विप्पजहन्ति, विप्पजहित्ता तत्थ आरेणं चेव जे तसा पाणा जेहिं समणोवासगस्स आयाणसो जाव तेसु पञ्चायन्ति, जेहिं समणोवासगस्स सुपच्चक्खायं भवइ । ते पाणा वि जाव अयं पि भेदे जाव नेयाउए भवइ ॥ १२ ॥

तत्थ आरेणं जे तसा पाणा जेहिं समणोवासगस्स आयाणसो आमरणन्ताए दण्डे निक्खित्ते ते तओ आउं विप्पजहन्ति । विप्पजहित्ता तत्थ आरेणं चेव जाव थावरा पाणा जेहिं समणोवासगस्स अट्टाए दण्डे अनिक्खित्ते अणट्टाए दण्डे निक्खित्ते तेसु पञ्चायन्ति । तेहिं समणोवासगस्स अट्टाए दण्डे अनिक्खित्ते अणट्टाए दण्डे निक्खित्ते, ते पाणा वि बुच्चन्ति, ते तसा ते चिरट्टिइया जाव अयं पि भेदे से.... । तत्थ जे आरेणं तसा पाणा जेहिं समणोवासगस्स आयाणसो आमरणन्ताए ...तओ आउं विप्पजहन्ति, विप्पजहित्ता तत्थ परेणं जे तसा थावरा पाणा जेहिं सम-

णोवासगस्स आयाणसो आमरणन्ताए....तेसु पच्चायन्ति, तेहिं ममणोवास-
 गस्स सुपच्चक्खायं भवइ, ते पाणा वि जाव अयं पि भेदे से....। तत्थ
 जे आरेणं थावरा पाणा जेहिं समणोवासगस्स अट्टाए दण्डे अणिक्खित्ते
 अणट्टाए निक्खित्ते ते तओ आउं विप्पजहन्ति, विप्पजहिच्चा तत्थ आरेणं
 चेव जे तसा पाणा जेहिं समणोवासगस्स आयाणसो आमरणन्ताए ...
 तेसु पच्चायन्ति, तेसु समणोवासगस्स सुपच्चक्खायं भवइ, ते पाणा वि
 जाव अयं पि भेदे से....। तत्थ जे ते आरेणं जे थावरा पाणा जेहिं सम-
 णोवासगस्स अट्टाए दण्डे अणिक्खित्ते अणट्टाए निक्खित्ते, ते तओ आउं
 विप्पजहन्ति विप्पजहिच्चा ते तत्थ आरेणं चेव जे थावरा पाणा जेहिं
 समणोवासगस्स अट्टाए दण्डे अणिक्खित्ते अणट्टाए निक्खित्ते तेसु पच्चा-
 यन्ति । तेहिं समणोवासगस्स अट्टाए अणट्टाए ते पाणा वि जाव अयं पि भेदे
 से नो.. । तत्थ जे ते आरेणं थावरा पाणा जेहिं समणोवासगस्स अट्टाए
 दण्डे अणिक्खित्ते, अणट्टाए निक्खित्ते तओ आउं विप्पजहन्ति । विप्प-
 जहिच्चा तत्थ परेणं जे तसथावरा पाणा जेहिं समणोवासगस्स आया-
 णसो आमरणन्ताए० तेसु पच्चायन्ति । तेहिं समणोवासगस्स सुपच्चक्खायं
 भवइ । ते पाणा वि जाव अयं पि भेदे से नो नेयाउए भवइ । तत्थ जे
 ते परेणं तसथावरा पाणा जेहिं समणोवासगस्स आयाणसो आमरणन्ताए
 ते तओ आउं विप्पजहन्ति, विप्पजहिच्चा तत्थ आरेणं जे तसा पाणा जे-
 हिं समणोवासगस्स आयाणसो आमरणन्ताए....तेसु पच्चायन्ति । तेहिं
 समणोवासगस्स सुपच्चक्खायं भवइ । ते पाणा वि जाव अयं पि भेदे
 से नो नेयाउए भवइ । तत्थ जे ते परेणं तसथावरा पाणा जेहिं समणो-
 वासगस्स आयाणसो आमरणन्ताए....ते तओ आउं विप्पजहन्ति विप्पज-
 हिच्चा तत्थ आरेणं जे थावरा पाणा जेहिं समणोवासगस्स अट्टाए दण्डे
 अणिक्खित्ते अणट्टाए निक्खित्ते तेसु पच्चायन्ति, जेहिं समणोवासगस्स
 अट्टाए अणिक्खित्ते अणट्टाए निक्खित्ते जाव ते पाणा वि जाव अयं पि
 भेदे से नो....। तत्थ ते परेणं तसथावरा पाणा जेहिं समणोवासगस्स आया-

णसो आमरणन्ताए....ते तओ आउं विप्पजहन्ति । विप्पजहिता ते तत्थ परेणं
 चेव जे तसथावरा पाणा जेहिं समणोवासगस्स आयाणसो आमरणन्ताए
 तेसु पञ्चायन्ति, जेहिं समणोवासगस्स सुपच्चक्खायं भवइ । ते पाणा वि
 जाव अयं पि भेदे से नो....। भगवं च णं उदाहु न एयं भूयं न एयं
 भव्वं न एयं भविस्सइ जं णं तसा पाणा वोच्छिञ्जिहन्ति थावरा
 पाणा भविस्सन्ति, थावरा पाणा वि वोच्छिञ्जिहन्ति तसा पाणा भवि-
 स्सन्ति । अवोच्छिञ्चेहिं तसथावरोहिं पाणेहिं जं णं तुब्भे वा अन्नो वा
 एवं वदह—नत्थि णं से केइ परियाए जाव नो नेयाउए भवइ ॥ १३ ॥

भगवं च णं उदाहु आउसन्तो उदगा जे खलु समणं वा माहणं वा
 परिभासेइ मित्ति मन्नन्ति आगमित्ता नाणं आगमित्ता दंसणं आगमित्ता
 चरित्तं पावाणं कम्माणं अकरणयाए से खलु परलोगपल्लिमन्थत्ताए
 चिट्ठइ, जे खलु समणं वा माहणं वा नो परिभासइ मित्ति मन्नन्ति आग-
 मित्ता पाणं आगमित्ता दंसणं आगमित्ता चरित्तं पावाणं कम्माणं अक-
 रणयाए से खलु परलोगविसुद्धीए चिट्ठइ । तए णं से उदए पेठालपुत्ते
 भगवं गीयमं अणाठायमाणे जामेव दिस्सिं पाउब्भूए तामेव दिस्सिं पहारेत्थ
 गमणाए । भगवं च णं उदाहु आउसन्तो उदगा जे खलु तहाभूयस्स
 समणस्स वा माहणस्स वा अन्तिए एगमवि आरियं धम्मियं सुवयणं
 सोच्चा निसम्म अप्पणो चेव सुहुमाए पडिलेहाए अणुत्तरं जोगखेमपयं
 लम्भिए समाणे सो वि ताव तं आटाइ परिजाणेइ वन्दइ नमंसइ सका-
 रेइ सम्माणेइ जाव कल्लाणं मंगलं देवयं चेइयं पज्जुवासइ । तए णं
 से उदए पेठालपुत्ते भगवं गीयमं एवं तयासी—एएसिं णं भन्ते पदाणं
 पुत्थि अन्नाणयाए असवणयाए अबोहिए अणभिगमेणं अदिट्ठाणं असु-
 याणं अमुयाणं अविन्नायाणं अन्नोवगडाणं अविगूढाणं अविच्छिन्नाणं
 अणिसिट्ठाणं अणिवूढाणं अणुवहारियाणं एयमट्ठं नो सदहियं नो पत्तियं
 नो रेइयं । एएसिं णं भन्ते पदाणं एण्हि जाणयाए सवणयाए बोहिए
 जाव उवहारणयाए एयमट्ठं सदहामि पत्तियामि रोएमि एवमेव से

जहेयं तुभे वदह । तए णं भगवं गोयमे उदगं पेढालपुत्तं एवं वयासी
 —सदहाहि णं अज्जो पत्तियाहि णं अज्जो रोएहि णं अज्जो एवमेयं जहा
 णं अम्हे वयामो । तए णं से उदए पेढालपुत्ते भगवं गोयमं एवं
 वयासी—इच्छामि णं भन्ते तुब्भं अन्तिए चाउज्जामाओ धम्माओ
 पञ्चमहव्वइयं सपडिक्कमणं धम्मं उवसंपज्जित्ता णं विरहित्तए ॥ तए णं
 से भगवं गोयमे उदगं पेढालपुत्तं गहाय जेणेव समणे भगवं महावीरे
 तेणेव उवागच्छइ, उवागच्छित्ता तए णं से उदए पेढालपुत्ते समणं
 भगवं महावीरं तिक्खुत्तो आयाहिणं पयाहिणं करेइ, तिक्खुत्तो आया-
 हिणं पयाहिणं करित्ता वन्दइ नमंसइ वन्दिता नमंसित्ता एवं वयासी—
 इच्छामि णं भन्ते तुब्भं अन्तिए चाउज्जामाओ धम्माओ पञ्चमहव्वइयं
 सपडिक्कमणं धम्मं उवसंपज्जित्ता णं विहरित्तए । तए णं समणे भगवं
 महावीरे उदगं एवं वयासी—अहासुहं देवाणुप्पिया मा पडिबन्धं करेहि ।
 तए णं से उदए पेढालपुत्ते समणस्स भगवओ महावीरस्स अन्तिए चाउ-
 ज्जामाओ धम्माओ पञ्चमहव्वइयं सपडिक्कमणं धम्मं उवसंपज्जित्ता णं
 विहरइ त्ति वेमि ॥ १४ ॥

॥ नालन्दइज्जज्जयणं सत्तमं ॥

स्यगडं समत्तं

I

श्रीभद्रवाहविरचिता सूत्रकृताङ्गनिर्युक्तिः

Introduction -1-32

तित्थयरे य जिणवरे सुत्तकरे गणहरे य णमिऊणं ।
सूयगडस्स भगवओ णिञ्जुत्तिं कित्तइस्सामि ॥ १ ॥
सूयगडं अङ्गाणं विइयं तस्स य इमाणि नामाणि ।
सूतगडं सुत्तकडं सूयगडं चेव गोण्णाइं ॥ २ ॥
दव्वं तु पोण्डयादी भावे सुत्तमिह सूयगं नाणं ।
सन्नासंगहवित्ते जाइणिवद्धे य कत्थाइ ॥ ३ ॥
करणं च कारओ य कडं च तिण्हं पि छक्कनिक्खेवो ।
दव्वे खेत्ते काले भावेण उ कारओ जीवो ॥ ४ ॥
दव्वं पओगवीसस पओगसा मूल उत्तरे चेव ।
उत्तरकरणं वज्जण अत्थो उ उवक्खरो सव्वो ॥ ५ ॥
मूलकरणं सराराणि पञ्च तिसु कण्णखन्धमाइयं ।
दव्विन्दियाणि परिणामियाणि विसओसहाइहिं ॥ ६ ॥
संघायणे य परिसाडणा य मीसे तहेव पडिसेहो ।
पडसंखसगडथूणाउड्ढतिरिच्छादिकरणं च ॥ ७ ॥
खन्धेसु दुप्पएसादिएसु अब्भेसु विञ्जुमाइसु ।
णिप्फणगाणि दव्वाणि ज.ण तं वीससाकरणं ॥ ८ ॥
ण विणा आगासेणं कीरइ जं किं चि खेत्तमागासं ।
वज्जणपरियावण्णं उच्छुकरणमाइयं बहुहा ॥ ९ ॥

कालो जो जावइओ जं कीरइ जम्मि जम्मि कालम्मि ।
 ओहेण णाम्मओ पुण करणा एक्कारस हवन्ति ॥ १८ ॥
 ववं च बालवं चैव, कोलवं तेत्तिलं तथा ।
 गरादि वणियं चैव, विट्ठी हवइ सत्तमा ॥ १९ ॥
 सउणि चउप्पय नागं किंसुग्घं च करणं भवे एयं ।
 एए चत्तारि धुवा अन्ने करणा चला सत्त ॥ २० ॥
 चाउदसि रत्तीए सउणी पडिवज्जए सया करणं ।
 ततो अहक्कमं खलु चउप्पयं णाग किंसुग्घं ॥ २१ ॥
 भावे पओगवीसस पओगसा मूल उत्तरे चैव ।
 उत्तर कमसुयजोवण वण्णाई भोयणाईसु ॥ २२ ॥
 वण्णाइया य वण्णाइएसु जे केइ वीससामेला ।
 ते होन्ति थिरा अथिरा छायातवदुद्धमाईसु ॥ २३ ॥
 मूलकरणं पुण सुए तिविहे जोगे सुभासुभे ज्ञाणे ।
 ससमयसुएण पगयं अज्झवराणेण य सुहेणं ॥ २४ ॥
 ठिइअणुभावे बन्धणनिकायणनिहत्तदीहहस्सेसु ।
 संकमउदीरणाए उदए वेए उवसमे य ॥ २५ ॥
 सोउण जिणवरमयं गणहारी काउ तक्खओवसमं ।
 अज्झवसाणेण कयं सुत्तमिणं तेण स्रयगडं ॥ २६ ॥
 वइजोगेण पभासियमणेगजोगंधरण साहूणं ।
 तो वयजोगेण कयं जीवस्स सभावियगुणेण ॥ २७ ॥
 अक्खरगुणमतिसंघायणाए कम्मपरिसाडणाए य ।
 तदुभयजोगेण कयं सुत्तमिणं तेण सुत्तगडं ॥ २८ ॥
 सुत्तेण सुत्तिया चिय अत्था तह स्रइया य जुत्ता य ।
 तो बहुविहप्पउत्ता एय पसिद्धा अणाईया ॥ २९ ॥
 दो चैव सुयक्खन्धा अज्झयणाई च होन्ति तेवीसं ।
 तेत्तिसुदेसणकाला आयाराओ दुगुणमज्झं ॥ ३० ॥

निक्खेवो गाहाए चउव्विहो छव्विहो य सोलससु ।
 निक्खेवो य सुयम्मि य खन्धे य चउव्विहो होइ ॥ २३ ॥
 ससमयपरसमयपरूवणा य पाऊण बुज्झणा चेव ।
 संबुद्धस्सुवसग्गा थीदोसविवज्जणा चेव ॥ २४ ॥
 उवसग्गभीरुणो थीवसस्स णरएसु होज्ज उववाओ ।
 एव महप्पा वीरो जयमाह तहा जएज्जाह ॥ २५ ॥
 परिचत्तनिसीलकुसीलसुसीलसविग्गसीलवं चेव ।
 णाऊण वीरियदुगं पण्डियवीरिए (पयड्डिज्जा) ॥ २६ ॥
 धम्मो समाहि मग्गो समोसटा चउमु सव्ववाईसु ।
 सीसगुणदोसकहणा गन्थम्मि मया गुरुनिवान्णो ॥ २७ ॥
 आयाणिय संकलिया आयाणीयम्मि आययचरित्तं ।
 अप्पग्गन्थे पिण्डियव्वयणेणं होइ अहिगारो ॥ २८ ॥
 नामं ठव्वणा दविए खेत्ते काले कुतित्थसंगारं ।
 कुलगणसंकरगण्डी बोद्धव्वो भावसमए य ॥ २९ ॥
 महपञ्चभूय एकप्पए य तज्जीवतस्सारीरे य ।
 तह य अगारगवाई अत्तच्छट्ठो अरुलवाई ॥ ३० ॥
 वीए नियईवाओ अन्नाणिय तह य नाणवाईओ ।
 कम्मं चयं न गच्छइ चउव्विहं भिक्खुसमयम्मि ॥ ३१ ॥
 तइए आहाकम्मं कडवाई जह य ते य वाईओ ।
 किञ्चुव्वमा य चउत्थे परप्पवाई अविरएसु ॥ ३२ ॥

Com on—1 1. 1. 8.

पञ्चण्हं संजोए अन्नगुणाणं च चेषणाइगुणो ।
 पञ्चिन्दियठाणाणं ण अन्नमुणियं मुणइ अन्नो ॥ ३३ ॥

Com. on--1 1. 1. 13.

को वेएई अकयं ? कयनासो पञ्चहा गई नत्थि ।
 देवमणुस्सगयागइ जाईसरणाइयाणं च ॥ ३४ ॥

ण ह् अफलथोवणिच्छियकालफलत्तणामिहं अदुमहेऊ ।
णादुद्धथोवदुद्धत्तणे णगावित्तणे हेऊ ॥ ३५ ॥

Introduction to 1. 2. 1.

वेयालियम्मि वेयालगो य वेयालगं वियालणियं ।
तिन्नि वि चउकगाई वियालओ एत्थ पुण जीवो ॥ ३६ ॥
द्व्वं च परमुमाई दंसणणाणतवसंजमा भावे ।
द्व्वं च दारुगाई भावे कम्मं वियालणियं ॥ ३७ ॥
वेयालियं इह देसियं ति वेयालियं तओ होइ ।
वेयालियं तहा वित्तमत्थि तेणेव य णिवद्धं ॥ ३८ ॥
कामं तु सासयमिणं कहियं अट्टावयम्मि उसभेणं ।
अट्टाणउतिसुयाणं सोऊणं ते वि पवइया ॥ ३९ ॥
पढमे संवोहो अनिच्चया य वीयम्मि माणवज्जणया ।
अहिगारो पुण भणिओ तहा तहा बहुविहो तत्थ ॥ ४० ॥
उदेसम्मि य तइए अन्नाणचियस्स अवचओ भणिओ ।
वज्जेयव्वो य सया सुहप्पमाओ जइजणेणं ॥ ४१ ॥

Com. on--1 2 1 1.

द्व्वं निदावेओ दंसणणाणतवसंजमा भावे ।
अहिगारो पुण भणिओ नाणे तवदंसणचरित्ते ॥ ४२ ॥

Com on--1 2. 2 1.

तवसंजमणाणेषु वि जइ माणो वज्जिओ महेसीहिं ।
अत्तसमुकारिसत्थं किं पुण हीला उ अन्नेसिं ? ॥ ४३ ॥
जइ ताव निज्जरमओ पाडिसिद्धो अट्टमागमहणेहिं ।
अविसेसमयट्टाणा परिहरियव्वा पयत्तेण ॥ ४४ ॥

Introduction to 1. 3. 1.

उवसग्गम्मि य छकं दव्वे चेषणमचेयणं दुविहं ।
आगन्तुगो य पीलाकरो य जो सो उवस्सग्गो ॥ ४५ ॥

खेत्तं बहुओघपयं कालो एगन्तदूसमाईओ ।
 भावे कम्मव्भुदओ सो दुविहो ओघुवक्कमिओ ॥ ४६ ॥
 उवक्कमिओ संयमविग्गकरे एन्थुवक्कमे पगयं ।
 दव्वे चउव्विहो देवमणुयतिरियायसंवेत्तो ॥ ४७ ॥
 एक्केको य चउविहो अट्टविहो वा वि सोलसविहो वा ।
 घडण जयणा व तेमि एत्तो वोच्छं अहीयारं ॥ ४८ ॥
 पढमम्मि य पडिलोमा होन्ती अणुलोमगा य विइयम्मि ।
 तइए अज्झत्तविसोहणं च परवाइवयणं च ॥ ४९ ॥
 हेउसरिसेहि अहेउएहि समयपडिएहि णिउणेहिं ।
 सीलखलियपन्नवणा कया चउत्थम्मि उद्देसे ॥ ५० ॥

Com. on 1. ३. 4. 12.

जह णाम मण्डलग्गेण सिरं छेत्तूण कस्सइ मणुस्सो ।
 अच्छेज्ज पराहुत्तो किं नाम तओ ण घेप्पेज्जा ॥ ५१ ॥
 जह वा विसगण्डूसं कोई घेत्तूण नाम तुण्हिक्को ।
 अन्नेण अदीसन्तो किं नाम तओ न व मरेज्जा ॥ ५२ ॥
 जह नाम सिरिघराओ कोई रयणाणि णाम घेत्तूणं ।
 अच्छेज्ज पराहुत्तो किं णाम तओ न घेप्पेज्जा ॥ ५३ ॥

Introduction to 1. 4. 1.

दव्वाभिलावचिन्धे वेए भावे य इत्थिणिक्खेवो ।
 अहिलावे जह सिद्धी भावे वेयम्मि उवउत्तो ॥ ५४ ॥
 णामं ठवणादविए खेत्ते काले य पज्जणणकम्ममे ।
 भोगे गुणे य भावे दस एए पुरिसणिक्खेवा ॥ ५५ ॥
 पढमे संथवसंलवमाइहि खलणा उ होइ सीलस्स ।
 विइए इहेव खलियस्स अवत्था कम्मबन्धो य ॥ ५६ ॥
 छरा मो मन्नन्ता कइयवियाहिं उवहिप्पहाणाहिं ।
 गहिया हु अभयपज्जोयकूलवालाइणो बहवे ॥ ५७ ॥

तम्हा ण उ वीसम्भो गन्तव्वो णिच्चमेव इत्थीसु ।
 पढमुद्देसे भणिया जे दोसा ते गणन्तेणं ॥ ५८ ॥
 सुसमत्था व समत्था कीरन्ती अप्पसत्तिया पुरिसा ।
 दीसन्ति सूरवाई णारीवसगा ण ते सूर्रा ॥ ५९ ॥
 धम्मम्मि जो दढा मइ सो सूर्रो सत्तिओ य वीरो य ।
 ण हु धम्मणिरुस्साहो पुरिसो सूर्रो सुवलिओ वि ॥ ६० ॥
 एए चेव य दोसा पुरिससमाए वि इत्थियाणं पि ।
 तम्हा उ अप्पमाओ विरागमग्गम्मि तासिं तु ॥ ६१ ॥

Introduction to 1 5 1

गिरए छकं दव्वं गिरया उ इहेव जे भवे असुभा ।
 खेत्तं गिरओगासो कालो गिरएसु चेव ठिई ॥ ६२ ॥
 भावे उ गिरयजीवा कम्मदुओ चेव गिरयपाओगो ।
 सोऊण गिरयदुक्खं तवचरणे होइ जइयव्वं ॥ ६३ ॥
 णामंठवणादविए खेत्ते काले तहेव भावे य ।
 एसो उ विभत्तीए गिक्खेवो छव्विहो होइ ॥ ६४ ॥
 पुढवीफासं अण्णाणुवक्कम गिरयवालवहणं च ।
 तिसु वेदेन्ति अताणा अणुभागं चेव सेसासु ॥ ६५ ॥
 अम्बे अम्बरिसी चेव सामे य सबले वि य ।
 रोद्दोवरुद्द काले य महाकाले त्ति आवरे ॥ ६६ ॥
 असिपत्ते धणुं कुम्भे वालु वेयरणी वि य ।
 खरस्सरे महाघोसे एवं पन्नरसाहिया ॥ ६७ ॥
 घाडेन्ति य हाडेन्ति विन्धन्ति तह णिसुम्भन्ति ।
 मुञ्चन्ति अम्बरतले अम्बा खलु तत्थ णेरइया ॥ ६८ ॥
 ओहयहए य तहियं णिस्सन्ने कप्पणीहि कप्पन्ति ।
 विदुलगचडुलगछिन्ने अम्बरिसी तत्थ णेरइए ॥ ६९ ॥
 साडणपाडणतोडण बन्धणरञ्जुल्लयप्पहोरेहिं ।

सामा णेरइयाणं पवतयन्ती अपुण्णाणं ॥ ७० ॥
अन्तगयफिफिसाणि य हिययं कालेज्ज कुण्कुसे वक्के ।
सबला णेरइयाणं कट्टेन्ति तहिं अपुण्णाणं ॥ ७१ ॥
असिसत्तिकोन्ततोमरसूलतिसूलेसु सूइचियगामु ।
पोयन्ति रुदकम्मा उ णरगपाला तहिं रोदा ॥ ७२ ॥
भञ्जन्ति अङ्गमङ्गाणि ऊरुवाहूसिराणि करचरणे ।
कप्येन्ति कप्यणीहिं उवरुदा पावकम्मरया ॥ ७३ ॥
मीरासु सुण्ठएमु य कन्दूमु पयण्डएमु य पयन्ति ।
कुम्भीसु य लोहिएमु य पयन्ति काला उ णेरइए ॥ ७४ ॥
कप्यन्ति कागिणीमंसगाणि छिन्दन्ति सीहपुच्छाणि ।
खावन्ति य णेरइए महकाला पावकम्मरण ॥ ७५ ॥
हत्थे पाए ऊरू बाहुसिरापायअङ्गमङ्गाणि ।
छिन्दन्ति पगामं तू असि णेरइए निरयपाला ॥ ७६ ॥
कण्णोद्वणासकरचरणदरणद्वणकुण्णऊरुवाहूणं ।
छेयणभेयणसाडग असिपत्तधणूहि पाडन्ति ॥ ७७ ॥
कुम्भीसु य पयणेसु य लोहियमु य कन्दुलोहिकुम्भीसु ।
कुम्भी य णरयपाला हणन्ति पाडन्ति णरएमु ॥ ७८ ॥
तडतडतडस्स भञ्जन्ति भञ्जणे कलम्बुवालुगापट्टे ।
वालुगा णेरया लोलन्ती अम्बरतलम्मि ॥ ७९ ॥
पूयरुहिरकेसद्विवाहिणी कलकलेन्तजलसोया ।
वेयरणिणिरयपाला णेरइए ऊ पवाहन्ति ॥ ८० ॥
कप्येन्ति करकएहिं तच्छिन्ति परोप्परं परसुएहिं ।
सिम्बलितरुमारुहन्ती खरस्सरा तत्थ णेरइए ॥ ८१ ॥
भीए य पलायन्ते समन्ततो तत्थ ते णिरुम्भन्ति ।
पसुणो जहा पसुवहे महघोसा तत्थ णेरइए ॥ ८२ ॥

Introduction to 1. 6.

पाहन्ने महसदो दव्वे खेत्ते य कालभावे य ।
 वीरस्स उ णिकखेवो चउकओ होई गायव्वो ॥ ८३ ॥
 थुइणिकखेवो चउहा आगन्तुअभूसगेहिं दव्वथुई ।
 भावे सन्ताण गुणाण कित्तणा जे जहिं भाणिया ॥ ८४ ॥
 पुच्छिसु जम्बुगामो अज्ज सुहम्मा तओ कहेसी य ।
 एव महप्पा वीरो जयमाहू तथा जएज्जाहि ॥ ८५ ॥

Introduction to 1. 7.

सीले चउक दव्वे पाउरणाभरणभोयणाईसु ।
 भावे उ ओहसीलं अभिक्खमासेवणा चेव ॥ ८६ ॥
 ओहे सीलं विरई विरयाविरई य अविरइ असीलं ।
 धम्मे णाणयवाई अपरात्थ अहम्मकोवाइ ॥ ८७ ॥
 परिभासिया कुसीला य एत्थ जावन्ति अविरया केई ।
 सुत्ति पसंमा सुद्धो कुत्ति दुग्गुच्छा अपरिसुद्धो ॥ ८८ ॥
 अफ्फासुयपडिसेविय णामं भुज्जो य मीलवाई य ।
 फामुं वयन्ति सीलं अफासुया मो अशुज्जन्ता ॥ ८९ ॥
 जह णाम गोयमा चण्डिदेवगा वारिभद्दगा चेव ।
 जे अग्गिहोत्तवाई जलसोयं जे य इच्छन्ति ॥ ९० ॥

Introduction to 1. 8.

विरिए छकं दव्वे सच्चित्ताचित्तमीसगं चेव ।
 दुपयचउप्पगअपयं एयं तिविह तु सच्चित्तं ॥ ९१ ॥
 अच्चित्तं पुण विरियं आहारावरणपहरणाईसु ।
 जह ओसहीण भणियं विरियं रसवीरियविवागो ॥ ९२ ॥
 आवरणे कयथाई चक्काईवं च पहरणे होन्ति ।
 खेत्तम्मि जम्मि खेत्ते काले जं जम्मि कालम्मि ॥ ९३ ॥
 भावो जीवस्स सवीरियरस विरियम्मि लद्धि णेगविहा ।

ओरस्मिन्दियअज्झप्पिएसु बहुसो बहुविहीयं ॥ ९४ ॥
मणवइकाया आणापाणू संभव तहा य संभव्वे ।
सोत्ताईणं सदाइएसु विसएसु गहणं च ॥ ९५ ॥
उज्जमधिइधीरत्तं मोण्डीरत्तं खमा य गम्भीरं ।
उवओगजोगतवमंजमाइयं होइ अज्झप्पो ॥ ९६ ॥
सव्वं पि य तं तिविहं पण्डिय त्वालविरियं च मीसं च ।
अहवा वि होइ दुविहं अगारअणगारियं चेव ॥ ९७ ॥

Com on—1. 8 4.

सत्थं असिमाइयं विज्जामन्ते य देवकम्मकयं ।
पत्थिववारुणअग्गेय वाउ तह मीणगं चेव ॥ ९८ ॥

Introduction to 1. 9. 1.

धम्मो पुव्वुद्धिट्ठो भावधम्मण एत्थ अहिगारो ।
एसेव होइ धम्मे एसेव समाहिमग्गो त्ति ॥ ९९ ॥
णामंठवणाधम्मो द्व्वधम्मो य भावधम्मो य ।
सच्चिताचित्तमीसगगिहत्थदाणे दवियधम्मो ॥ १०० ॥
लोइयलोउत्तरिओ दुविहो पुण होइ भावधम्मो उ ।
दुविहो वि दुविहतिविहो पञ्चविहो होइ णायव्वो ॥ १०१ ॥
पासत्थोसण्णकुसील संथवो ण किर वट्टई काउं ।
सूयगोड अज्झयणे धम्मम्मि निकाइयं एयं ॥ १०२ ॥

Introduction to 1. 10. 1

आयाणपएणाघं गोणं णामं पुणो समाहि त्ति ।
णिक्खिविउण समाहिं भावसमाहीइ पगयं तु ॥ १०३ ॥
णामंठवणादविए खेत्ते काले तहेव भावे य ।
एसो उ समाहीए णिक्खेवो छव्विहो होइ ॥ १०४ ॥
पञ्चसु विसएसु सुभेसु द्व्वम्मि ता भवे समाहि त्ति ।
खेत्तं तु जम्मि खेत्ते काले कालो जहिं जो उ ॥ १०५ ॥

भावसमाहि चउव्विह दंसणणाणे तवे चरित्ते य ।
चउसु वि समाहियप्पा सम्मं चरणट्टिओ साहू ॥ १०६ ॥

Introduction to 1. 11. 1.

गामं ठवणा दविए खेत्ते काले तहेव भावे य ।
एसो खलु मग्गस्स य णिक्खेवो छव्विहो होइ ॥ १०७ ॥
फलगलयन्दोलणवित्तरज्जुदवणविलपासमग्गे य ।
खीलगअयपक्खिपहे छत्तजलाकासदव्वम्मि ॥ १०८ ॥
खेत्तम्मि जम्मि काले कालो जाह हवइ जो उ ।
भावम्मि होइ दुविहो पसत्थ तह अप्पसत्थो य ॥ १०९ ॥
दुविहम्मि वि तिगभेदो णेओ तस्स उ विणिच्छओ दुविहो ।
सुगइफलदुग्गइफलो पगयं सुगइफलेणित्थं ॥ ११० ॥
दुग्गइफलवाईणं तिण्णि तिसट्ठा सयाइ वाईणं ।
खेमे य खेमरूवे चउक्कगं मग्गमाईसु ॥ १११ ॥
सम्मप्यणिओ मग्गो णाणे तह दंसणे चरित्ते य ।
चरगपरिव्वायाईचिण्णो मिच्छत्तमग्गो उ ॥ ११२ ॥
इट्ठिरससायगुरुया छज्जीवनिकायवायनिरया य ।
जे उवदिसन्ति मग्गं कुमग्गमग्गस्सिया ते उ ॥ ११३ ॥
तवसंजमप्पहाणा गुणधारी जे वयन्ति सब्भावं ।
सव्वजगज्जीवहियं तमाहु सम्मप्यणीयामिणं ॥ ११४ ॥
पन्थो मग्गो णाओ विहि धिइ सुगई हियं तह सुहं च ।
पत्थं सेयं णिव्वुइ णिव्वाणं सिवकरं चेव ॥ ११५ ॥

Introduction to 1. 12. 1.

समवसरणे वि छक्कं सच्चित्ताचित्तमासगं दव्वे ।
खेत्तम्मि जम्मि खेत्ते काले जं जम्मि कालम्मि ॥ ११६ ॥
भावसमोसरणं पुण णायव्वं छव्विहम्मि भावम्मि ।
अहवा किरिय अकिरिया अन्नाणी चेव वेणइया ॥ ११७ ॥

अत्थि त्ति किरियवाइ वयन्ति नत्थि त्तिकिरियवाइ य ।
 अन्नाणी अन्नाणं विणइत्ता वेणइयवाइ ॥ ११८ ॥
 असियसयं किरियाणं अक्किरियाणं च होइ चुलसीई ।
 अन्नाणिय सत्तट्ठी वेणइयाणं च बत्तीसा ॥ ११९ ॥
 तेसि मताणुमएणं पन्नवणा वण्णिया इहज्झयणे ।
 सन्भावणिच्छयत्थं समोसरणमाहु तेणं तु ॥ १२० ॥
 सम्मदिट्ठी किरियावाइ मिच्छा य सेसगा वाई ।
 जहिऊण मिच्छवायं सेवह वायं इमं सच्चं ॥ १२१ ॥

Introduction to 1 13. 1.

णामतहं ठवणतहं दव्वतहं चेव होइ भावतहं ।
 दव्वतहं पुण जो जस्स सभावो होइ दव्वस्स ॥ १२२ ॥
 भावतहं पुण नियमा णायव्वं छव्विहम्मि भावम्मि ।
 अहवा वि नाणदंसणचरित्तविणएण अज्झप्पे ॥ १२३ ॥
 जह सुत्तं तह अत्थो चरणं चारो तह त्ति णायव्वं ।
 सन्तम्मि पसंसाए असई पगयं दुगुञ्छाए ॥ १२४ ॥
 आयरियपरंपरणे आगयं जो उ छेयबुद्धीए ।
 कोवेइ छेयवाइ जमालिनासं स णासिहिइ ॥ १२५ ॥
 ण करेइ दुक्खमोक्खं उज्जममाणो वि संजमतवेसुं ।
 तम्हा अत्तुकरिसो वज्जेअव्वो जइजणेणं ॥ १२६ ॥

Introduction to 1. 14. 1.

गन्थो पुव्वुद्धिट्ठो दुविहो सिस्सो य होइ णायव्वो ।
 पव्वावण सिक्खावण पगयं सिक्खावणाए उ ॥ १२७ ॥
 सो सिक्खगो य दुविहो गहणे आसेवाणाय णायव्वो ।
 गहणम्मि होइ तिविहो सुत्ते अत्थे तदुभए य ॥ १२८ ॥
 आसेवणाय दुविहो मूलगुणे चेव उत्तरगुणे य ।
 मूलगुणे पञ्चविहो उत्तरगुण बारसविहो उ ॥ १२९ ॥

आयरिओ वि य दुविहो पञ्चावन्तो व सिक्खावन्तो य ।
 सिक्खावन्तो दुविहो गहणे आसेवणे चैव ॥ १३० ॥
 गाहावेन्तो तिविहो सुत्ते अत्थे य तदुभए चैव ।
 मूलगुण उत्तरगुणे दुविहो आसेवणाए उ ॥ १३१ ॥

Introduction to 1. 15. 1.

आयाणे गहणम्मि य णिक्खेवो होइ दोण्ह वि चउक्को ।
 एगट्ठं नाणट्ठं च होज्ज पगयं तु आयाणे ॥ १३२ ॥
 जं पढमस्सन्तिमए विइयस्स उ तं हवेज्ज आदिम्मि ।
 एएणायाणिज्जं एसो अन्नो वि पज्जाओ ॥ १३३ ॥
 णामाई ठवणाई दव्वाई चैव होइ भावाई ।
 दव्वाई पुण दव्वस्स जो सभावो सए ठाणे ॥ १३४ ॥
 आगमणोआगमओ भावाई तं बुहा उवदिसन्ति ।
 णोआगमओ भावो पञ्चविहो होइ णायच्चो ॥ १३५ ॥
 आगमओ पुण आदी गणिपिडगं होइ बारसङ्गं तु ।
 गन्धसिलोगो पदपादअक्खराई च तत्थादी ॥ १३६ ॥

Introduction to 1. 16. 1.

णामंठवणागाहा दव्वगाहा य भावगाहा य ।
 पोत्थगपत्तगलिहिया सा होई दव्वगाहा उ ॥ १३७ ॥
 होइ पुण भावगाहा सागारुवओगभावणिप्फन्ना ।
 महुराभिहाणज्जुत्ता तेणं गाह ति णं विन्ति ॥ १३८ ॥
 गाहीकया व अत्था अहव ण सामुदएण छन्देणं ।
 एएण होइ गाहा एसो अन्नो वि पज्जाओ ॥ १३९ ॥
 पण्णरससु अज्झयणेसु पिण्डियत्थेसु जो आवितह ति ।
 पिण्डियवयणेणत्थं गहेइ तम्हा तओ गाहा ॥ १४० ॥
 सोलसमे अज्झयणे अणगारगुणाण वण्णणा भणिया ।
 गाहासोलसणामं अज्झयणमिणं ववदिसेन्ति ॥ १४१ ॥

Introduction to 2 1. 1.

गामंठवणादविए खेत्ते काले तहेव भावे य ।
 एसो खलु महतम्मि निकखेवो छव्विहो होइ ॥ १४२ ॥
 गामंठवणादविए खेत्ते काले तहेव भावे य ।
 एसो खलु अज्झयणे निकखेवो छव्विहो होइ ॥ १४३ ॥
 गामंठवणादविए खेत्ते काले य गगण संठाणे ।
 भावे य अट्टमे खलु णिकखेवो पोण्डरीयस्स ॥ १४४ ॥
 जो जीवो भविओ खलुव्वजिकामो य पुण्डरीयम्मि ।
 सो दव्वपुण्डरीओ भावम्मि विजाणओ भणिओ ॥ १४५ ॥
 एगभविए य बद्धाउए य अभिसुहियनामगोए य ।
 एए त्तिण्णि वि देसा दव्वम्मि य पोण्डरीयस्स ॥ १४६ ॥
 तेरिच्छिया मणुस्सा देवगणा चेव होन्ति जे पवरा ।
 ते होन्ति पुण्डरीया सेसा पुण कण्डरीया उ ॥ १४७ ॥
 जलयर थलयर खयर जे पवरा चेव होन्ति कन्ता य ।
 जे य सभावेऽणुमया ते होन्ति पोण्डरीया उ ॥ १४८ ॥
 अरिहन्त चकवट्ठी चारण विज्जाहरा दसारा य ।
 जे अन्न इट्ठिमन्ता ते होन्ति पोण्डरीया उ ॥ १४९ ॥
 भवणवइवाणमन्तरजोइसवेमाणियाण देवाणं ।
 जे तेसिं पवरा खलु ते होन्ति पोण्डरीया उ ॥ १५० ॥
 कंसाणं दूसाणं मणिमोत्तिवसिलपवालमार्इणं ।
 जे य अचित्ता पवरा ते होन्ति पोण्डरीया उ ॥ १५१ ॥
 जाइं खेत्ताइं खलु सहाणुभावाइ होन्ति लोगम्मि ।
 देवकुरुमाइयाइं ताइं खेत्ताइं पवराइं ॥ १५२ ॥
 जीवा भवट्ठिईए कायठिईए य होन्ति जे पवरा ।
 ते होन्ति पोण्डरीया अवसेसा कण्डरीया उ ॥ १५३ ॥
 गणणाए रज्जू खलु संठाणं चेव होन्ति चउरंसं ।

एयाइँ पोण्डरीयाइ ह्योन्ति सेसाइँ इयराइँ ॥ १५४ ॥
 ओदइए उवसमिए खइए य तहा खओवसमिए य ।
 परिणामसंनिवाए जे पवरा ते वि ते चेव ॥ १५५ ॥
 अहवा वि नाणदंसणचरित्तविणए तहेव अज्झप्ये ।
 जे पवरा होन्ति मुणी ते पवरा पुण्डरीया उ ॥ १५६ ॥
 एत्थं पुण अहिगारो वणस्सइकायपुण्डरीएणं ।
 भावम्मि य समणेणं अज्झयणे पोण्डरीयम्मि ॥ १५७ ॥

Summary of 2. 1.

उवमा य पोण्डरीए तस्सेव य उवचएण निज्जुत्ती ।
 अधिगारो पुण भम्मिओ जिणोवदेसेण सिद्धि ति ॥ १५८ ॥
 सुरमणुयतिरियनिरओवङ्गे मणुया पहू चरित्तम्मि ।
 अवि य महाजणनेय ति चक्कवट्टिम्मि अधिगारो ॥ १५९ ॥
 अवि य हु भारियकम्मा नियमा उक्कस्सनिरयठिइगामी ।
 ते वि हु जिणोवएसेण तेणेव भवेण सिज्जन्ति ॥ १६० ॥
 जलमालकदमालं बहुविहवह्लिगहणं च पुक्खरिणिं ।
 जंघाहि व बाहाहि व नावाहि व तं दुरवगाहं ॥ १६१ ॥
 पउमं उल्लंघेत्तुं ओयरमाणस्स होइ वावत्ती ।
 किं नत्थि से उवाओ जेणुल्लंघेज्ज अविबन्धो ॥ १६२ ॥
 विज्जा व देवकम्मं अहवा आगासिया विउव्वणया ।
 पउमं उल्लंघेत्तुं न एस इणमो जिणक्खाओ ॥ १६३ ॥
 सुद्धप्पओगविज्जा सिद्धा उ जिणस्स जाणणा विज्जा ।
 भवियजणपोण्डरीया उ जाए सिद्धिगतिमुवेन्ति ॥ १६४ ॥

Introduction to 2. 2.

किरियाओ भणियाओ किरियाठाणं ति तेण अज्झयणं ।
 अहिगारो पुण भणिओ बन्धे तह मोक्खमग्गे य ॥ १६५ ॥
 दव्वे किरिएजणया य पयोगुवायकरणिज्जसमुयाणे ।

इरियावहसंमत्ते सम्मामिच्छा य मिच्छते ॥ १६६ ॥
नामं ठवणा दविए खेत्तेऽद्वा उड्ड उवरई वसही ।
संजमपग्गहजोहे अचलगणण संघणा भावे ॥ १६७ ॥
समुयाणियाणिह तओ सम्मपउत्ते य भावठाणम्मि ।
किरियाहि पुरिस पावाइए उ सव्वे परिक्खेज्जा ॥ १६८ ॥

Introduction to 2. 3.

नामंठवणादविए खेत्ते भावे य होइ बोद्धव्वो ।
एसो खलु आहारे निक्खेवो होइ पञ्चविहो ॥ १६९ ॥
दव्वे सच्चित्ताई खेत्ते नयरस्स जणवओ होइ ।
भावाहारो तिविहो ओए लोमे य पक्खेवे ॥ १७० ॥
सरीरेणोयाहारो तयाय फासेण लोमआहारो ।
पक्खेवाहारो पुण कावलिओ होइ नायव्वो ॥ १७१ ॥
ओयाहारा जीवा सव्वे अप्पजत्तगा मुणेयव्वा ।
पज्जत्तगा य लोमे पक्खेवे होन्ति नायव्वा ॥ १७२ ॥
एगिन्दियदेवाणं नेरइयाणं च नत्थि पक्खेवो ।
सेसाणं पक्खेवो संसारत्थाण जीवाणं ॥ १७३ ॥
एकं च दो व समए तिण्णि व समए मुहुत्तमद्धं वा ।
सईयमनिहणं पुण कालमणाहारगा जीवा ॥ १७४ ॥
एकं च दो व समए केवलिपरिवज्जिया अणाहारा ।
मन्थम्मि दोण्णि लोए य पूरिए तिण्णि समयया उ ॥ १७५ ॥
अन्तोमुहुत्तमद्धं सेलेसीए भवे अणाहारा ।
सईयमनिहणं पुण सिद्धा यणहारगा होन्ति ॥ १७६ ॥
जोएण कम्मएणं आहारेई अणन्तरं जीवो ।
तेण परं मीसेणं जाव सरीसस्स निष्फत्ती ॥ १७७ ॥
णामं ठवणपरिन्ना दव्वे भावे य होइ नायव्वा ।
दव्वपरिन्ना तिविहा भावपरिन्ना भवे दुविहा ॥ १७८ ॥

Introduction to 2. 4.

णामंठवणादविए अइच्छ पडिसेहए य भावे य ।
 एसो पच्चक्खाणस्स छव्विहो होइ निक्खेवो ॥ १७९ ॥
 मूलगुणेषु य पगयं पच्चक्खाणे इहं अधीगारो ।
 होज हु तप्पच्चइया अप्पच्चक्खाणकिरिया उ ॥ १८० ॥

Introduction to 2. 5

णामंठवणायारे दव्वे भावे य होइ नायव्वो ।
 एमेव य सुत्तस्सा निक्खेवो चउविहो होइ ॥ १८१ ॥
 आयारसुयं भणियं वज्जेयव्वा सया अणायारा ।
 अबहुसुयस्य हु होज विराहणा इत्थ जइयव्वं ॥ १८२ ॥
 एयस्स उ पडिसेहो इहमज्झयणम्मि होइ नायव्वो ।
 तो अणगारसुयं ति य होई नामं तु एयस्स ॥ १८३ ॥

Introduction to 2. 6.

नामंठवणाअदं दव्वदं चेव होइ भावदं ।
 एसो खलु अदस्स उ निक्खेवो चउव्विहो होइ ॥ १८४ ॥
 उदगदं सारदं छवियद वसद तह सिलेसदं ।
 एयं दव्वदं खलु भावेणं होइ रागदं ॥ १८५ ॥
 एगभवियवद्दाउए य अभिमुहए य नामगोए य ।
 एए तिण्णि पगारा दव्वदे होन्ति नायव्वा ॥ १८६ ॥
 अदपुरे अदसुतो नामेणं अदओ ति अणगारो ।
 त्ततो समुडियंमिणं अज्झयणं अदइज्जं ति ॥ १८७ ॥
 कामं दुवालसङ्गं जिणवयणं सासयं महाभागं ।
 सव्वज्झयणाइं तहा सव्वक्खरसंनिवाया य ॥ १८८ ॥
 तह वि स कोई अत्थो उप्पज्जइ तम्मि समयम्मि ।
 पुव्वभणिओ अणुमओ य होइ इसिभासिएसु जहा ॥ १८९ ॥

Story of Adda

अञ्जदृष्ट्वा गोसालभिक्षुवम्भवद्भित्तिदण्डिणं ।
 जह हत्थितावसाणं कहियं इणमो तहा वोच्छं ॥ १९० ॥
 गम्भे वसन्तपुरए सामइओ घरणिसहिओं निक्खन्तो ।
 भिक्षुवारियादिद्वा ओहासियमत्तवेहासं ॥ १९१ ॥
 संवेगसमावन्नो माई भत्तं चइत्तु दियलोए ।
 चहळणं अदपुरे अदसुओ अदओ जाओ ॥ १९२ ॥
 पीई य दोण्ह दूओ पुच्छणमभयस्स पट्टवे सो वि ।
 तेणावि सम्मदिट्ठि ति होञ्ज पडिमा रहम्मि गया ॥ १९३ ॥
 दट्ठुं संबुद्धो रक्खिओ य आसाण वाहण पलाओ ।
 पव्वावन्तो धरिओ रज्जं न करेइ को अन्नो ॥ १९४ ॥
 अगणित्तो निक्खन्तो विहरइ पडिमाइ दारिगा वरिओ ।
 सुवण्णवसुहाराओ रन्नो कहणं च देवीए ॥ १९५ ॥
 तं नेइ पिया तीसे पुच्छण कहणं च वरण दोवारो ।
 जाणाहि वायविम्भं आगमणं कहण निग्गमणं ॥ १९६ ॥
 पडिमागयस्समीवे सप्परिवारा अभिक्ख पडिवयणं ।
 भोगा सुयाण पुच्छण सुयबन्ध पुण्णे य निग्गमणं ॥ १९७ ॥
 रायगिहागम चोरा रायभया कहण तेसि दिक्खा य ।
 गोसालभिक्षुवम्भी तिदण्डिया तावसेहि सह वाओ ॥ १९८ ॥
 वाए पराइइत्ता सव्वे वि य सरणमब्भुगया ते ।
 अदगसहिया सव्वे जिणवीरसगासँ निक्खन्ता ॥ १९९ ॥
 ण दुक्करं वा णरपासमोयणं गयस्त मत्तस्स वणम्मि रायं ।
 जहा उवत्तावल्लिण तन्तुणा सुदुक्करं मे पडिहाइ मोयणं ॥ २०० ॥

Introduction to 27

णामअलं ठवणअलं दव्वअलं चैव होइ भावअलं ।
 एसो अलसद्दम्मि उ निक्खेवो चउव्विहो होइ ॥ २०१ ॥

पञ्जतीभावे खलु पढमो वीओ भवे अलंकारे ।
 तइयो ऊ पडिसेहे अलसदो होइ नायव्वो ॥ २०२ ॥
 पडिसेहणगारस्सा इत्थीसद्देण च्चेव अलसदो ।
 रायगिहे नयरम्मी नालन्दा होइ बाहिरिया ॥ २०३ ॥
 नालन्दाएँ समीवे मणोरहे भासि इन्दभूइणा उ ।
 अज्जयणं उदगस्स उ एयं नालन्दइज्जं तु ॥ २०४ ॥
 Conclusion of 2. 7.
 पासावच्चिज्जो पुच्छियाइओ अज्जगोयमं उदगो ।
 सावगपुच्छा धम्मं सोउं कहियम्मि उवसन्ता ॥ २०५ ॥

